

ASO FARAILE, 20 FEPUARI 2015

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: E talitonu o lea ua tatou taunuu mai i le aso mulimuli o lenei vaiaso, a o lo o tumau pea le alofa ma le agalelei o le Atua i le paia ma le mamalu o le Palemene. I tulaga aloaia ou te momoli atu ai le faafetai ma le faamalo e tusa ai ma le faamalolosi mai i le faaauauina o le tatou Fono e pei ona tatou fuafuaina. Ua faamalo le onosai, ua malo le folau, ua malo le soifua manuia. O lea ua tatou toe taunuu mai i lenei taeao fou aua le faaauauina o a tatou galuega mai lava i le Aso Lua na tatou amata ai, o lea ua tatou taunuu mai i le aso puupuu. Ua faamalo le saunoa, ua faamalo fetalai, ua faamalo le malele i le paia ma le mamalu o le Maota i lenei vaiaso. E i ai le agaga ma le faamoemoe o lo o tatou sosolo pea i luga o tulaga faa-Palemene e ala i a tatou galuega ma mea ua faatulagaina, ua faamalo le onosai ma le faapalepale.

E faamalo atu foi i le tapuaiga a lo tatou atunuu o lo o tui mai pea le mulipapaga i maota ma laoa aemaise o le feagai ai ma tiute ma galuega. E talitonu le faamoemoe o la outou tapuaiga o lo o sagatonu ai galuega a le Palemene.

I le aso ananafi, e faamalo atu le sausaunoa. O nisi foi o sui usufono ua maea ona saunoa i lenei Tulafono Tau Faaofi taua o lo o ua i lumamea, a o lo o maua pea le avanoa i nisi o sui usufono e fia saunoa a o le i avatua le tali mulimuli e faamalalalama ai le pitolaau a le Malo.

E pei lava ona ou taumafai atu i le aso ananafi, po o fea lava e agai i ai suaga a le vaatele, o le itu lena e tulaga ese ai le tatou Palemene mai isi Palemene i fafo. Po o fea lava e ave i ai i le aumai avatu, ave i luga ave i lalo, ae mapu lava i nuu lelei. Po o fea lava e agai i ai le tatalaga o le avei aemaise foi suaga a faleupolu ma tamalii, tatou te o lava i le mea e i ai le autasi ma o le faa-Samoa moni lena. E momoli atu ai le faafetai tele i lenei taeao i le alafai mai o lau Afioga i le Palemia ma lau Kapeneta, aemaise foi sui usufono mamalu uma o le Maota i Minisita Lagolago. O lea foi e afio mai le Afioga i le Taitai o le Itu Agai, le Sui Taitai ma le paia o lea tala-na-atoa o lo tatou Maota.

Ua faapea foi ona tatou faatasi ma Faauluuluga o Matagaluega a le Malo ma Faalapotopotoga aemaise o le faafofogaaga a Samoa i lenei aso.

**TULAFONO TAU FAAOFI O TULAGA O TAGATANUU I LE
TEUFAAFAIGALUEGAINA O TUPE MAI FAFO 2014 – felafolafoaiga
faaauu i luga o le faitauga faalua**

FOFOGA FETALAI: E tolopo le Fono i le aso ananafi ua maea le saunoaga a le sui usufono mo Faleata Sasae na tolaulauina ai manatu ma lagona o le itumalo e ala mai i le sui usufono.

O lea ua avanoa le Maota mo se sui usufono e toe fia saunoa.

Tulai mai le sui usufono mo Sagaga le Usoga.

Afioga MUAGUTUTAGATA FAAMAUSILI AUIMATAGI PETER AH HIM (Sagaga le Usoga): Faafetai i lau Afioga i le Fofoga Fetalai mo le avanoa. Ou te faatalofa aloaia atu foi i lau Afioga i lenei taeao fou ona ua aulia mai i le agalelei ma le alofa o le Atua i le afio o lau Afioga i le Palemia ma lau Kapeneta, Afio Minisita Lagolago, afio lau Afioga i le Taitai o le Itu Agai ma lena Itu.

E faatalofa atu foi i le tapuaiga a le Aufaigaluega Paia a le Atua i Fata Faitaulaga e fia o lo o nonomanu aua se manuia o Samoa.

E faatalofa atu foi i lenei taeao i Lana Afioga Mamalu O Le Ao o le Malo ma le Masiofo, e faapea foi le Sui Ao ma le Masiofo. O le paia lava lea ia Tumua ma Pule, Ituau ma Alataua, Aiga i le Tai ma le Vaa o Fonoti.

Ua ou tulai atu ma le agaga faaaloalo lau Afioga i le Fofoga Fetalai e fia fai sina manatu puupuu e tusa ai ma le Tulafono Tau Faaofi ua opea nei i le Maota.

Lau Afioga i le Fofoga Fetalai, sa faalogologo ma le totoa i aso ua tuanai i felafolafoaiga ma manatu i totonu o lenei Maota. E momoli atu le faamalo ma le faafetai i lenei Maota i e na mua i malae ona ua faalogologo foi ma le totoa i tulaga i felafolafoaiga.

Lau Afioga i le Fofoga Fetalai, o so matou manatu i lenei Tulafono Tau Faaofi, o le tulaga lea e faapea o le faatupulaia po o le faia o ni auala e faatupulaia ai galuega mo o tatou tagata, ou te matua lagolagoina tele i le tulaga lea i lau faalogologo e pei e lilifa i le tulaga i oloa e faatauina atu i fafo po o export. Ona i ai lea o se manatu i tulaga ia e sao ai nisi saunoaga, o le Faalapotopotoga lea o le SROS o lo o fai suesuega i mea nei o le suauu o le avoka faapea foi nisi o suesuega o lo o faia i le tulaga i le fausia o fagu manogi po o perfumes, ma le falaoamata e fausia mai le ulu. Sa ou vaai i le nusipepa sa faasalalau ai ni tauofoga mo ni tagata o tatou e i ai le malosi tau tupe i le faiga o ni pisinisi latou te tauaveina pe takeover ina le taunuuga o ia sailiiliga sa faia e le SROS. O lo o maua faamatalaga e leai nisi o i ai ni malosiaga tau seleni latou te tauaveina ai ia taunuuga o suesuega a le SROS.

Ona ou faalogologo lava lea ma le totoa, a faapea e i ai ni kamupani mai fafo o lo o fia omai e faatu ni fale gaosi oloa po o factories e gaosi ai falaoamata ma fagu manogi faapea foi ma le suauu mai le avoka, ou te matua lagolagoina tele lea tulaga. E oo foi la i nai tagata e omai e galulue i o tatou eleele, o lea ua matau atu e le i leva ona maua le maketi o talo i Niu Sila, a o lea foi ua faapea mai ua le lava le talo i le maketi. Ua amata ona taugata ona o le le lava o le totoina po o le galueaiina e o tatou tagata o lea tamaoaiga o lo tatou atunuu e mafai ona faatau atu i fafo ma maua ai a tatou foreign currencies i le tulaga lea.

Ou te manatua taimi na aumai ai foi tagata Saina ma tagata Solomona na tuu taliga mai e matua, sa aumai e galueaiina toga koko ma faatoaga eseese sa i ai a le Esetete Tausi i lenei vai taimi aua le faatauina atu i fafo. Sa sologa lelei lava i lenei vai taimi i lou iloa, ae e i ai taimi e faamatuu atu ai i tua. O le tele o nai toeaiina i lenei vai taimi ua litaea pe na toe faafoi atu i lo latou atunuu ma le maua ai le tulaga sa i ai. E pei o le agaga lenei o lau foi vaavaai i le tulaga lenei, e i ai itu lelei o le Tulafono Tau Faaofi ua faatulai mai nei.

O le a ou le oo i le tulaga i sitiseni ona o lenei ua tele sui usufono ua sausaunoa ma faaali manatu i le sitiseni ma o lenei foi ua tali atu le Malo. A o le tulaga i mea tau investing ma le faatupulaia o galuega e matua lagolagoina. E lagona foi le faanoanoa lau Afioga i le Fofoga Fetalai ona e pei e foliga mai o le manatu o isi i le Tulafono Tau Faaofi lenei, na o tagata Asia. Ua tau' ai i ai le igoa o Saina e pei ni maa ua fetogia solo, a o lea foi e avanoa mo le au Siamani ma Peretania, ae ta te le o faalogo atu lava o faapea o le papalagi lea ua a, o le papalagi lea ua a. O lenei lava matou te nonofo ma faalogologo a o faapea mai o le Saina ua a, o le Saina ua a. O le mea lea ua tupu i le Saina e lagona ai le faanoanoa na o au, aua e tusa lava po o le Sapani e faia le faaletonu ae tau lava o le Saina, pe sau foi se Korea, o le Saina lava. So o se tagata lava e tau laiti mata, o Saina lava.

E i ai le atunuu o Sigapoa, Korea, Taiwan, South Korea ma isi atunuu na e i autafa o Rusia e puiti uma lava o latou mata, a o le mea lava e sasi ona faapea lea, "Ua faaletonu le Saina, leaga o le Saina lenei e a." E pei o lagona na ta te matamuli ai i isi taimi o le faaoga faalauaitetele o le igoa lea o le Saina.

Ona ou oo mai lea lau Afioga i le Fofoga Fetalai i le tulaga i investors. Sa ou fia lauga i le tulaga lenei, ae te i ua ou faalogo atu o lo o i ai Tulafono Faatonutonu ia e mulimuli mai o Regulations e fai ai fetuunaiga ma aiaiga e puipuia ai tulaga ia tatou te atugalua ai, ae e pei e mamafa sau lagolago i le faatupulaia lea o ni tagata e omai e fai le falaoamata i le ulu ma mea uma ia e suesue e le SROS ina ia faatupulaia ai ni galuega i totonu o fale faigaluega iinei i Samoa.

O se manatu puupuu lenei lau Afioga i le Fofoga Fetalai i le Tulafono Tau Faaofi ua faataatia i luga o le Laulau a Fono a le Palemene i lenei taeao. Faafetai tele i lau Afioga i le Fofoga Fetalai mo le avanoa. Ia manuia le Fono.

FOFOGA FETALAI: Ua malo faafetai. Tulai mai se tasi o sui usufono mo Falealili, Tofa Tusa Misi Tupuola ona faasolosolo mai ai lava lea i la outou faalau lenei, tasi, lua, tolu, fa, lima.

Tofa TUSA MISI TUPUOLA (Falealili): E faafetai tele i lau Afioga i le Fofoga Fetalai i le soifua maua ma le lagi e mama i le paia o le Palemene i lenei taeao fou. O lea ua tatou feiloai i manu e pei lava o upu na saunoa i ai lau Afioga i le Fofoga Fetalai i lenei taeao, ona o le alofa ma le agalelei o le Alii. Ua ou tulai atu ma le faaaloalo e fia fai foi se leo o lenei itumalo i lenei Tulafono Tau Faaofi tatau o lo o talanoaina nei ma soalaupule i ai sui usufono mamalu o le Palemene i lona tulaga aoatetele.

Lau Afioga i le Fofoga Fetalai, e leai lava se Samoa e le mamae ia te ia lona atunuu, ma e i ai lava upu a le atunuu e masani ona tatou faalogo pea i ai, "E mamae lava le tava'e i ona fulu." O le tulaga i lenei Tulafono Tau Faaofi lau Afioga i le Fofoga Fetalai, e leai lava se isi o lenei Palemene e le pele iā ia lona atunuu. Atonu foi o le agaga lea na mafua ai ona fatu e nisi o Misionare

anamua o le EFKS ma nisi o Ekalesia, le pese lea e masani ona tatou vivii ai ma peseina pea, “Lou nuu e o Samoa, e pele oe i le agaga. E itiiti oe ma faatauva a ae mamalu lava le Atua.”

Ona manatu lea o le sui usufono o lenei itumalo, o lenei Tulafono Tau Faaofi ua faataatia i le tulaga i le faatosina mai o tagata mai fafo atoa ai ma le faia o sitiseni o nei tagata, e manatu lou sui usufono ma lenei itumalo, e lagolagoina le finagalo o le Malo. O a tulaga e pei ona tatou faalogo pea ma o tatou faalogologo atu pea i le tele o faamatalaga, a o lou lava talitonuga o le tasi lenei Tulafono e iloa ai Taitai faatuatua, o Taitai latou te iloa le Alii mo le agai i luma. Aua o le fesili lava lea e fesili soo ai, o le a le faatuatua? O le faamoemoe lea i mea e le o vaaia. O lea ua tatou vaavaai atu mo a taeao ae tatou te le i iloa le tulaga i le sao, moni ma le atoatoa, a o le manatu o lenei itumalo e talia le Tulafono Tau Faaofi e pei ona tuuina mai.

E le o i ai foi se manatu e faaumiumi le lauga a le itumalo. O le mafuaaga lau Afioga i le Fofoga Fetalai ma le mamalu o le Palemene, e pei lava ona ou taua. E momoli le faafetai i le Afioga i le Sui Palemia i le faamalamalamaina o lenei Tulafono Tau Faaofi i le aso ananafi, atoa ai foi ma le Saunoaga Faaminisita a le Afioga i le Palemia. E pei o lea ua malama ulugalua le mataupu, ua malamalama. A o lou talitonuga lau Afioga i le Fofoga Fetalai, o le aumai ma le faatosina mai o nei tagata mai fafo, e i ai ni vaega e tataua ona toe silasila totoa i ai le Komiti, le Komiti lea ua aumai e le Tulafono ua tataua ona matua faamalositia nuu ia e lelei a latou tu ma aga faa-Kerisiano, e tataua ona aumai i totonu o le atunuu i lalo o le polokalame lenei lau Afioga i le Fofoga Fetalai ma le mamalu o le Palemene.

O lona lua o le taua o lenei Tulafono Tau Faaofi, o le maua ai o galuega mo le atunuu aemaise o alo ma fanua ia e pei ona saunoa i ai i le aso ananafi le Afioga i le Minisita mo Aoga, Taaloga ma Aganuu; o le taua lea. A o le tele foi o nisi o nuu ma itumalo lau Afioga i le Fofoga Fetalai ma le mamalu o le Palemene, e oo mai lava i le aso nei o la e tau sue ni galuega. E faapena foi lou itumalo i Falealili, o lea e faafofoga mai lou uso a Minisita o lo ma itumalo o Falealili, Afioga Hon Tuiloma Lameko. O aso uma, aso uma e omai lava iinei i Apia e sue mai ni galuega i faipule. O le upu e fai i ai, “Se malilie e le pule le faipule i le mea lena, ae o outou e sue ni galuega e fetauti ma outou i lenei vaitau. Ae a mafai ona tatou faatinoina fuafuaina nei ma siitia ai le tamaoaiga o le atunuu i ana atinae, o le a le mea e tuu ai? E tataua ona tofu le itumalo ma le shopping centre, tofu le itumalo ma mea uma e i ai ma le feoai solo ma tumutumu ai le taulaga i taavale afi ua faatupulaia le atinae. Ua vave le atinae o le atunuu lau Afioga i le Fofoga Fetalai, ae ua tataua foi ona silasila nei po o a ni mea e mafia ona foia ai nei faafitauli, o le faatupulaia o taavale afi i totonu o le atunuu ma tele ai kasa oona ma tele ai faalavelave tau taavale, ona o le feoai solo o le atunuu, tulou le mamalu lautele o le atunuu feafioai. A o nai tulaga na lau Afioga i le Fofoga Fetalai, e tataua ona silasila i ai lo tatou atunuu aemaise o lenei Tulafono Tau Faaofi.

Lau Afioga i le Fofoga Fetalai, e i ai nai popolega laiti o lenei sui usufono ma lenei itumalo ona e ao lava ona silasila totoa lenei Tulafono Tau Faaofi, mai lava i le Fuaiupu 1 seia tau i le Fuaiupu 25, se i silasila totoa i aafiaga o tu ma aganuu a le atunuu ma lana gagana e pei ona saunoa i ai, aemaise o ona fanua. Se i silasila totoa ane i ai sui mamalu o le Komiti i le Tulafono Tau Faaofi lenei.

Ona oo mai lea o se manatu lau Afioga i le Fofoga Fetalai ma le mamalu o le Palemene i agavaa lea ua tulai ma ii totonu o lenei Tulafono Tau Faaofi, i investors ia e tatau ona faatulagaina i le tulaga aoatetele i le faatinoina. E pei lava ona ou vaai foi i le initaneti o lena e i ai isi fuafuaga a le Malo o Peretania. O so o se investor lava e alu i totonu o le atunuu lea, e fai lana training. E fai lana polokalame faaaoaoga e aoao ai lana gagana igilisi ia aua ne i alu atu ma ni gagana ese ma avatu faaliliu upu. Aua o le tasi lena itu e mafua ai ona tele isi mea pepelo ma nisi mea sese e oo ma ii totonu o le Komiti mai tagata nei mai fafo. O lona uiga e tatau ona silasila totoa i ai le Komiti i tulaga ia i investors ia mai atunuu Arapi ma isi atunuu i totonu o Asia.

O lona lua o agavaa ia e tau popole i ai lou sui usufono e ui lava ua taliaina e lenei itumalo lenei Tulafono Tau Faaofi, o le aumai lea o ituaiga pisinisi i totonu o le atunuu. O pisinisi ia e tatau ona silasila i ai e pei o isi ituaiga pisinisi la ua tele i atunuu i fafo. O pisinisi ia e fiafia le au matutua e o e faaalu ai a latou tupe. O tamaitai foi ne ii le ao ma le po, ao ma le po. E ui lava tatou te le o vaai i lenei vaitaimi lau Afioga i le Fofoga Fetalai, ae afai e tupu le mea lenei, e le tatau lava ona tatou taliaina ia ituaiga mea leaga o Samoa o lana aga faa-Kerisiano e o faatasi ma lona Faavae. O tulaga na e ao ona silasila i ai le Komiti, ae out e lagolagoina lava tulaga aoatetele o le Tulafono Tau Faaofi aua e leai lava se Tulafono e atoatoa i sona taimi muamua. E ao foi ona teuteu ma toe teuteu ona tulaga uma, a o mea lava ia e tatau ona.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....

FOFOGA FETALAI: Malie le sui usufono o lo o saunoa, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Ona pau lava le mea e fia faamalamalama, o le taua ia o le tuualalo lea ua aumai i ituaiga pisinisi ia. O le iuleo foi lena sa ou lagonaina ina ua faatulai mai le Tulafono o Kasino ma sa oo atu foi le savali tele lava a le Fono a Ekalesia ma matou talatalanoa ai, ona ou faamalamalamaina lea. E ese Samoa ese atunuu i fafo, o atunuu i fafo e taga ai pisinisi na, e taga ai ituaiga pisinisi na. O tatou e faasa ituaiga pisinisi, o pisinisi na e solitulafono i totonu o lo tatou atunuu. E leai la se mea e popole ai. O le ala foi lena e alu alu lava maua e leoleo se tagata o lo o taumafai e fai se ituaiga pisinisi faapena ma molia i le Tulafono. O uiga ia e le o ni uiga e faataga i Samoa nei, ae e le natia e alu alu lava, maua ia ua fai foi ituaiga faiga faapena. Aua leaga o le lalolagi, o le lalolagi o lea e saoloto ai le Tiapolo. O le a aveane ai tatou o lea tatou te faitau Tusi Paia, ae sa faatasi lava Iesu ma lona Au Soo ma tilotilo i mea nei o vavega, ae na oo lava ina toe teena e Aposetolo lo latou Alii ina ua sau le fefe. E pei la o ituaiga mea faapena, o le tulaga lena e taua ai le tuualalo lea ona o le taua, ne it e i ua faapea nisi o taga mea na i Samoa nei; e matua sa taputapu. O lea out e tau manatunatu e taga i Niu Sila ma taga i isi atunuu. O le mafuaaga foi lena out e lagona o lena foi e tutupu ai mala in a atunuu, a o lea o lo o mau pea le toovae i le atunuu lenei, o le atunuu o lo o faavae i le Atua.

Lau Afioga i le Fofoga Fetalai, o iinei lava i le Palemene lenei e taofiofi maea i ituaiga uiga faapea, o Tulafono aua e le mafia lava ona fai ni na mea e aunoa ma le muai tatala atu i le Palemene lenei. O le tulaga lena pe oo lava i le faavavau, e le mafia ona faatagaina na ituaiga faiga e pei ona faataga i atunuu i fafo.

FOFOGA FETALAI: Malo faafetai i lau Afioga i le Palemia. Mo le faasaoina o lou taimi Tusa se i tuu atu le avanoa i le Minisita mo Aoga, Taaloga ma Aganuu.

Afioga Hon Magele Mauiliu (Minisita mo Aoga, Taaloga ma Aganuu): Mo le faasaoina o le taimi o le sui usufono mamalu. E puupuu lava lau mataupu ona e taua tele le vaega lea na laga e le sui usufono i le itu lea i le aoaoina o le gagana Samoa ma le faa-Peretania.

Ua lua nei tausaga o tapenapena lo tatou Malo i le tulaga lea, a o le Aso Lua o Mati toe lua vaiaso, ona fana loa lea o le roketi, ona launch loa lea o le Institute of Language lea e fai e le Matagaluega o Aoga. O le a aoaoina ai mataupu uma lava, o le Samoan, igilisi, Saina, Iapani, Siamani ma o mataupu uma lava ia o le a i a ii le tatou Institute lea. E faafetai ai foi i le sui usufono ona ua laga lenei mataupu taua, ua maua ai le avanoa e faasilasila atu ai; ae faafetai tele.

Tofa Hon Fonotoe Nuafesili Pierre Laufo (Sui Palemia, Minisita mo Pisinisi, Alamanuia ma Leipa): Lau Afioga i le Fofoga Fetalai.....

FOFOGA FETALAI: Tulai mail au Afioga i le Sui Palemia.

Tofa Hon Fonotoe Nuafesili Pierre Laufo: Mo le fia faasaoina o le taimi o le sui usufono mamalu. O tulaga ia faafetai mo fautuaga lelei. O vaega uma ia e pei foi ona ou faamalamalamaina i le aso ananafi, o lo o i ai a tatou Tulafono Faatonu ma Faiga Faavae a le Komiti. O le Komiti lea e faavae i lalo o le Tulafono Tau Faaofi lenei. O i latou la na e silasila i le tagata. Ia manatua foi, e le faapea e leaga uma tagata o se atunuu. E moni lava e i ai atunuu o lo o tutupu ai vevesi po o lo o aafia foi i taua, ae e le faapea e leaga uma tagata. O le tatou Komiti la e gafa ma le sailiiliga o talosaga e faatoai ma ii le Komiti i lea tagata po o lea pisinisi ma vaega faapena. A o le tulaga foi lea e faapea e taofi atoa se atunuu ia aua le agavaa, e fai sina faigata o le tulaga lena, ae o le a silasila foi i ai le Komiti i lena vaega.

E faigata ona taofiofi suiga o le soifuaga ua oo mai, lea na saunoa i ai le sui usufono mamalu, o le social impact o pisinisi e oo ma ii Samoa, a o lea lava o lo o i ai isi foi vaega ma faalapotopotoga o lo o gafa ma tulaga faapea. O lea foi e i ai le tiute o le aufai lotu latou. O i latou foi na o lo o faapena ona aoaoina fanau faapea foi tagata lautele ina ia aua ne i aafia fua i nei fesuiaiga. E ui lava i le tele o suiga, a o suiga lava e faigata ona tatou taofia aua o lea foi e femalagaai o tatou tagata e o i fafo ma omai ma silasila i suiga o lo o i ai la atunuu ma e faapena la. E oo foi la i tulaga i tagata ma o latou talitonuga, o mea na e mataitu lelei ma o le mafuaaga foi lena lea tatou te taua ai le mea foi lea o le due diligence aua e sailiili e le gata o tagata faatupu vevesi ma faatupu faalavelave, ae leaga e ese foi o latou talitonuga aua o isi foi tagata e le talitonu i le Atua ma e ese foi a latou tapuaiga.

E pei o mea na e matua mataitu lelei ma sailiili lelei a o le i tuuina i ai le avanoa.

FOFOGA FETALAI: Malo faafetai i lau Afioga i le Sui Palemia. Tulai mai Tusa e faaauau le saunoaga.

Tofa TUSA MISI TUPUOLA: Lau Afioga i le Fofoga Fetalai, faafetai tele i le saunoaga a le Afioga i le Palemia ma le Afioga i le Minisita aemaise foi o le Afioga i le Sui Palemia e tusa ai o nisi o mataupu e pei ona ou talanoaina. O fautuaga lava, o tuualalo ma nai motugaafa ina ia faatupu ai pea le faatuatua mo le agai i luma o lenei Palemene ma a latou fuafuaga.

Lau Afioga i le Fofoga Fetalai, o le tulaga lea i le faavaeina o lenei Tulafono Tau Faaofi po o lenei vaega ua aumai, o lou lava manatu i le establishment o le Tulafono Tau Faaofi, e le o lava sui o le Komiti. E tatau ona i ai nisi sui. O le faataitaiga o le a ou fai atua, e tatau ona i ai se sui o le Ofisa o le Loia Sili i totonu iinei, o se sui o le Matagaluega o le MNRE, se sui o le Matagaluega o Aoga, Taaloga ma Aganuu ma le Soifua Maloloina. E pei o isi ia vaega e tatau ona toe silasila i ai le Tulafono Tau Faaofi i lona atoaga lelei ina ia aua ne i toe fesiligia i le taimi mulimuli, a o lea ua i ai uma pulu fagota aua le silasila i ai a le atunuu. Ona faapea loa lea o le atunuu, e leai la o lea e malosi lava le Komiti. Aua o lenei Tulafono Tau Faaofi lau Afioga i le Fofoga Fetalai i lau tilotilo, o le Komiti lea o le a faavaeina ai le Tulafono Tau Faaofi lenei.

Ona i ai lea o se manatu lau Afioga i le Fofoga Fetalai i le agai i luma. E oo foi i talosaga tetee aua o lea e i ai talosaga tetee i totonu o le Tulafono Tau Faaofi lea e toe filifili ai se isi loia na te taitaia. O se tagata ua sili atu i le valu tausaga talu ona faigaluega. O lou lava talitonuga, o le a le mea a le tatou Loia Sili e fai? E ui lava ina tele galuega a le Loia Sili ma lona Ofisa, a o ia tonu lava lea e tatau ona ave i ai le faatuatua o le atunuu aua o le matua lauia lava le Loia Sili.

Tofa Aveau Tuala Lepale Niko Palamo (Faleata Sasae): Lau Afioga i le Fofoga Fetalai, o se mea e fia faamalamalama.

FOFOGA FETALAI: Malie lau Afioga i le sui usufono mamalu. Se i tulai mai le sui usufono mo Faleata Sasae.

Tofa Aveau Tuala Lepale Niko Palamo: Faafetai i lau Afioga i le Fofoga Fetalai ae faafetai foi i le sui usufono mamalu i le saunoaga matagofie. Ua faalogologo atu lou nei sui usufono, o lea ua lagolago e se tasi o sui usufono mo Falealili le faatauina o le sitiseni e maua ai le mea lea e finagalo i ai. O le itu ou te fia malamalama ai, o lea na saunoa le Sui Palemia o lauia le Komiti lea ua i ai nei.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Malie le sui usufono, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le mea lea e vevesi ai tatou, o le tatau i upu faaoloataua, e tatau ese ai ma le Tulafono. O le ala foi lea na ou tulai atu ai i le sui usufono lea e saunoa nei i le tuulafoai o saunoaga. O le mea lea e vevesi ai tatou, e le o i ai lava ni faatauga sitiseni o fai. O le fai soo o le mea lea, e le mafai ona nofonofa le Kapeneta. O lea ou te iloa lelei, o le agaga ia faaoloataua le atunuu e tetele i le Tulafono Tau Faaofi. O lona uiga e te musu e saili ni galuega mo a tatou fanau aua o le agaga lena o le Tulafono Tau Faaofi? E te musu, a o le a le aoga na ala ai ona sau i le Maota?

Lau Afioga i le Fofoga Fetalai, e pei o le agaga lena. E le mafai lava ona tuu loa se saunoaga tuulafoai e fai i totonu o le Maota lena.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai, se e faanoanoa lava lo ta mafaufau i saunoaga a le Palemia. A o le a le mea lea e fai i le Tulafono Tau Faaofi? E aumai tupe ae ave le sitiseni. E le aumai fuaina tupe ae e le o se faaoloataua i le atunuu. O lea e tau le mea sao i le atunuu aua o le mea lea o le a tupu.

FOFOGA FETALAI: O lea ua maua atu lou finagalo. Ua alu le aso ananafi o taumafai e faapupula atu le tulaga lena ina ia taatia i lagatonu le uiga ma le igoa o le Tulafono Tau Faaofi. O lea foi sa tatou faalogologo uma lava i le taumafai atu e faamalamalama. Ia tatou o word by word ona malamalama lea, a o le mea lea o le tatou o e toso mai isi faaupuga. O lea ua taumafai atu nei, sa ou taumafai atu ae leaga o lea ua tulai mai le Afioga i le Palemia.

Malie le sui usufono mamalu, a tatou o nei e faauiga upu ia e te saunoa i ai, ona felefele lea o le tatou mataupu, ae malie faasagatonu lou finagalo i le uiga ma le aano na ala ai ona e faauilavea i le sui usufono mamalu o lo o taua, a o le lotea o le upu lea, e fai sina tuga o le upu lena. O lea ua uma ona ou faamanatu atu i le aso ananafi, sa fetuunai foi le sui usufono mo Gagaemauga Nu.2 ma le Afioga i le Palemia e tau faamanino. E le o i ai se upu faapea i le Tulafono Tau Faaofi, a o le teu faafaigaluegaina lea tatou te talanoa ai. O le teu faafaigaluegaina, not for sale. There is no such word in there said for saling of passport. E tatau ona faamalamalama le mea lena aua o le itu sili lena ona taua ina ia aua ne i fetosoaiina le tatou Fono. E leai se mea e faapea e for free, e i ai lava le tulaga o le faafetauaiga o mea faapea. Aua a tatou o loa e tulituliloa upu i le upu, ona malilie lea o sui usufono, ou te manatu e malamalama le Tulafono pe a tatou o i le tulaga i le faauigaina o upu o le Tulafono Tau Faaofi.

Tulai mai le sui usufono mo Faleata Sasae e faauma lau saunoaga i o i le sui usufono.

Tofa Aveau Tuala Lepale Niko Palamo: O le fia malamalama ona na alu le aso ananafi o saunoa le Afioga i le Sui Palemia po o le Minisita foi e ana le Tulafono Tau Faaofi, o le Komiti lena e matua laua lava. A o lea e te le auai ona o lea e i ai isi tagata ia e te finagalo i ai? Pe aisea, ua e le talitonu i le finagalo o le Afioga i le Minisita?

Tofa Hon Fonotoe Nuafesili Pierre Laufo: Lau Afioga i le Fofoga Fetalai, o se mea e fia faasao.

FOFOGA FETALAI: Tulai mai lau Afioga i le Sui Palemia.

Tofa Hon Fonotoe Nuafesili Pierre Lauofo: Ua ou tulai atu a o le i toe faaauauina le saunoaga a se tasi o sui usufono mo Falealili, Tofa Tusa Misi Tupuola. A silasila ma faitau lelei i le Tulafono Tau Faaofi i le vaega lena e tofia ai le Komiti, o lena e i ai ma le faaupuga e mafai ona aumai nisi tagata e faaopoopo i ai pe a manaomia. O lea la e aumai e fesoasoani i le galuega a le Komiti. O lea lava e malamalama, a o le faalavelave o lea e tutulai mai, ae ana faitau lelei i le Tulafono Tau Faaofi meamanu e le fia tutulai mai i lea mataupu.

FOFOGA FETALAI: E manatu o le saunoaga a le Minisita e faatatau i le saunoaga a le sui usufono mo Faleata Sasae. O le fautuaga lava ia lea na saunoa i ai Tusa, o lo o sagatonu lava lana fautuaga. Ua maioio ma silasila lelei ia, o isi tagata ia e tatau ona auai i le Komiti. Se i vaai la i le matagofie o le fautuaga lea e aumai? O lea foi ua talia e le Sui Palemia, Tusa tulai mai e faaauau le saunoaga.

Tofa TUSA MISI TUPUOLA: Faafetai lava i lau Afioga i le Fofoga Fetalai, e faafetai foi i le sui usufono mamalu. Ou te le toe tali atu foi i le sui usufono ina ne i tele ai le sese. Lau Afioga i le Fofoga Fetalai ma le mamalu o le Palemene i lenei taeao, o le manatu lena o lenei itumalo i lenei Tulafono Tau Faaofi.

O le tulaga foi i mea nei o sitiseni, na valaau mai foi anapo le isi sui o Falealili, “Tusa o le a le sao o le mea lea na ou faalogo atu ai ananafi?” Ona ou fai atu lea, “Aua le popole, o le fia maua o ni pemitā e omai ai nai tagata foi ia ina ia aua ne i toe faia ni pemitā. Ia aua ne i toe faia ni visa, ae omai i inei e aumai a latou tupe e faafaigaluega ai a tatou fanau ma atiae ai lo tatou atunuu.”

O le tulaga i le Tulafono Tau Faaofi lau Afioga i le Fofoga Fetalai, ou te masalo o lea ua maea uma isi vaega ia ou te taumafai i ai, ae na o sina mataupu laitiiti lava lea lau Afioga i le Fofoga Fetalai i le tulaga aoao tetele o lenei Tulafono Tau Faaofi. O lea ua 50 tausaga talu ona Tutoatasi le atunuu, a o le upu moni lava o la e faafofoga mai lou itumalo o Falealili, o le tele lava o mea e le o mafai ona maua e le o mafai ona maea ona fai e le Malo ia tulaga aemaise lava matou e mamao i tua i Falealili, Safata, Aleipata ma Lefaga. O itumalo e aupito sili ona tele tagata palota o lo o i ai, a o le mea lea e tulai mai ma le faaaloalo lava, tulou lava o lou gutu ma le afi, e oo lava i isi o matou i le taimi nei, o lea lava e le i oo lava i le soifuaga lea e soifua ai Apia nei ma o le upu moni lava lea. A o le mea lava lea e tautu i ai, o le mea e lelei i Apia, e lelei i Falealili, lelei i Lefaga, e lelei foi i Aleipata ma Safata. O le mea la lena o lea ou te tulai atu ai lau Afioga i le Fofoga Fetalai, talosia ia mafai ona faatino lenei Tulafono Tau Faaofi ae se i faatino atinae nei ina ia maua se soifuaga lelei o tagata.

FOFOGA FETALAI: Se i finagalo malie lau Afioga i le sui usufono mamalu. Se i faaola ane le mic lea faamolemole. Se i faitau lelei a tatou mic, oomi le moli ma le faaletonu. (*I le Taitai o le Itu Agai*).

Afioga Hon Palusalue Faapo II: E faamalulu atu i le sui usufono o lo o saunoa, saunoa oe i lou itumalo. O Safata, o le matua tulaga i se tulaga lelei ona o le atiae o tagata Safata. Ua tutusa lava ma Apia, ua fai taxi stand, ua fai hotels, ae aua e te popole fua. Se saunoa ia Falealili pe afai o tele le faaletonu. E mafua ia ai? E mafua i sui usufono mo Falealili.

Tofa TUSA MISI TUPUOLA: Faafetai i lau Afioga i le Taitai o le Itu Agai. Ua ou tulai atu.....

FOFOGA FETALAI: Malie le sui usufono, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Se i fai atu lau faamatalaga lea. E le onomea i se Minisita le tau tulai mai e faasao. O le 1979 i le 1982, 1982 i le 1985, 1985 i le 1988 toe soso mai i le 1991 i le 1996, sa galue ai le faipule mataalia e suafa ia Pule Lameko. O ia lena na faatuina le matatia ua silia i le 30 tausaga o talanoaina se sui usufono faaopoopo i totonu o le Palemene. E tele faipule sa tulai mai i Safata sa finauina. Ua fiu e finau e le sao. O le mafuaaga lena e matua to ai le pulou ona o le finau o le faipule i lena taimi e saili malo, na mafua ai ona to le matupalapala ma e lua sui usufono. Na manuia Safata ma manuia Salega, lea na tailua ai sui usufono. E le i moe i le galueaiina mai o atinae mo le itumalo. O lea la na oo loa i le 1996 malolo mai ae ua atinae le itumalo ona o le lelei o galuega a le sui usufono na i ai i lena vaitaimi. O lea la ua aeae ai isi na mulimuli atu.

Lau Afioga i le Fofoga Fetalai, o le mafuaaga lena. O le tele o nei tausaga sa galue ai lena sui usufono, o le Suafa o Pule Lameko. E le o se tamai faipule, o lea la ua aeae ai isi na mulimuli mai lea ua i totonu o le Maota, ae e le silafia mea sa tutupu i lena taimi. O lea ou te tulai atu ai, faafetai i le Afioga Pule po o fea o nofonofu mai ai, ona o le tele o nei galuega sa fai i totonu o le Vaega lenei.

O lau faasilasilaga lena lau Afioga i le Fofoga Fetalai.

FOFOGA FETALAI: Tulai mai lau Afioga i le Minisita.

Tofa Hon Tuiloma Lameko (Minisita mo Tupe Maua): Lau Afioga i le Fofoga Fetalai, ua ou tulai atu e fai sina fesoasoani i le tele o le au le malamalama ma ou te faitio foi, leaga o le tele o outou faatoa nonofo lea i nofoa, ae vagana la nai tama ia ua ou tau manatua e i ai Palusalue aua o le tagata aupito leaga lea.

Ua ou taua o le tagata e aupito leaga e pei ona saunoa le Palemia. E tele ou taimi na alu i le taumafaiga o se sui usufono faaopoopo mo Safata, ae sau lau tama lea mai o sa alu i fafo, ona ma o faatasi lea. Na vaevae a ma palota, ae te i ua sue atu ua palota lava na o ia. O le mea la lea e i ai i le taimi lenei, o lea lava ou te fai i le vaega lea e agaia le Malo, o lea ou te fautua i ai, "A outou mananao tou te tulai mai i se taimi i le Malo, sui lo outou Taitai." O lea e i inei uma outou, ae tatou te faafesagai loa ona ou fai atu lea, a outou alu lava i le mea lena, tou te iloa a outou palota e maua, e laki pe a maua se lima.

Lau Afioga i le Fofoga Fetalai, e manaia foi le tulaga lea e faaali ai ni manatu. O le tulaga la e i ai, o le a faatali e i ai se taimi ona faaali lea o se manatu leaga o lea e saunoa le isi sui usufono mo Falealili.

Ia manuia le Fono.

FOFOGA FETALAI: Malo faafetai; tulai mai le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai, o au e pele i lou agaga le Afioga ia Pule Lameko. Ou te le faagaloina lana foi tautua ia Safata, a o le mea e fia faasao. Ua ou tulai atu, o le atiae lava o Safata lea ua lelei ai, ioe, o le ola atiae. A o le mea lea ua saunoa i ai le Afioga i le Palemia, o le mea tonu lava lea o le faaoloataua lea e saunoa soo i ai. O le faaoloataua, ae tumau lava lo taua fealofani lau Afioga i le Minisita mo Tupe Maua.

Ona pau le mea e fia faasao i se tasi o sui usufono mo Falealili, se i taumafai ane lo outou itumalo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Malie lau Afioga i le Taitai o le Itu Agai, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O lea ou te tulai atu e ave lau faamalo i le ua tele Paeaiga o tulai mai ua mafua ai ona lelei Safata. O le a se isi atinae e sili atu nai lo le lua o sui usufono? Ua leva, e oo mai nei lava o lea e talosaga mai lea itumalo, talosaga mai lea itumalo se i faalua o latou sui usufono ua toatele naunau le au palota, ae pau lava lea o le taimi na tafa ai le finagalo o le Maota lenei, o le a to le matupalapala e faigata le vaai o le Afioga Tofilau Eti Alesana ma i latou foi na tau matutuaina i lenei Vaega Faaupufai i le punouai o le sui usufono mo Safata i totonu o le Vaega Faaupufai ma le tele o lona sao, o lea la na manuia ai foi ma Salega. E tatau ona ou tulai e ave lau faamalo. O lea la e ave lau faamalo a o lea foi ua saunoa mai lou uso le Taitai o le Itu Agai, ua ou faaoloataua. E leai ou te le o faaoloataua Tuiloma. O Tuiloma lava ia e saili malo.

Afioga Hon Manualesagalala Enokati Posala (Minisita mo Galuega, Felauaiga ma Atinae Eeseese): Lau Afioga i le Fofoga Fetalai.....

FOFOGA FETALAI: Tulai mai se tasi o sui usufono mo Safata, lau Afioga i le Minisita mo Galuega, Felauaiga ma Atinae Eeseese.

Afioga Hon Manualesagalala Enokati Posala: O lea ua taua lou itumalo, ae ina ne i faapea lou itumalo ou te le o Fono. O le agaga faafetai i le Afioga ia Pule na tulai mai i le itumalo, o lea ua saofia ai maua i totonu o le Palemene. E tele foi la le leo o le itumalo i totonu o Upufai. Ou te tetee i le tulaga lea e faapea ua atoatoa ona lelei le itumalo, e leai. O la e faafofoga mai le itumalo, a o le tasi lenei Tulafono Tau Faaofi ou te iloa afai ae pasia, ou te iloa o le a tele le suiga aua e i ai foi atinae e moomia ma tatau ona fai mo le

itumalo mo le manuia lautele. A o le saunoaga a le Taitai o le Itu Agai aua o lea ua fiafia i taxi stand la e fai i tua, a o le mea lea na tetee ai i le Malo, o le suiga lea. Aua ana le faia le suiga lea, meamanu e le gafatia e nai o matou tagata i tua ona fai taxi stand ia, ae faafetai o lea ua saunoa o le tasi lea vaaiga taua ua silasila i ai i tua i le itumalo.

Ma le agaga faaaloalo lava.

Afioga Hon Palusalue Faapo II: Lau Afioga i le Fofoga Fetalai, e fia faasao le saunoaga atoa a lou uso a faipule.

O le mea muamua, e leai ma sau tala na fai atu ua atoatoa atinae i tua. O lau tala, ua lelei le atinae o tua i Safata, ae e le i lelei atoatoa. Aisea? E mafua ia te oe. Na tatalo mai i auale le itumalo atoa. Ioe, o lena e i ou lima. Aisea le mea e te le faia ai? O lea e faafofoga mai lou itumalo.

O le tulaga i le taxi stand.....

FOFOGA FETALAI: O lea ua maua lou finagalo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le saunoaga a le Minisita mo Galuega, Felauaiga ma Atinae Eeseese, ou te manatua lava le isi taimi na tutulai ae ai le Taitai o le Itu Agai. O lana fautuaga, “Ia faamulimuli lava taua ina ne i t e i foi ua faitio le atunuu.” Oi a o lea foi ua ese mea ia ua aumai i le taeao lenei?

Afioga Hon Palusalue Faapo II: Lau Afioga i le Fofoga Fetalai, e faamulimuli seia oo i le tausaga lenei. Aua e te toe popole ia Tuilaepa, fai loa itumalo, fai mea la e mananao ai.

FOFOGA FETALAI: O lea ua maua lou finagalo.

Afioga Hon Manualesagalala Enokati Posala: Lau Afioga i le Fofoga Fetalai.....

FOFOGA FETALAI: Tulai mai lau Afioga i le Minisita.

Afioga Hon Manualesagalala Enokati Posala: Ia, leaga o lea e faafofoga mai le itumalo. O le atunuu e Faavae i le Atua. O le valaauina foi o i tatou e faasafua mo le atunuu atoa.

O le finagalo o lou uso a faipule, o lena tou te faafofoga mai aua o lea o le a ova ma le 20 tausaga o e i totonu o le Maota, ae e le i fauina Roma i se aso se tasi. O lea faatoa papale mai, o le agai i luma e manuia ai le itumalo ma manuia ai le atunuu. Ou te le faalogo i ai leaga e femoumouai. O le lagona lava lea e i ai e femoumouai lava lou uso. E ese le tautinoga na fai i lea tausaga, ae ua oo mai nei ua faavevesi, a o le agaga maualuga lava ia toa le tai i le itumalo, ia tapuaia o ma faiva ma lou uso a sui usufono. Ia manuia le Fono.

FOFOGA FETALAI: Malo faafetai i le Taitai o le Itu Agai. E manatu ua...

Afioga Hon Palusalue Faapo II: Lau Afioga i le Fofoga Fetalai....

FOFOGA FETALAI: Ou te manatu ua malamalama le mataupu.

Afioga Hon Palusalua Faapo II: Toe tasi lava. E leaga e maoae le tuuahiiga lea e fai mai o lou faavevesi.

FOFOGA FETALAI: A o lea foi na e saunoa i le Minisita o ia la e faaletonu ai le Itumalo, o lena ua fetawai a oulua upu. Ou te talitonu o suaga lava.....

Afioga Hon Palusalua Faapo II: E leaga o la e faafogafoga mai lou Itumalo. O au e finau i mea e lelei ai le Itumalo, ioe, ou te finau ou te le fefe e fai mea lelei.

FOFOGA FETALAI: Ou te manatu ua manino ma malamalama, ae mo le faasaina o le taimi o le sui usufono, o lea foi ua saunoa le Minisita mo Tupe Maua. Talofa e, o le tagi talatala lava lea a Tuiloma i taimi uma.

Tuiloma onosai, e faagalo gata lava se toa, ae e talitonu le faamoemoe o lea ua taatia i lagatonu le mataupu.

Tulai mai le sui usufono e faaauau le saunoaga.

Tofa TUSA MISI TUPUOLA: Faafetai i lau Afioga i le Fofoga Fetalai. Ia manatua foi e lau Afioga i le Fofoga Fetalai ma le mamalu o le Palemene, o le Afioga i le Minisita mo Galuega, Felauaiga ma Atinae Eseeese, ou te vaai pea lona naunau ina ia faaleleia lo tatou atunuu, ae paga lea e le lava ni tupe, e utiuti seleni a le Matagaluega e faatino ai auala. O le ala lea o lou taua o lea mataupu ona ua fia oo atu galuega i le tele o auala. O auala laupapa ma auala sima tuai ua fia faafou. O lo o manao i ai le Minisita, ae fai i le a? E leai se mea. O le ala lea o lou taua, a o lea ua faalavelave mai le Taitai o le Itu Agai. A o le agaga lea o i tatou uma o sui usufono, ia faaleleia o tatou Itumalo. A lea e luelue mai le ulu o le Minisita mo Tupe Maua, o le Minisita mai lou Itumalo ma te galulue faatasi aua se lelei o le Itumalo?

Ona faauma atu ai lea o sa matou tala lau Afioga.....

Tofa Levaopolo Talatonu: Lau Afioga i le Fofoga Fetalai, na o se mea laitiiti lava lea e fia faasao i le saunoaga a le sui usufono.

O lea ua saunoa mai le sui usufono pe fai i le a? Na faatoa uma nei lava ona toe sii i luga laisene ma fees i uta i le LTA. O tupe na e fai ai mea ia, e le i atoa foi se tausaga ae toe sii.

FOFOGA FETALAI: O lea ua maua, ae e manatu ia tulai mai pea le sui usufono e faauma mai lau saunoaga.

Tofa TUSA MISI TUPUOLA: Ua uma se manatu o lena Itumalo e ui ina faalavelave soo le Itu Agai i le lauga a Falealili, ae e leai o ala lava o Fonotaga a le Palemene. E momoli atu le faafetai i lau Afioga i le Minisita po o lau Afioga i le Sui Palemia ma lena Tulafono Tau Faaofi, aemaise o le Kapeneta ma lau Afioga i le Palemia e tusa ai o lena Tulafono Tau Faaofi ua faia i luga o le toa o le loto ma le agaga faatuatua i le Atua.

Ia alofa le Atua ia Samoa. Ia manuia le Fono.

FOFOGA FETALAI: Malie lava le sui usufono mo Palauli leaga o lea na ou fai atu o lea o le a faasolosolo atu – tulai mai le sui usufono mo le Vaa o Fonoti ona faasolosolo atu ai lava lea.

Afioga TIALAVEA FEA TIONISIO SEIGAFOLAVA (Vaa o Fonoti): Faafetai i lau Afioga i le Fofoga Fetalai ua maua se avanoa e fai atu ai se manatu o lenei Itumalo. A o le i faia se manatu o le Itumalo, e le o po se lilo i le lauga faifai pea a lenei Itumalo i Tala Autu o Tupe e uiga i auala. Na amata mai lava ona Tutoatasi Samoa e le i oo lava le ta i auala uma o le atu Fagalao. O le amataga o lenei vaiaso sa saunoa ai se tasi o sui usufono ma taua ai ni a ma faigamalaga sa fai. E sao lelei lea lagona. O faagasolo mai o le tatou Fonotaga i lenei vaiaso, na saunoa ai lau Afioga i le Fofoga Fetalai, o lo o i ai le Komiti latou te toe sailiilia sui e mafai ona omai i totonu o lenei Palemene ma ua tali ai i ina lou popolega. Ua tutulai mai foi le Afioga i le Palemia ma le Sui Palemia ma faamalamalama mai ma ua uma ai le popole o lenei Itumalo.

E pei ona ou fai atu i le amataga o le faamatalaga, toe pau lenei o le itumalo e le o lavea ai le upu foi lea, “O le mea e lelei i Apia e lelei foi i tua”. E sese lena upu i lou Itumalo leaga e le i faia se auala galue e tasi, ae ua 50+ tausaga talu ona Tutoatasi Samoa, e le i soo Fagalao i le auala. Faafetai i le Minisita mo Galuega, Felauaiga ma Atinae Eseeese ua tulai mai nei, e le faapea o se faaviivii atu i lau Afioga, ae faafetai ua fai le galuega i Uafato. E sao lelei lau faamatalaga, o outou tofi, o tofi mo Samoa atoa ae le o ni tofi mo outou Itumalo. E iloa le toa e fai mea sao ma fai mea tonu i le pipii i le Alii. Faafetai mo le faaso, e ui lava e tele nisi auala o Fagalao ma Faleapuna e le i faia, ae faafetai i le alofa o le Atua ua fai lo matou auala.

I le Tulafono Tau Faaofi o Tulaga o Tagatanuu i le Teufaafaigaluegaina o Tupe mai Fafu, ia te au lava ia, e sese le igoa o le Tulafono Tau Faaofi. Ua avea le upu sitiseni ma mea ua ta aofai ai le Tulafono Tau Faaofi lelei.

O lenei Tulafono Tau Faaofi ua lotea e le Palemene, e i ai le popolega i le Tulafono Tau Faaofi o lo o i ai i le taimi lenei ona o le auala e mafai ai ona maua sitiseni a Samoa e pei ona tolaulau mai e le Palemia, ma se tasi o sui usufono mo Vaimauga Sisifo, Tofa Lefau Harry Schuster. E toatele atu tagata sitiseni Samoa nai lo le sitiseni lea. O tagata foi nei e omai e faigaluega iinei e lima loa tausaga otomeki lava le sitiseni pe a talosaga. Masalo o le vaega lena o le tausaga po o le 10+ e maua ai sitiseni. Po o fea lava le atunuu e aumau ai e lima loa tausaga ua maua le sitiseni. E leai ma se \$4miliona e aumaia i totonu o le atunuu, e sau e faigaluega ma sue tupe ae maua le sitiseni maua fua. O le sitiseni lena e tataua ona i ai se mea e puipuia ai.

O le Lipoti a le Ofisa o Tupe e 23,000 le aufaigaluega. O ai la le investor e fia sau i Samoa? Ia talosia ia maua nisi e omai e fia invest i le tatou atunuu i lenei Tulafono Tau Faaofi ae matua lau mai. A i ai foi nisi auala e mafai ona faatosina mai ai nisi pisinisi e aumai, o lo o fia fai auala o lo matou itumalo. O matou foi i Fagalao o lo o i ai le bay e aupito sili ona lelei e mafai ona fai ai se uafu ma fai ai ni faleia, e fia fai ni taligalu. O lou Itumalo e lumafale i le moana ae tuafale i le mauga. E le umi lava ona savali i tua e ‘a’e loa ma e manaomia taligalu ma auala. Po o fea lava o Upolu ma Savaii, a pasi atu i lea nuu ma lea nuu e tailua auala galuega. O nisi o itumalo e 7 i le 8 auala galue. E va Fagalao ma Faleapuna, ae leai se auala galue ua faia. O le naunautaiga lena o lou nei sui usufono, a i ai nisi auala e mafai ona faatosina mai ai nisi, o

le a le mea e tuu ai ae ia mafai ona atiae lo tatou atunuu? Ua saunoa foi le Minisita o Aoga, Taaloga ma Aganuu, i le tele o fanau e iu mai ae leai ni galuega po o le a faapefea ona fai. E sao lelei, a le maua ni galuega a fanau, na o le faatupulaia o le urban seat lea o le a fai. Masalo po o le a faaopoopo i le isi faiga palota o le a sosoo mai a o le isi atu i tua o le a faaopoopo foi se isi lima afe ma maumau ai i Apia ma omai e leai ni galuega. Ae talitonu le agaga ma le faamoemoe i lenei Tulafono Tau Faaofi, a lelei le Komiti lea latou te faafoea ma vaavaaia ma monitor lelei lava, e talitonu e tele mea e mafai ona fai. E tai lima foi tausaga ma review.

FOFOGA FETALAI: Malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e faamalie atu lava i le sui usufono ona o le saunoaga taua e faafoliga ai foi lele e pei e tuulafoaiina Fagaloa. O le mea moni lava e le faigofie le itumalo ona o le mauga ma e le taugofie foi galuega tetele e mafai ona faatino aemaise se fuafuaga foi lea e tai se auala galue i luga i le tumutumu mauga ona o le gaoa. Ae taua e faatupu manatu. Na ona ou faapea atu, o le tatou atunuu, e i ai le mea lea e tupu, e tai pei lava o kamupani mai fafo, e omai lava feoai, feoai, feoai, omai ma latou foi faatupu manatu i le Malo, faapea mai, manaia lava le mea lea, aemaisela o lea foi sa saunoa nisi e taua tele mo Savaii, i le tataua ona atianae foi Savaii ona o le tele o atinae lea lava e i Upolu, ona o le tulaga lava ia lau Afioga i le Fofoga Fetalai, o mea nei o pisinisi o le latou lava lea anava o le taumafai ina ia faalaitiiti le tau ia maua se tupe mauia e mafai ai ona faaauau, ae le uma le faiaso a le Atua e i ai lava le taimi ma le aso e faapena ona faasalalau atu ai i Savaii faapea foi ma Fagaloa. Aua e fai foi le taumafaiga a le Malo, a o le iuga faaii lava e faalagolago ia i latou o le aufaipisinisi mai fafo o lea e agai tonu i ai le Tulafono Tau Faaofi lenei ina ia faatosina mai. Ae tau ina ou faapea atu, o la e i lou potu nei le ata manaia lava o le isi foi faatupu manatu a isi foi kamupani inisinia tetele mai fafo o lo o faatupu manatu ma ii le atinae o Fagaloa ona o le maoae o lona taulaga, e faigofie ona afea e vaa, atonu o le tali foi lena i nisi o kamupani ia i le lumanai, aemaise o le fiafia o tagata e asiasi maimoa. O la e la e taoto i lou potu ata tetele lava o latou foi faatupu manatu e mafai ai ona tanu le auala, ma o le vaega aupito sili ona faigofie ona tanu o lalo tonu ifo lava o le mafa, le mea lea e tutu ai pou moli. O lau vaai foi pei na o le maila le mamao, ae o lona uiga, o le mea taua lava, o le i ai o le manatu. A i ai loa se manatu, o le isi mea e sosoo ai o le faatino. O lona uiga, o lea foi la e taoto lena fuafuaga mo le agai i luma ae o le mea taua o lea ua i ai le faatupu manatu, ma e ono tilotilo foi le Malo i auala eseese, e alu alu le taimi lenei, o lo o taumafai lava le Malo e uunai latou Faalapotopotoga mai fafo e faatupe a tatou atinae i tulaga o grants. Pe alu alu tei ua maua se grant ona faatino ai foi lea o lona faamoemoe, ae ou te faamalie atu ona o lea ua agai tonu mai le sui usufono i le tulaga o auala, o le itu lena e faigata tele o le itumalo ona o le mauga e le gata i le aeae i luga toe ifoifo i lalo, a o le mamao foi o fesootaiga agai atu i Uafato, ae le uma le faiaso o le Atua. A o le mea sili o lea ua i ai isi faatupu manatu mai i le Malo, e le uma le faiaso, tatou tatalo i le faagasologa i luma i le lava tapena foi o le tatou Malo, aua o mea uma, e alu alu lava ae faalagolago i le tulaga tau tupe.

FOFOGA FETALAI: Tulai mai le sui usufono mamalu e faaauau mai le saunoaga.

Afioga TIALAVEA FEA TIONISIO SEIGAFOLAVA: Faafetai i lau Afioga i le Palemia mo le faauilavea i le manatu foi o le itumalo. O le agaga na tau ai auala galue o Faleapuna e tasi lava le auala galue sa i ai, ae pei o le auala lena sa logo atu ai, e mafai ona faaauala galue le aualatele, o lea la ua amata, o lea ua fai le lua kilomita o le auala e alu i Uafato, e momoli atu ai le faafetai i le Minisita. E le uma le faiaso o le Alii. O le agaga foi lena pei o le saunoaga a se tasi o sui usufono i le aso ananafi, e lima lava tausaga e omai ai e fai fale e tutu a uma foi iloilo atu e le Komiti ua le lelei le latou....pe a uma le lima tausaga iloilo i le Tulafono o le Tusifolau 2008 e iloilo atu ai i le lima tausaga, a o i fafo a o la e ua tutu fale. A o le agaga ia maua ni investors se toatele e omai i totonu o Samoa ina ia mafai ona faataunuu, aua e leai lava se isi o tatou sui usufono e le o manao e fai se mea lelei mo lona itumalo. Na pau lea o le auala e mafai ona fai i ai, ia maua tupe e fesoasoani i le paketi a le Malo mai lea tausaga i lea tausaga, aemaise Ofisa Sili o Pulega ma Pule Sili o Matagaluga ma Faalapotopotoga a le Malo, o latou ia o lo o faatinoina galuga, a lava le seleni, e faigofie foi ona fai a latou galuga ma faataunuu, ae a le lava, e faigata foi. A o le agaga o lenei Tulafono Tau Faaofi lau Afioga i le Fofoga Fetalai, e lagolagoina e lou itumalo. Faafetai.

FOFOGA FETALAI: Malo faafetai saunoa i le sui usufono mamalu. Ia, o le a felafuai la aua o lea ua... Tulai mai Toeolesulusulu, le sui usufono mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER (Aana Alofi Nu.3): Faafetai lau Afioga i le Fofoga Fetalai mo le avanoa. E faatalofa atu foi i le mamalu o le Maota aemaise le paia ma le mamalu o le tatou atunuu o lo o faafogafoga tapuai mai i faiva o le Palemene nei.

Lau Afioga i le Fofoga Fetalai, o le a taumafai atu foi se tuualalo e uiga i lenei Tulafono Tau Faaofi ua tuuina mai. Lau Afioga i le Fofoga Fetalai, o le a ou taumafai e le gata o le faamalamalamaina e le Sui Palemia, aemaise foi le Palemia ma nisi o i latou sa tau faamalamalamaina le Tulafono Tau Faaofi, o lau ootoga i le auga o le Tulafono Tau Faaofi ou te faavasegaina i vaega e tolu. Muamua, o le attract ina mai lea o foreign investors i totonu o Samoa.

Lua, ina ia mafai ona maua ni galuga mo tatou tagatanuu. Ma le tolu, ia mafai ona faateleina ai ala revenue a le tatou Malo e ala mai tax ma nisi foi o faamanuiaga. O le ala tonu lea lau Afioga e tau aloalovao ai foi se manatu ma se tuualalo. O le auga o se mafaufauga po o se manatu lau Afioga, muamua o le fautuaga ia seu le manu ae tagai i le galu. Aisea lau Afioga? E moni o le tatou faanaunautiga ina ia maua atinae ma maua se lumanai manuia o le tatou atunuu, peitai ane, e ao foi ona tatou seu silasila i o tatou eleele, o tatou atinae ma nisi o vaega. O le a amata mai la sau faamatalaga lau Afioga i le Fofoga Fetalai i tagatanuu Samoa. Muamua, pei ona i ai i faamaumauga e silia ma le 180,000 tagata o lo o nonofo i totonu o Samoa. O faamaumauga mai Niu Sila, e silia ma le 150,000 afe tagata Samoa i totonu o Amerika, silia ma le 150,000 tagata Samoa o lo o identify as tagata Samoa. O totonu o Ausetalia ua silia ma le 40,000 i le 60,000 tagata o lo o identify latou as

Samoans. I le aotelega lea, e silia ma le 500,000 i le 600,000 tagata i le taimi nei ua taua pe identify o tagata Samoa. E ui la na o le \$180,000 o lo o nonofo i totonu o Samoa, a o le 500,000 i le 500,000 lenei o tagata e aia ma au uma mai i totonu o Samoa.

I lenei taimi, o lo o i ai foi nisi o i latou o lo o fesoasoani mai i atinae i totonu o le tatou atunuu. Lua lau Afioga, o tatou eleele. I se faataatiaga o i ai nei pe 1,097 sikuea mai la pe silia i le 700,000 eka o eleele lo o i totonu o Samoa, aveese mai lea pe a ma se 30 i le 40 pasene e le o mafai ona galueaiina ona o le lava o nisi o auvae mauga po o nisi o eleele e le o mafai ona galueaiina i le maualuluga, aveese mai lea le 80pasene o lo o i totonu o eleele tau Samoa po o customary land, o le aofaiga o eleele i totonu pei ona faasino i ai le Tulafono Tau Faaofi, le 15pasene lea o lo o i lalo o le Malo, pe tusa ma le 100,000 eka. Ia, ma le 4pasene o lo o i lalo o le freehold pe a ma se 24,000 eka.

O le uiga o le faamatalaga lau Afioga i le Fofoga Fetalai, a aveese e le o mafai ona faaaogaina, pe a na o se 30,000 eleele e le o mafai ona galueaiina e tagata Samoa pe tusa lea ma se 60,000 eka, faaopopo le silia i le 100,000 eka o lo o galueaiina i atinae a le Malo lea o lo o faasoasoina i nisi o le atunuu ua faaaogaina i a latou galuega ma atinae, o se eleele itiiti o lo o totoe e mafai ona fai ai nei atinae. Peitai ane foi lau Afioga i le Fofoga Fetalai, e eseese foi eleele o afioaga ma alaafaga, e i ai nisi o alaafaga ma afioaga o tatou itumalo o le atunuu o lo o manuia ona e itiiti lava o latou eleele o lo o ave e le Malo. O itumalo la ia o lo o mafai ona i ai le tuamaota ma tualaoa e tua i ai le alualu i luma o le faitauaofai o sea afioaga ma sea alaafaga. Peitai ane o nisi o afioaga ma alaafaga ma itumalo, mo se faataitaiga; o lou uso nei i Faleata Sisifo. O Vaitele o lea e saunoa mai, e le o i ai se customary land i totonu o Vaitele, o le freehold land. O le population as it grows, na pau le mea e depend i ai latou, o eleele faatau, either freehold po o government plan pe a i ai le option i luma. O nisi o itumalo i le atu Tuamasaga ma Aana, o le tele o eleele o lo o i lalo o le Malo, ona o tuutuuga sa feagai ai i tausaga ua tuanai. O nei foi afioaga a o faasolosolo ina faatupulaia le faitau aofai, e manaomia ni eleele. Mo se faataitaiga, o le afioaga o lou itumalo, ou te iloa e silia ma le afa o le faitauaofai o lou itumalo o lo o i fafo. E i ai le taimi e toe fia foi mai ai ia tagata e atiae o latou aiga ua maua manuia, ae afai e ao ona tagatagai i ai ina ia mafai ona maua pea eleele o tagata Samoa mo le taimi nei, ae mo le lumanai foi.

Lau Afioga, ona ou see mai lea i le faanaunautaiga e faia investment mo foreign companies. Ou te faaaogaina lau Afioga i le Fofoga Fetalai le atunuu o Fiti i le vaitaimi o le 1970 savali mai i le 1980, sa latou uunaia le invest, le ave o incentives i kamupani mai fafo. I le taimi nei, o le tele o faletalimalo o lo o i ai i Fiti, e own uma e kamupani mai fafo. Peitai ane o tagatanuu o Fiti o lo o i ai ua lelei le malamalama ma ono mafai ona maua se seleni e fai ai a latou atinae, a ua le mafai ona faatino e ia mataaga po o vaega lelei.

I le liliu mai i le tatou atunuu lau Afioga i le Fofoga Fetalai, ou te faaaogaina le faataitaiga i Lalomanu ma Manase. A na fai e fai le Tulafono faapenei po o promotion foreign investors i tausaga ua tuanai, penei ua tutu ai ni hotel tetele i i. Peitai ane, ua maua foi nai seleni ma maua le tomai o aiga o lo o i ia vaega o le atunuu ua mafai ona atiae ai lava e i latou, amata mai i si tamai beach fale, faasolosolo ane. O le taimi nei, o lenei afioaga o se tasi lea o turisi tele i totonu o le tatou atunuu ma o se vaega lea o lo o tele ina autovaa

mai ai tagata tafafao maimoa mai, ae o lo o own e tagata Samoa, o fanua o tagata faigaluega, o le 100pasene o le tupe o lo o nofo i totonu o Samoa. O foreign investors i fafo e tele ina ave foi a latou seleni i fafo.

FOFOGA FETALAI: Malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea e fia faasao. O le agaga tonu lena na faatu ai le tatou UTOS ina ia mafai ona step in le UTOS, o lo o avatu i ai teugatupe a le atunuu ina ia mafai ai ona fai ni sea i le tele o pisinisi tetele nei. O le mafuaaga lena. O le mafaufauga lea, e le fou i le Malo, e amata mai lava i le taimi o Mataafa, ina ua fai le faatosina lea, ina ia faatosina mai ni kamupani tetele mai fafo, o le manatu tonu lava lea na i ai foi i lena taimi, e tatau ona tilotilo le Malo i ni auala e mafai ai e o tatou tagata ona umia sea i kamupani tetele nei pe a aumai ni kamupani tetele. O le mea na tupu, o lea na ou tau atua faatosina ia na i ai, na o le pau lava kamupani tetele ia mai fafo, na o le tolu pe lava. Ua galo ia te au le kamupani pia ma le Yazaki faapea foi ma le kamupani la lea a le La Mana lea e fai nei. A o manatu sa i ai i lena taimi, e faapena uma lava, tafefe o le a omai ma pulea le atunuu. O lea la na faatu ai le UTOS ina ua oo ina o le a faamatuu atu i tua le tatou telefoni le SamoaTel, ona tupu ae ai lea o le manatu i le Kapeneta, e tatau lava ona fai le mea lea, ona o le matau lea e matau ai i le faamatuu atu o aseta nei a le Malo, e foliga mai o lo o lilifa lava i le itu lena, na o latou o lo o maua mea. O lea la na ala ai ona faatu le UTOS ma o lo o alualu lelei pea le latou galuega. O le vaiaso le la na oo ane ai e avane le tupe latalata i le afa miliona e fesoasoani ai i le paketi a le Malo e faatupe ai galuega a le tatou Malo. O lea la ua saunoa le sui usufono, e le fou manatu ia e te aumaia, o le ala foi lena na ala ai ona gaoioi le Kapeneta talu ai i le faatu o le UTOS ina ia puipuia ai le itu lea mo tatou tagata, ma ou te manatua i le taimi sa ou taitaifono ai i le isi taimi i le Vailima, e le toatele ni o tatou tagata auliuli o lea e umia sea i totonu o le Faalapotopotoga lea po o le kamupani tele lenei. Ua leai la le kamupani ua toe taaifala a ua faatau ona sea i le isi kamupani tele i Ausetalai, a o le itu o lea e faamanuiaina ai le tatou atunuu, o le faasaoina o ana tupe teu e tau aumai ai ana pia i fafo, o lea lava ua gaosi i totonu o le tatou atunuu, ma le anoano o tagata faigaluega la e galulue ai, ina ne i te i ua vaai itutasi, ae galo le itu lena, le anoano o tagata faigaluega la e galulue ai ma le tupe lea e maua mai nei, aumai faagaoioi ai le tatou Malo i ana suegatupe. O le sau foi o le Yazaki iinei, se i ou avatu pea le faataitaiga, e laitiiti lava le eleele masalo na o le fa eka le tele. Afai la e fanau mai totonu i i ni Yazaki se sefulu, ona fa lea faatele i le sefulu, fasefulu eka. Na pau lava lena o le mea e alu ai, a o lenei tolaulauga, oka oka oka, se ua matua maoae lenei mea e te aumaia e faafefe ai tagata, o lea lava e pele le tou pele lualua o le faafefe. Se e leai se isi o toe fefe i nei mea. Lau Afioga i le Fofoga Fetalai, o le faasaoga lena o lenei faafefe matua tele, o lea na amata mai lava analeila o le a oo lava i le taimi e fai ai le tatou ti o lea lava e alu.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai....

FOFOGA FETALAI: O le a avatu muamua le avanoa i le Minisita mo Punaoa Faanatura ma le Siosiomaga. Tulai mai Faamoetaulao.

Tofa Hon Faamoetaulao Lealaiauloto Ulaitino Faale Tumaalii: Faafetai i lau Afioga i le Fofoga Fetalai. Leai leaga o lea na taua foi le mataupu lea i le lauga a le sui usufono mamalu mo Faasaleleaga Nu.2 ananafi i le tulaga foi lea o le faatau o fanua o le Malo, aua o le Tulafono Tau Faaofi lea o lea e agai tonu lava i le Tulafono a le Malo, ma e pei o le tulaga lea e i ai, aua e 80pasene lava fanua faaleaganuu ae 15 i le 17pasene fanua o le Malo, a o le isi 3 i le 5 pasene, o fanua na umia saoloto. E pei ona ou taua e faamanatu atu i le sui usufono, e le o toe mafai ona faatau fanua o le Malo i le tulaga ua i ai, ona o le Tulafono Tau Faaofi lea pei ona aumai, lea na saunoa tonu ai lava le Palemia, e eseese lisi, na o le lisiina o fanua o le Malo. E eseese fuafua i pisinisi. Afai o le pisinisi o mea tau faifaatoaga ma le tulaga foi lea o le folesi, e manaomia la le matai, e mafai ai ona lisiina le tulaga lea. Ae a faapea foi lele i le tulaga o fanua ia o le Malo, ia o le tulaga lena, o lea e lisi i pisinisi foi nei pei la o tourism ma tulaga ia o industrial purposes. E laiti la fasi fanua ia o le tele lava o le lima i le sefulu eka e manaomia e nei pisinisi, e pei foi o le La Mana o lea e faaoga ai nei. E pei o lou tulai atu lena e faamalamalama atu le tulaga lena ma faamanatu atu, e le o mafai ona faatauina fanua o le Malo.

FOFOGA FETALAI: Ia, e manatu ona o lea ua tatou taunuu i le tatou taimi malolo, o le a avatu le avanoa... e faamalulu atu i le sui usufono mamalu, o lea ua tolu minute e tea ai le tatou taimi malolo, o le a avatu le avanoa, ua tau sau foi le fefe.

Ia, e faamanatu atu le tatou Fono, malilie ona o le aso lenei o le aso puupuu, malilie e vave agai mai totonu pe a uma ona taumafa le ti, o lea lava e tuu talaloa atu ona o le manatu e tatau pea ona palega auau le taliga o le tou sua, ae tatalo atu ona o le aso le aso puupuu, e tatau lava ona vave mai i totonu e faaauau le tatou galuega.

E faasilasila atu o le a faataatia ese Taulumaga a le Fono Aoa mo lana malologa masani o le taeao.

Na faataatia ese Taulumaga a le Fono Aoa mo lana malologa masani i le itula e 10:33 i le taeao ma toe faaauau i le itula e 11:06 i le taeao.

FOFOGA FETALAI: Ou te faasilasila atu ua toe amataliaina nei Taulumaga a le Fono Aoa Faitulafono.

Ou te faamalo atu ona o lea ua tatou taunuu i le vaega lona lua o le tatou Galuega, ou te lagona ua maea le taliga o le sua ma le tauteaga i lenei taeao, e tasi lava le lagona ia maua lo outou faasiliga malosi. E momoli atu ai le faafetai ma le faamalo i le au gasese aemaise o le tapenaina o le vai vevela ma tulaga uma e masani ai aua le tausiga o lo tatou soifua maloloina.

Ou te manatu ona o lenei aso o le tatou aso puupuu a o lo o i ai pea le faamoemoe mo le tauaveina o le tatou Galuega mo le faatinoina ma le atoatoa o le polokalame ua faataatia. Ona ou manatu ai lea ia tulai mai lau Afioga i le Palemia.

LAFO MO LE FAATAATIAESE O TULAFONO TUMAU

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te tulai atu ma le ava tele ina ia faatu le lafo, *Ina ia faataatia ese le Tulafono Tumau 31(1), ina ia avanoa ai le faaauau o felafolafoaiga seia maea lelei lava le faitauga faalua o lenei Tulafono Tau Faaofi, po o le oo atu lava i le itula e 13 nanei i le po ae ia maea lelei ma saausi le faaaliga o finagalo.*

A o le i aumaia le Fesili lau Afioga i le Fofoga Fetalai, ou te fia faia sina upu puupuu lava aua le faamoemoe i le uma ai nei o le tatou Fonotaga i le masina lenei o Fepuari ona e anoanoai galuega a le Malo e fia fai foi, o lo o faatalitali mai ai le tatou atunuu. O nisi o ia galuega e afua atu lava i lenei Maota aemaise o le anoano o talosaga a sui usufono ua le masino le faaosesa atu i Minisita o le Kapeneta. E toe tolu foi vaiaso ona tatou toe Fono foi lea, ua ese foi le mea lea ua tulai mai, ua na o le fia Fono, fia Fono, ona ua i ai le suiga o le tatou Maota ua i ai nei, ua ese foi lona siosiomaga. Ua ou vaai atu i laufofoga fiafia o sui usufono, ua outou le toe tulemomoe ai ona ua lagona lelei atu lava tala a lea Itu o le Maota e oo foi i lenei itu o le Maota, i mulumuluga veve masani, e a le Malo lava e tau faamatala atu le aoga ma tulaga lelei o le Tulafono Tau Faaofi, ae le uma lava lo tatou uiga masani o le mulu lava, mulu lava, o le au maalili ma le au matafefefe ua o tau faoso ma faasenenui ma upu a le toeaia matua le Afioga Aeau, o lenei lava ua ou lagona lelei atu.

Lau Afioga i le Fofoga Fetalai, ou te tulai atu ai e fai atu se tuualalo i le tatou Maota, e faamaea nei a tatou felafolafoaiga i le Tulafono Tau Faaofi o lo o talanoaina nei ona faasee loa lea i le Komiti. E tele lava mau avanoa o tatou sui usufono aemaise o le atunuu lautele e autovaa ma faaalua atili ai o latou finagalo. Ou te iloa lelei o le tele o sui usufono o lo o leotetele i lenei Maota, e seasea lava ona o i le Komiti e tulituliloa o latou finagalo faaalua. A toe foi mai le Tulafono Tau Faaofi mai le Komiti, e toe maua foi nisi avanoa se tele e toe sausaunoa ai i le Iloiloga auiliili. O lona uiga e anoanoai avanoa e faaalua ai finagalo o sui usufono o le Maota aemaise o lenei ua fa aso o tatou felafolafoai pea i lenei Tulafono Tau Faaofi. O le mafuaaga o le tuualalo lau Afioga i le Fofoga Fetalai, e tele galuega a le Malo e tataua ona faatino e moomia ai le Kapeneta aemaise o lo o fausasaga foi galuega a le Komiti e tataua ona faatino, ua lata foi le taimi e muta ai nei matuapu. Ou te mataua atu i le faasologa o le Pepa o Galuega e 12 Tulafono o lo o i ai ae 67 Pepa a le Palemene e tataua ona lipoti mai ai Komiti. E le o ni fuainumera laiti nei fuainumera pe a fua i le taimi lenei o le tausaga mulimuli o le tatou Paeaiga. O nisi o nei Tulafono e faasino lava i le tausaga 2013 na tuuina atu ai i le Komiti a o lea ua lua tausaga 2015 e le i oo mai lava. O le tala lea e tau fai atu, e lelei ona lava le avanoa e faatino ai galuega a o tatou Komiti. O isi Komiti e tai 20 pepa a le Palemene e tataua ona lipoti mai. Ia manatua lelei e le tatou Palemene le tatou Fonotaga ua mavae atu, na ou taumafai atu ai lava e faapea foi au Minisita, e ui i le tele o Tali a le Malo ae sa taumafai lava e tolaulau ina ia manino e tusa o Lipoti a Komiti, o le a le mea na oo i ai? E le afa Tali a ua faatolu, faafa ona tutulai mai sui usufono e pasia uma loa Tali a

le Malo o lo o totoe ua lelavava, a o i latou lava foi nei na faasalalau o le Malo e a ma a.

Lau Afioga i le Fofoga Fetalai, e tele tupe a le Malo ua alu i le tapenaina ma le lolomiina o Lipoti faale tausaga, e tele foi taimi o le Kapeneta na iloilo ai na Lipoti a o le i oo mai i le Maota, o lea o lo o faatali pea le Maota i Komiti ma le anoano o le mau Lipoti o lo o fausasaga ai, o lo o faatalitali atu pea le Palemene.

Lau Afioga i le Fofoga Fetalai, o lena e te silafia e leai se Komiti e fono i le aoauli, na o taeao lava, ua taoto foi aulape mo Taitaifono ma sui o Komiti e faatupulaia le le auai i fonotaga a le Komiti. A silasila ua toeitiiti 70 le aofai o Pepa a le Palemene ia o lo o nofonofo ma a tatou Komiti o le Palemene o lo o faatalitali atu pea i ai le Palemene lenei. E i ai se faamoemoe o le Malo e faatu le lafo i le Fonotaga ia Mati e faaauau ai Pepa uma a le Palemene i o lo o i le Komiti i lena Paeaiga. Ae tuu atu ia lenei tolu vaiaso e faamaea ai galuega a le Komiti i Pepa a le Palemene o lo o latou umia pea le tagofia o Pepa ua mafai ona tagofia e le Komiti, ona pau lena o Pepa e mafai ona tali mai ai le Malo, a o isi Pepa uma o le a lafoai.

Lau Afioga i le Fofoga Fetalai, o aso la sa matua fefefe tagata e o atu mamao i le sami ina ia tutumau ai i le mea e mafai ona vaavaai mai ai i atumauga, fai a latou e mafolafola le lalolagi i te i ua pau i fafo atu o le to i tala atu o le tuaoi o le sami ma le lagi. O le uiga lena o le lototele o le tagata e gata le malosi ma le talitonuga i le mea e gata mai ai le vaai ma le mafaufau. O le a le taunuuga pe a na le lototele foi si nei toeaina o Columbus meamanu e le iloa e le toatele e i ai se Amerika. Ua leva ona o mai o tatou tuua i Samoa nei ona o le lototele ma le saili malo, o le a le mafuaaga? O le tali, o le lototele lea e saili manuia mo fanau ina ia aua nei ola falolo tupulaga lalovaoa o Samoa. O le faavae papa lena o le Malo o Samoa e taitaiina ai le Faigamalo lenei e savavali punouai mo le lumanai manuia o o tatou tagata. E faatuatua i le Atua Soifua Samoa, na te le tuulafoaaina ai i tatou ma fesoasoani mai i o tatou faamoemoeaga ae moomia le faatuatua. O le faatuatua lea e fai mai Afioga a lo tatou Atua....

Afioga Hon Palusalue Faapo II: Lau Afioga i le Fofoga Fetalai o le mea e fia faamalamalama.

FOFOGA FETALAI: E uma ona avatu lea o le faamalamalama.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: A o le faatuatua o le faalagolago lea i mea ua faamoemoe i ai o le mautinoa lea o mea e le o vaai, o le a ou le tau atua le Tusi o Eperu faitalia outou. O le faatuatua foi lea na fetalai ai lo tatou Faaola, afai e tusa lo outou faatuatua ma le fua o le sinapi e fai atu outou i lena mauga, alu atu ia oe i lena mea ona alu atu ai lea, e leai foi se mea tou te le mafaia. O upu e faataua, lau Afioga i le Fofoga Fetalai, lau Afioga i le Taitai o le Itu Agai ma lenei Maota, e leai se mea tou te le mafaia pea faatuatua i le Atua, o le faatuatua lena e savavali ai ma le lototele le Faigamalo lenei ina ia manuia Samoa. E tele mea sa faatulai mai e lenei Faigamalo i mau atinae e tele, sa tetee i ai sui usufono o lenei Maota ona o le matafefefe a ua a nei? O lea lava e agai i luma Samoa, e le mafai ai ona nofoai ...

Afioga Hon Palusalue Faapo II: Lau Afioga i le Fofoga Fetalai, o se Saunoaga faa-Minisita?

FOFOGA FETALAI: E leai.

Afioga Hon Palusalue Faapo II: Ua toe fai foi le lauga sa fai ananafi.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: E le mafai ai ona nofoai lenei Faigamalo e fai mea e lelei ma manuia ai Samoa, pe upuia ma faasalalau e o tatou tagata i le lalolagi tala sese i le Faigamalo, e le nofoai pe gase ai le saili manuia o le Malo mo Samoa ma ona tagata.

Lau Afioga i le Fofoga Fetalai, o upu na e faavae ai le lafo ua tuuina atu atonu o le a atili malamalama ai foi le Taitai o le Itu Agai i le mea e igoa o le strategy ina ia atili malamalama ai i mea e talanoaina i totonu o lenei Maota.

O le lafo lena lau Afioga i le Fofoga Fetalai.

FOFOGA FETALAI: O lea ua tulai mai le Sui Taitai o le Itu Agai e faaluaina le lafo.

Afioga Hon Aeau Peniamina Leavaiseeta (Falealupo): Lau Afioga i le Fofoga Fetalai, ua ou tulai atu a o le i tuuina mai le Fesili. Faamolemole lava pe mafai ona fai sina tali leaga na taua lou igoa. Lau Afioga i le Fofoga Fetalai ma le pau o le Maotaga i lenei taeao, ou te tulai atu lava i le agaga faaaloalo ma le ava e tatau ai i lenei itu aso aemaise o le tulaga o tualumaga o la tatou Fonotaga. Ou te talitonu o lo o faafofoga ma tapuai le Atunuu, aisea? E i ai le mafuaaga, e ola uma TV ma leitio a le atunuu e taua tele le mataupu o lo o soalaupuleina e le Fono Aoaofaitulafono, aisea? E aafia tagata uma o le atunuu, e le gata nei a o ona tua, o se taimi o i luma 30 tausaga silasila la lau Afioga. O le mea lea e fai atu ai...

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le lafo lea ua faatu atu e leai lava se mea e taofia ai le aia tatau, e leai se mea o taofia ai le aia tatau. Ou te leiloa po o le a le mea lea e tulai mai ai le Sui Taitai o le Itu Agai, a o le lafo ina ia faaauau le tatou galuega seia maea felafolafoaiga o fai nei, se i saausi. Ou te le iloa po o le a le mea lea e tulai mai ai, ua uma foi ona ou faataatia manino atu e 70 Lipoti ma Tulafono – o Pepa a le Palemene o lo o faatalitali ai le Palemene a ua le o toe umi tatou taunuu ia Mati ona fai lea o le tatou Fonotaga.

Lau Afioga i le Fofoga Fetalai, o le puupuu ia o le lafo, e le o se mea e taofia ai le aia tatau.

Afioga Hon Aeau Peniamina Leavaiseeta: Malo o lea ua maua atu le lafo, e leaga e tele le lafo ae ogaoga.

FOFOGA FETALAI: Malie lau Afioga i le Sui Taitai o le Itu Agai ua maua lelei lou finagalo.

Afioga Aeau Peniamina Leavaiseeta: E leai e le i maua mai.

FOFOGA FETALAI: O lea ua ou maua lou finagalo o lou lagolagoina o le tulaga o lea e i ai le tatou lafo lea sa faatuina atu.

Afioga Hon Aeau Peniamina Leavaiseeta: E leai faamolemole lau Afioga, leaga o lea o le a tuli tamoe galuega a le Palemene, ia logona e le atunuu pau a lena...

FOFOGA FETALAI: O lea ua maua atu lou finagalo.

Susuga Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, sei faasao atu le mea lea e le o tuli tamoe, ua fa aso o tatou talanoaina le Tulafono Tau Faaofi, vaai i le Tala o le Tupe umi, e tolu aso i nisi taimi, fa aso a o lea ua fa aso o tatou alu lava ma tele avanoa o lo o faatalanoaina, e le mafai ona uunaia tagata e le fia lauga. O lau maitau foi o lea lava e saausi saunoaga a sui usufono, ao lo o i ai foi le paoa ia te oe i lalo o le tatou Tulafono, afai e toe taua e le isi sui usufono mea ua uma ona taua e le isi sui usufono e le tatau ona toe faatagaina se lauga faapena i totonu.

Ou te manatua i le taimi sa Fofoga Fetalai ai Aeau, o lana pese lava lea sa pese, afai na lauga muamua ai le isi sui usufono, o le a le mea o le a e toe lauga mai ai? O lau maitau la ua repeatitive.....

Afioga Hon Aeau Peniamina Leavaiseeta: O le pese sa fai e Aeau i le taimi lena e sa ona tuli tamoe se mea e afaina ai le atunuu

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, sa tuli tamoe foi e Aeau ia Fonotaga, sa tuli tamoe, aua le galo ia te oe o au gaoioiga uma lava sa fai sa ou matauina lelei, e le galo ia te au, pau lava lea o le Fofoga Fetalai na nanu ma tuli i fafo le Tama Aiga sa i totonu, a, e sao au? Ia vaai i ai i le tuliga o le Tama Aiga sa i totonu sa Taitai o le Itu Agai ae nanu vale ma tuli i fafo? Aisea? E ona ma tauave le Fonotaga.

FOFOGA FETALAI: E manatu ua taatia i lagotonu lenei mataupu.

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Malie lau Afioga i le Taitai o le Itu Agai o lea se i fai atu le tala lea a le Nofoa. E manatu o lea ua malamalama ma taatia i lagotonu le finagalo ua faaalua mai e le sui usufono mamalu, o lea foi ua faafofoga ma le manino le Maota i le folasaga a le tatou Malo, tasi ia ae foi lo outou finagalo. Silasila foi, o au lea e ona le mau lea na avatu nei, ae le i faia le tatou malologa o lea na ou augani atu, o au e ona le mau lea e taumafai e tulituli a tatou galuega e taua le taimi, ioe, o le agaga lena na ou tatalo atu ai, a maea loa ona tali le malu taeao, ona vave lea ona agai mai i totonu se i faagasolo a tatou galuega, peitai a tatou mataitu ma agai i le amataga o le tatou galuega mai le Aso Lua e tau mai lava i le aso, o lenei lava e tatala atu avanoa, o lea foi e matau, ua tatou asa faafia ogasami ua uma ona asa, ae le mafai o lea e tuu atu lava le avanoa i sui usufono mamalu se i logona finagalo e fia faaalua. O lea ua ou manatu ai, faafetai i le Taitai o le Malo ua tali lou

manao i le tulaga se i papaaveloa le tatou galuega, na ou vina mai lava i le mea lea i le Aso Gafua, peitai sa saunoa mai le Taitai o le Malo, taatia pea se i saausi finagalo, o lea ua tatou matau nei i le taeao lenei, ia o le mea lava e tasi lea tatou te i ai, ae le mafai ai ona taotaomia ai o outou finagalo, e tataua ona faaalua o outou lagona. O le itu taua la lea ua taatia mai o lea ua faatu le lafo, ia tatou papaaveloa laia, e lelei foi le faafofoga mai o le atunuu, e tatou te motusia loa ia Aso Toonai Aso Sa, ona toe omai foi lea pei ua toe amata uma lauga, a o le aoga o le taatiaga i le taimi lenei, o lea ua taatia i lagotonu, o lea ua see lo tatou vaa, tatou papaaveloa ai laia i le autafeloa lea, aua e tatou te toe omai loa foi, tatou toe amata i le auvili, ona faigata foi lea o le tatou galuega.

O lea ua faatuina le lafo, o e ua faaluaina.

Faaluaina e le Sui Palemia, Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioga ma Agafesootai.

Afioga Hon Palusalua Faapo II: Lau Afioga i le Fofoga Fetalai o se mea lava lea e fia faamalamalama.

FOFOGA FETALAI: O lea ua malamalama le mataupu le Taitai o le Itu Agai.

Afioga Hon Palusalua Faapo II: O le mea muamua e ala ona toso Fono, ona o le Saunoaga Faaminista ua oso faafuasei. Lua, o le strategy, o i ai i le Tulafono Tumau ia strategy ia e fai?

FOFOGA FETALAI: Se o mea uma na e i lalo o faiga faavae i totonu o le tatou Palemene.

Afioga Hon Palusalua Faapo II: E leai ni faiga faavae e faaoga ai ni strategy, o le strategy, o lea foi ua toe toso le Fono.....ia se i vaai la i ai i.....

FOFOGA FETALAI: Ne i tatou matau eseese i lena tulaga.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai na o se mea e fia faasao. E sili ona ou fautuaina le Taitai o le Itu Agai e faitau au Tulafono Tumau, ona e silasila lea i lalo o le vaega lena mo mea o Lauga Faaminisita, e tu loa so o se Minisita e talosaga mo se mataupu e lauga Faaminisita ai, e saoloto lava, silasila i Tulafono Tumau. E le o ni strategy mea na, se aua le aumaia tatou ulaga foi ia i mea o....o tatou mea ia e fai lava faatamalii, ua iloa foi mo fonotaga a Samoa, e fai talie, ae na o oe lava lea e fai ma e faauu, e te fiu e te faauu ae matou te talie atu pea, faitalia ia oe ma e faauu, ae le uma le matou talitalie leaga o aga ia o isi.....o aga ia faafaleupolu, o le manaia o felafolafoaiga o lena foi e ataata mai ia le sui usufono mo Falealupo, o la e io lelei mai lava i le mea lea ou te fai atu ai.

Afioga Hon Aea Peniamina Leavaseeta: Lau Afioga i le Fofoga Fetalai, se i faasao atu lava le saunoaga lea. O le mea lea o le Ministerial Statement, e

sao, ae pau lava le mea e sisi ai, o le faaoga o le Ministerial Statment, take it instead...o lou manatu la lea e fai, ae le.....se Tulafono,.....faaali sou manatu ona e pasese ai lea, e le fetai, ae tatou alu ai faapea.

FOFOGA FETALAI: Ia malilie ia, taatia maia lau galuega o lea ou te faasoasoaa atua, ae malie afenoa foi o outou finagalo, e le tau faapulapula atu o lena e i ina le tofa ma le faautautaga i sui usufono mamalu o le tatou Maota.

Na faamaonia le lafo ma tulai ai Taulumaga o le a faaauau seia maea le faitauga faalua o le Tulafono Tau Faaofi o Tulaga o Tagatanuu i le Teufaafigaluegaina o Tupe Mai Fafu 2014.

FOFOGA FETALAI: Ia o le tatou galuega lea ua extend, o lea ua faaopopo le taimi o le itu taua lena, ia sagai ae laia ai o le tai, o le a lava le taimi o le a tatou faaogagase ai i lenei aso, o le itu taua lea o le a soo le fau ma le fau, ia tatou alu lava se i sausi lelei e leai se punitia, ua faataatia Tulafono Tumau e 20 minute o le sui usufono, ia fai fai matafai, e lelei lava le agai mai o outou fautuaga ma finagalo ia ma ni manatu e tulai atu foi le Malo e talitali atu e manino ma malamalama le faafofoga a le atunuu.

Afioga Hon Leaupepe Toleafoa Apulu Faafisi (Aana Alofi Nu. 1): Lau Afioga i le Fofoga Fetalai.....

FOFOGA FETALAI: Ia se i tulai mai se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi.

Afioga Hon Leaupepe Toleafoa Apulu Faafisi: Ia na o se faafesili atu lava, e faamalosi le tagata e fia saunoa? Aua o lea e pei e foliga o le a tiutalaloa foi lele o ai lava le sui e tataua ona lauga, a o le sui usufono foi ua talia le Teuteuga, faamalosi e saunoa pe malolo ia?

FOFOGA FETALAI: E leai, po o fea lava le mea e i ai lou finagalo e te fia saunoa, a e lagolago nofonofo.

Afioga Hon Leaupepe Toleafoa Apulu Faafisi: Ia e le umi foi la se tatou taimi, aua o lea e tele lava ina le saunoa sui usufono, faafetai.

FOFOGA FETALAI: E ala ona le faaalia le le saunoa o sui usufono ona ua i ai le itu lagolago, o le tulaga lena o lea e matau e le Nofoa.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Ia ona o lea sa tau tulai mai i le taimi a o le i faia le tatou malologa, tulai mai le sui usufono.

Tofa Lealailepule Rimoni Aiafi: Ua ou faalogologo i le saunoaga a le sui usufono lea na faatoa mavae atu nei, e pei tagata nei e le malamalama i a tatou Fonotaga, ae sa avea ma Fofoga Fetalai, a o matou o lea e malamalama lelei, faafetai.

FOFOGA FETALAI: Le sui usufono mo Aana Alofi Nu. 3? Ia malie, se i avatu le avanoa i le Sui Palemia.

Tofa Hon Fonotoe Nuafesili Pierre Laufofo: Lau Afioga i le Fofoga Fetalai, a o le i faia le tatou malologa sa i ai sina vaega sa saunoa i ai le sui usufono lea o lo o sausaunoa i le taimi nei, o vaega lea e tatau ona faasao, ae sa faamalamalama muamua ae masalo e le i maua mai e le sui usufono mamalu le amataga o le tatou Fonotaga le Tauaofiaga lenei, ona o lea sa taua mea o Mataaga po o fanua foi ia i Lalomanu ma Manase. Ia o fanua na, ou te malamalama i fanua la e i Lalomanu aua o la e i ai le fanua o si matou aiga, o fanua uma ia faaleaganuu, pei ona faamalamalama atu muamua ona o lea sa saunoa sui usufono, ana aumai le Tulafono lea i aso la, ua tutu ai ni faletalimalo tetele i o i Lalomanu ma Manase, ae o lea e manino le tatou Tulafono e le o aafia fanua faaleaganuu, o fanua faaleaganuu uma lava na o lo o i Lalomanu ma Manase, e le o aafia la i le tatou Tulafono, o la e manino lelei lava pe a e silasila i le fuaiupu 3. O le faamalamalama ma le faasao lena lau Afioga.

FOFOGA FETALAI: Tulai mai le sui usufono e faaauau le saunoaga. Tulai ai lau Afioga i le Taitai o le Itu Agai.

Afioga Hon Palusalua Faapo II: Lau Afioga ou te faasaoina le taimi o le sui usufono, ona o lea ua faalua nei ona tu i luga le Minisita mo Eleele ma Fuagafanua e faapea mai e le faataua fanua nei, o lea e manino lava i i i le Tulafono i tua i Faamatalaga o lo o fai mai ai e mafai ona faataua fanua nei a le Malo, a o lea e saunoa mai le Minisita, e leai e na o le lisi. O fea la e moni, o lau saunoaga, po o le mea lea e sau i le Tulafono? O le mea lena o lea e fia malamalama ai.

Tofa Hon Faamoetaulua Lealaiauloto Ulaitino Faale Tumaalii (Minisita mo Punaoa Faanatura ma le Siosiomaga): Se faamolemole lava e fia fesili atu po o le a le fuaiupu lea e refer i ai le....

Afioga Hon Palusalua Faapo II: O le Faamatalaga po o le Schedule i tua i le faa-Peretania; galuega ua agavaa e teufaafaigaluega ai tupe, o le vaega A lena e manino lava. E a ou te faitau atua? Lisiina ma le atinaeina o fanua o le Malo e aafia ai le faatauina mai ma le atinae o so o se fanua ua faatonuina, faatauina, o la e i tua, purchasing, o le mea lena o lea ou te tulai atu ai e faamanino.

FOFOGA FETALAI: Se i tulai mai lau Afioga i le Minisita.

Tofa Hon Faamoetaulua Lealaiauloto Ulaitino Faale Tumaalii: Lau Afioga i le Fofoga Fetalai, e pei lava ona ou faamalamalamaina atu, o le Tulafono lenei e le i pasia le Tulafono lea, o lea e talanoaina nei ae ua uma ona fai le faaiuga a le Kapeneta e le toe faataua ni fanua o le Malo, ma o lea la e sauni mai le Tulafono o le Lands, Survey and Environment 1989 e tuu i ai le faaiuga lena a le Kapeneta, a uma la ia ona toe oo mai foi lea i ai, ia e te faitaua faatasi la ma le Tulafono lea, ona manino ai lea o lea vaega, ma le faaaloalo lava.

Afioga Hon Palusalue Faapo II: Lau Afioga.....

FOFOGA FETALAI: Malie, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, masalo ua le iloa po o le lua ea masina talu ai na fai ai le iuga lea, a o le lagona la e galulue ai latou i le faatinoga o Teuteuga, na manino lava le aumaiga ananafi na tali ai, sa ou faapea ua malamalama le Taitai o le Itu Agai, ai na te le i mauaina le mea lena o la e galulue ai latou i le Teuteuina o le latou Tulafono. E faapena le mea a oo i le taimi e tapenapena ai le Tulafono ia ona ave foi lea i le Loia Sili latou te siakiina Tulafono ina ia ogatasi ma isi Tulafono ua i ai, ina ia aua ne i i ai se fetotoai.

Lau Afioga i le Fofoga Fetalai, na manino lava le faasilasilaga a le Minisita i lana Tulafono, sa ou faapea e le toe laga lea vaega.

Afioga Hon Palusalue Faapo II: Lau Afioga i le Fofoga Fetalai o se mea e fia faasao, o lea e manino le Tulafono, o lea e i totonu o le Tulafono, a o lea ua talanoaina e le Palemene mo le pasiaina, a o lea e tau puipui mai e le Afioga i le Minisita le..... O lona uiga, o le ki atoa lau Afioga i le Fofoga Fetalai, o eleele o lea o le a faatauina, tasi lea mea o lea e popole i ai, a o lea e fetotoai le Malo.

FOFOGA FETALAI: E manatu o lea ua manino, ua manino lau folasaga le Taitai o le Itu Agai, leai o lea ua manino le faamalamalamaga a le Minisita.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e le o fetotoai le Malo, o le vaega tonu lava lea e agai i mea o Industrial Estates i Vaitele ma fanua ia o mea foi ia sa tatou faia. O e manatua? E i ai le vaega lena e faatu ai pisinisi i i Vaitele. O le tulaga la lena o lea ua aumai ai le fautuaga ma talia e le Kapeneta, o mea la na e i ai le taimi mulimuli e faamautu ai ia lana Teuteuga, ia ona toe avatu foi lea i le Kapeneta faatoa aumai ai i inei.

FOFOGA FETALAI: E manatu o lea ua manino ma malamalama lea tulaga, o le a i ai le taimi talafeagai ona faaoo mai lea o le Tulafono e pei ona taua e le Afioga i le Minisita, atoa foi ma le Tulafono ua taua e le Afioga i le Palemia ia ma le faamanatu a le Afioga i le Taitai o le Itu Agai. Le sui usufono mo Aana Alofi Nu. 3, toe lima ou minute.

Afioga TOEOLESULUSULU CEDRIC POSE SALESA SCHUSTER (Aana Alofi Nu.3): Faafetai i lau Afioga i le Fofoga Fetalai mo le avanoa, o le a ou le toe oo i le vaega na aumai ai le faaaliga a le Afioga i le Palemia aemaise foi o le Minisita, pau o lea o le agaga o le manatu, ia faamuamua o tatou tagata ina ia mafai ona atinae mo le lumanai. O le fautuaga foi ina ia iloiloaina o lenei Tulafono, e moni e le o faataua fanua, ae o customary land e mafai ona lisi, e talitonu foi a mafai ona lisi e fai ai se faletalimalo, ia tasi lea vaega e mafai ona maua ai sitiseni o i latou mai fafo, o le ala lea o le tuualalo.

Lau Afioga i le Fofoga Fetalai ona ou oo mai ai lea i nisi o atugaluga e ao ona silasila i ai i le Tulafono, o le faataitaiga o nisi o i latou o investors foi e omai e atinae, o se faataitaiga o totonu o Niu Sila o le tele o i latou ua faataua ua maua ua alu i luga ia tau o fanua, o nisi foi o kamupani tetele i totonu o Niu Sila ua own uma e foreign investors, ua leai se avanoa o i latou local e compete ai ma tau tetele ia e aumai fafo, e pei foi lava o tau o fanua. O lenei foi la vaega e i ai le tuualalo e iloilo ai le Tulafono, ina ia mafai ona taofia le competes po o foreign investors po o tagata o le a manao e sitiseni ma le tau o tatou eleele, ona o le tele o le tatou atunuu ia e le o mafai ona faatauina le tele o tau o fanua pe a oo nei ina sii i luga.

Lau Afioga i le Fofoga Fetalai, ia o se tasi foi nisi o kamupani o investors po o nisi o atugaluga i nisi o kamupani i atunuu i fafo faapei o Fiti, e latou te faaaogaina ia avanoa nei e faaaoga mo a latou tax pay i atunuu i fafo, e omai run pisinisi at a loss i totonu o le atunuu, e le kea la latou pe tolu pe lua tagata faigaluega pei o le fauina o le fale, ae run at a loss e le maua ai se polofiti e maua ai nisi o tupe e manaomia e le tatou Malo ae i totonu o latou atunuu, ia o lea e reconcile ai latou accounts ona uma ifo laia o lea e lost, ia atonu e itiiti ai a latou lafoga. O vaega e ao ona silasila i ai ina ia mafai ona i ai foi ni fautuaga i nisi ina ia omai i totonu e fai pisinisi, ia faamuamua e le gata o le maua o le polofiti a o le tele o tagata faigaluega.

Lau Afioga i le Fofoga Fetalai, ona ou see mai lea i nisi o fautuaga. Ou te talitonu lau Afioga i le Fofoga Fetalai o lou lava sui usufono, e taua le faamuamua o atinae mo tagata Samoa, e le na o tagata Samoa i totonu o Samoa, a o Samoa e i fafo atu o Samoa, a o Samoa foi e le i fananau mai. O atinae faafetai i le tele o atinae ma tulafono o lo o taumafai e faateleina ai nei avanoa, ae i ai le talitonuga, o le tasi foi lenei Tulafono a tulei loa foreign investors, ua itiiti avanoa o o tatou tagata o lo o i fafo e mafai ona autovaa mai ma atinae ni a latou pisinisi i totonu o le atunuu.

Muamua, lau Afioga i le Fofoga Fetalai o le tuualalo, ia toe silasila le Malo i se tasi o fautuaga sa faaalua mo Samoa lea e manaomia le tolu po o le lima tausaga faatoa mafai ona sitiseni, one generation removed from being born in Samoa ina ia mafai ona toe attract mai pe faatosina mai i latou e atinae. O le tele o nei tagata lau Afioga i le Fofoga Fetalai ma le mamalu o le Maota, o i latou ia ua tulaga lelei i atunuu o lo o nonofo ai. O le faataitaiga o nisi foi o alo o le atunuu faapei o le alii lea o Seiuli Rock Dwayne. O i latou ia e tele seleni i atunuu i fafo. O nisi foi o tagata taaalo ma faipisinisi i fafo. Atonu e le o lava sa tatou push e entice mai ai i latou e invest i totonu o Samoa. O lea e alu a tatou mission e entice mai investors mai Saina ma investors mai Europa, ae i lou lea talitonuga lau Afioga i le Fofoga Fetalai, e le o malosia le tatou encouragement pe entice mai tagata Samoa e invest mai a latou seleni i totonu o Samoa. E ao ina silasila ona o lou talitonuga ona o tagata nei e sau ma le investment e naunau ma loto mo Samoa, o lana faamanuiaga foi e nofo i totonu o Samoa e aoga i lona aiga, nuu ma nisi o vaega faapea.

Lau Afioga i le Fofoga Fetalai, o se tasi foi o tuualalo e le gata i tagata Samoa o lo o nonofo i atunuu i fafo a o pisinisi Samoa i totonu o si o tatou atunuu, lea ua faagasolo i le tele o PACER Agreement i le PICTA ma le PACER. Out e talitonu o le avanoa lea e galulue ai le tatou Malo ina ia mafai ona autovaa atu a tatou pisinisi i totonu o Samoa e compete ma maua galuega i isi atunuu o le Pasefika po o totonu o Niu Sila ma Ausetalia ae a compete le

mea lea e faigofie atu le tau e mafai ona tender ai le kamupani i Samoa. O isi foi atunuu o le Pasefika e mafai foi ona tatou faaaogaina nei avanoa.

FOFOGA FETALAI: Malie le sui usufono, tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaai: Lau Afioga i le Fofoga Fetalai, e ese le manaia o lagona o le sui usufono. O au lea e manatu ia i latou foi nei ua matua tautaua i fafo, ae sa omai ma matou talanaoa i ni a latou visa ma tusifolau i le taimi lea a o ia te au le discretion. E i ai isi ua matua maua lava le mea ua oo i ai, ua ou le iloa po o ua ou tusi faafia i isi sole ua le toe fia tali mai, e faatosina mai aemaise lava ia tatou taaloga, e le fia tali mai. O uiga ia o le soifua, e te oo loa i le maua lava lena, ona alu tasi lava lea o le mea, e te vaai i le mea e teu ai au tupe e sili atu ona tele au seleni e maua mai ai. O le tulaga sao lena, e faigofie ona lafo, e oo lava i isi a tatou tama tautaua ua oo lava i le tumutumu ae oo mai i le taimi lena ae leai lava se mea ua ou faalogo o tau e fesoasoani mai ai. Na ona ou faapena atu, o le manaia ia o mafauaiga o mafauaiga uma foi na o le Sui Palemia ma lena Kapeneta atonu e alu lava i le lumanai ua tulai mai se isi e faapena le manatu, o lea out e talanoa atu e aofia ai se isi o tatou i Amerika, Ausetalia ma fafo atu, i le mea lea ua oo ai i le tulaga maua lava ma tele mea e faamanuiaina ai ae fiu lava le mea e fesootai atu ai e leai lava se tali lelei o aumaia.

FOFOGA FETALAI: Tulai mai le Sui Palemia.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, faamalo atu i le sui usufono ma le saunoaga matagofie. O feagaiga ia a feaatauaiga faava o Malo lea sa taua o le PICTA, o tatou le isi atunuu na muamua saina i le feagaiga o le PICTA aua e lua o le bitter i oloa ma le bitter o auaunaga lautele po o le services. O lea ua alu le mea faapena lea e saunoa ai le sui usufono, e leai la se mea fou o i a ii lena taimi. Ona pau le mea lea sa e taua le isi feagaiga lea o le baser plus, o le feagaiga lena e le i maea ona faatalanoaina a o lo o faagasolo pea feutagaiga. E taua le tulaga lea e laga mai ona o le mataupu tonu lena o lo o agai i ai talanoa i lena taimi. O le isi mataupu taua tele i lalo o le PACER plus o le fegasoloaiga o tagata faigaluega po o le labour mobility, o lo o faagaoioi foi lea polokalame i le va o atunuu o le Pasefika i Niu Sila ma Ausetalia ma maua ai avanoa faigaluega. O le tasi lena tulaga o lo o galulue ai le Malo mo ni avanoa faigaluega mo o tatou tagata.

O le faamalamalama lea lau Afioga i lea vaega.

FOFOGA FETALAI: Tulai mai le sui usufono e faaauau mai le saunoaga.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga, o le vaega tonu lea e avatu ai se tuualalo aemaise lava o le bitter ma le baser e pei ona taua. Ona a ou vaai i le taimi lena i le tele o konekarate i galuega fai auala o lo o faia i Solomona, Vanuatu, Papua Niu Kini o lo o tele ina aumai kamupani mai Niu Sila ma Ausetalia, e taugata, peitai ua silasila i le matagofie ma le tomai ua i ai a tatou fai konekarate e fesiligia. Aisea ua le mafai ai ona tender i ai ma maua ai e latou galuega? O le

tali, o le taumafai o tatou e vaai auala e manaomia e i latou ina ia mafai ona o atu e compete ma nei kamupani mai Niu Sila, Ausetalia, Amerika ma Asia ona e taugofie ma ave ai le tatou cost i ai, ae tele foi lea professional services, e le gata o konekarate fai auala a o le tele foi o consultancy ma kamupani o lo o moomia e isi atunuu, e avatu ai la le tuualalo o le tasi lea vaega mo tagata Samoa o lo o nonofo iinei. O le tasi foi lea avanoa e mafai ai ona omai tagata Samoa o lo o faigaluega i kamupani i fafo e tuufaatasi ma i latou nei e faatino lea galuega.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, o mea uma lava ia e fai i le taimi nei, e leai lava se mea e le o faia. O mea ia e saunoa mai ai le sui usufono i le services ma consultancy o konesale aua o le sui usufono foi o le isi galue faakonesale o lo o maua foi ana galuega e galue ai i isi atunuu o le Pasefika. O lea la e maua lou avanoa i lalo Bitter e te tender a ii galuega i Solomona, Vanuatu ma isi atunuu faapena ma maua ai au seleni. Aua la e te popole ai ua leva ona faagoioi a tatou mea nei e le o ni mea fou, ae faafetai i le tau lagalaga ma le faamanatu mai. O tatou kamupani i fafo e pei ona e taua le au fai auala o le mea foi lena o lo o uunai e le Malo e manaia ae fuafua i le capacity o le kamupani pe gafatia le tulaga o a latou masini e faatino ai galuega, e sao e tatau ona taugofie tatou, o le tomai ua latou maua leaga o le auga tonu lena e te sau ai, o le tomai e maua i Samoa nei, e maua i galuega a le Malo. Ia silasila o lea e tender galuega a le Malo, faafetai o lea ua e aumaia o le tomai na maua iinei o lea e taumafai e atinae e pei o le auga tonu lena o le tatou feagaiga faava o Malo ina ia maua avanoa e o atu ai i fafo i isi atunuu e faatino galuega nei.

Tofa Levaopolo Talatonu: Lau Afioga i le Fofoga Fetalai, na o le fesili lea e fia malamalama ai i le sui usufono mamalu. Ou te fia fesili atu lava i le sui usufono mamalu. Pe sa e faiaoga muamua?

FOFOGA FETALAI: Malie se i tulai mai le Minisita mo Galuega, Felauaiga ma Atinae Eseeese.

Afioga Hon Manualesagalala Enokati Posala: O le tasi lea vaega lau Afioga i le Fofoga Fetalai, e masani ona taua tele o le faaogaina o o tatou tagata i le services e pei ona taua auala. E pei ona maua e sao, o atunuu o Fiti ma Toga ua fai e Saina o latou auala, a o le agaga maualuga lea o le tatou Malo e taofiofi ai ona o le tomai ina ia build up le skill. O lea foi ua i ai le agavaa i totonu o le tatou atunuu, na omai nisi tilotilo iinei ma iloa ai e ese le lelei o galuega o lo o faatino e pei o le tatou foleni lea e i ai. Sa i ai foi fetuunaiga ma le Malo o Tutuila, o la ua agai mai pe mafai ona o atu a tatou kamupani e fau o latou auala, pei e tasi le kamupani la e faatinoina o latou auala. O uiga taua nei, ae talu ai ona o le agaga ina ia taofiofi ai iinei ma maua le tomai ma le agavaa e faatino ai le galuega a o faiga faavae a le Faletupe o le Lalolagi, o lo o tilotilo i latou i le vaai mai e talafeagai lava le faatinoina o galuega i totonu o Samoa ma taofiofia ai tupe ma seleni. O la e vaavaai aua e taumafai foi i latou i avatu i fafo ia competititve le faatinoina o galuega international, ae peitai o lo o mafai lava ona ausia e tatou le tulaga lelei e faatino ai a tatou galuega. O le fesoasoani atu lea e tusa ai ma le mataupu.

FOFOGA FETALAI: Malo faafetai, tulai mai le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai, out e tulai atu ma le faaaloalo lau Afioga i le Fofoga Fetalai ma le paia o le Maota, ona o le sui usufono foi o se tasi o sui usufono mo Aana, ou te fautua i le sui usufono e sala ina ou fautua leaga o au o le tama o le Itumalo pe a faatasi. Ae lelei foi lea e fai foi ma aoga mo nisi o faamoemoe e lauga mai i le la Itu. Ou te tautala soo foi i le mea lea, e faaumiumi lava a tatou Fono o le faaali mai o le potu ma le iloa, ae iloa lelei o le Malo lenei o polofesa ma fomai nei e i ai, o tagata aoaoina lelei. E tou te le tau fai main a manatu ma e le faaogaina foi e le Faigamalo le pola e motu i tua, ae sefe le manava mo le lauga pe afai o se aoao po o le fautua i le aiga pe afai o le matai e faia upu o se aiga i le luma. A o lea e maitau atu e pei o le a faaali mai le iloa vaeatu le sui usufono mo Aana Alofi Nu. 3, o le fautuaga lena, e le gata i le sui usufono e pei ona ou fai atu o au o le tama o le tatou Itumalo ma nisi foi e sefe ai le tatou taimi ma tape ai le vala lea e tuuaia ai le Fofoga Fetalai ma lenei Itu ma faapea ua tuli tamoe a tatou galuega. E ala ona umi o outou ae ana tuu lo outou malamalama lena sei vagana ua oo i le taimi tou te tutu ai i lenei Itu pe afai tout e maua lena avanoa. O le agaga lena ua ou tulai atu ai.

Afioga Hon Palusalua Faapo II: Lau Afioga o le mea e fia faasao.

FOFOGA FETALAI: E le mafai ona faasao e le isi faasao le faasao a le isi.

Afioga Hon Palusalua Faapo II: E leai leaga e sese le tulai mai o le Minisita. O au ou te faaaloalo tele leaga o le Minisita Sinia sa Fofoga Fetalai foi, ae a aoai mai loa i mea e saunoa i ai sui usufono o lenei Itu, se out e matua faanoanoa lava i lau Afioga i le Tiakono Toeaina vaeatu lau Afioga i le Minisita. E leai e le o tatala atu se iloa e aoga, o le tuualalo atu a aoga e lelei, ae a le aoga a ua oo atu le fautuaga. O le mea lea e tatalo atu ai se i tuu mai se avanoa i lenei Itu...

FOFOGA FETALAI: Ou te manatu ua malamalama ma manino foi le – o le saunoaga a le Minisita o lo o saunoa o le sui usufono o le Itumalo ma le tama o le Itumalo e faapena le lagona o le Aana foi lea e saunoa. Ae aua ia le tee le uluga o lea ua manino ma malamalama o le fautuaga.

Tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, sa ou faapea e tulai mai le Minisita e vivii lona atalii vaeatu le Afioga i le sui usufono, aua o mea ia e avatu e fesoasoani e fau toatele ai lo tatou sa. Ua saunoa le Palemia “pea lualua”– afai ua fai sina mamafa laitiiti ona e saunoa mai lea e toe tau tuutuu laitiiti i lalo, ia o lea ua le pea lualua – e tau faafaigofie ai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le ala lena na ou fiafia a ii le

saunoaga a le sui usufono mo Aana Alofi Nu. 3. O le mean a ou fiafia ai ona o le faauilavea a lou uso le sui usufono mo Gagaemauga Nu. 2, aua foi o la e faiaioa o ia te i latou, o mea ia e i, e leai se mea fou o aumai ai ina. O lea ua saunoa manino le Sui Palemia o mea ia e fai, ua leva ona matou fia tutulai atu se malie ia faau i lou tootoo, e leai lava se mea fou o e aumaia a o lea ua o fiafia ua e faiaoga i le sui usufono mo Gagamauga Nu. 2.

Tofa Levaopolo Talatonu: Lau Afioga i le Fofoga Fetalai, o le mea tonu lea na ou fesili ai leaga e eseese le uumi o malamalama. Ua alu a lenei taimi o lea e talatalanoa ma avatu le finagalo o le sui usufono a o la e tau fai lue uma mai o latou ao e fou lea mea i le latou faalogo.

FOFOGA FETALAI: O lea ua maua lava le tau faaososo o le sui usufono. Tulai mai le sui usufono mo Aana Alofi Nu. 3.

Ia se i tulai mai le sui usufono mo Palauli, se i ave ifo se upu faale-Agaga.

Afioga Hon Faumuina Tiatia Faaolatane Liuga (Palauli): Lau Afioga i le Fofoga Fetalai faafetai mo le avanoa, o lea lava ou te faalogologo i tau musumusuga o mea sese ia a faipule a le Itu Agai ae ou te talitonu o loo silafia lava e le Afioga i le Palemia ma le Kapeneta, o la e tauva a tatou kamupani i ia atunuu o le Pasefika, lea foi na maua ai se konekarate a se tasi o a tatou kamupani i Cook Islands. O galuega mo konekarate i fafo, lea e fund e le World Bank ma le ADB ma isi Faalapotopotoga, e i ai foi a latou criteria e filifili ai e ala I tauofoga pei foi o le taimi na ou tauaveina ai le Matagaluega o Galuega, e tele lava ina maua e kamupani mai fafo pe a fund e le World Bank po o le ADB ona e i ai a latou faiga faavae, ae sa taumafai lava e faaaoga a tatou lava kamupani e faatupulaia ai le capacity o tatou kamupani. O Solomona lea e taua e le sui usufono, o la e i ai avanoa ae faigata ona o tulaga o le saogalemu o tatou tagatanuu. O Solomona e pei lava ona silafia o loo manaomia le faaleleia o lona infrastructure. O le matua tele lava o galuega i Solomona ae faigata ona o le tulaga o loo i ai le saogalemu.

FOFOGA FETALAI: Malo. Ia le sui usufono mo Aana Alofi Nu. 3, tulai mai e faaiu mai le saunoaga.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa, faafetai mo faauilavea ma manatu foi. O le agaga o le taumafai atu e pei ona saunoa nisi sui usufono, o fautuaga e avatu e taatia atu i ina, e talitonu o le tatou vaa e fautele, a i ai se aoga faaaoga, a i ai foi e taatia mo le lumanai, taatia mo le lumanai. Ae o fautuaga i lata foi i lea o le vaai i ni mea e aoga ona o le pau lenei o le avanoa e mafai ona avatu ai se tuualalo.

I le tulaga o lo o taua i kamupani ia i atunuu i fafo, e tasi le vaega e aupito sili ona faigata ona tauva ai tatou kamupani, o insurance, e o atu e lelei o tatou tagata e mafai ona faia ae requirement pei ona saunoa le Afioga i le sui usufono mo Palauli e manaomia loa insurance e tai ova i le miliona tala mo kamupani, le mafai loa ona pay, pau lea o le mea e fai e tatou o le o e join ma isi kamupani mai fafo, ae mo le lumanai ina ia tagatagai i ai.

Ona ou see mai.....

FOFOGA FETALAI: Malo.

Afioga Hon Faumuina Tiatia Faaolatane Liuga: Lau Afioga i le Fofoga Fetalai.....

FOFOGA FETALAI: Ia se i tulai mai le Afioga i le sui usufono mamalu.

Afioga Hon Faumuina Tiatia Faaolatane Liuga: E tasi lava le criteria e moomia e le World Bank, o le cash flow position e le o se insurance, o le mea foi lena sa ou intervene a o ou Minisita mo Galuega, ina ia faataga le isi kamupani tatou e relax ai le condition lea, ina ia maua ai se avanoa e develop ai le maketi i totonu o le tatou lava atunuu. O le a le mea lea ua outou silasila i ai? Le four lanes lele e alu atu i le Loto Samasoni e oo atu i Vailoa, Faleata talu ai le avanoa na aumai e le World Bank. O le cash flow e manaomia ae le o le insurance. Ma lou faaaloalo.

FOFOGA FETALAI: Malo faafetai. Ia faaii maia le saunoaga le sui usufono mo Aana Alofi Nu. 3, o lea ua tele ina tali le finagalo.

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai, ia o nai nisi na o fautuaga e taotoo atu i le Kapeneta ma le Malo, o lo o taua foi le taua o investment ma nisi o galuega. O le taimi nei o le industry e aupito sili ona vave ona maua tupe ma lelei, o Computer Industry, peitai ane ou te le o vaai lava i se tatou taumafaiga e le o i ai ni apse po o ni programmer a tatou e mafai ona sao ma maua ai nisi o seleni atonu e tagai foi i ai le Malo, tasi lenei afai e tilotilo i investments po o i ai ni kamupani goggle kamupani fafo e ono mafai ona set up e le o i ai se isi o le Pasefika o i ai se technology faapea, atonu o se tasi lea o vaega e silasila foi i ai le tatou Malo.

Ona faaii atu ai lea lau Afioga i le Fofoga Fetalai i se tasi o tuualalo, pei ona avatu foi se manatu i nisi o alo ma fanau o Samoa o lo o i fafo, o le tele o nei alo foi ma fanau ua fai a latou foundations po o latou non profit organisations e tele ina alu ai a latou seleni ona faatino ai lea o galuega e atinae ai tagata i totonu lava o le atunuu lea, atonu o nei foi tagata i latou aua o lea ua fai a latou foundation, e ao ona tagatagai i ai le Malo e entice mai e set up latou foundation na faigofie foi i nisi o vaega e manaomia le atinae i totonu o le tatou atunuu.

Ona faaii atu ai lau Afioga i le Fofoga Fetalai, faafetai mo le avanoa, o le agaga lava o lou sui usufono, e faataua le atinaeina o tagata Samoa mo Samoa, faafetai.

FOFOGA FETALAI: Malo faafetai i le saunoaga a le sui usufono mamalu, e talitonu afai ua tele finagalo i lau saunoaga, ia o i ina e iloa ai le taua o lou lagona, o lea foi ua faalupe oe e le sui usufono mo Gagaemauga Nu. 2 o le faiaoga, ua atili ai ona tele lou sao taua, ae fautua atu la i le faiaoga e faapea, e le o le avanoa mulimuli lenei, o lea ua faafia lava ona ou fai atu i le paia ma le mamalu, o lea faatoa amata le tatou talanoaga, e leai, leai se pa puipui o outou finagalo tusitusia e tuu atu i le tatou Komiti pe a see le tatou Tulafono i le Komiti, o i ina e matua maioio ai lava e le Taitaifono ma sui o le Komiti la outou atugaluga, aua o i ina e mafai ai ona faapepa ma faapine

ma agai ai fautuaga e suisui malie ai fautuaga agai i le Malo ia ma le tatou Tulafono o lo o faalupe. O le fautuaga lena e le gata foi i lea o le tatou iloiloga auiliili pe a toe foi mai le tatou Tulafono i totonu o le Palemene, ae fautua atu leaga o lea sa avatu le fautuaga muamua, ia ne i meaane ua tatou matau ua faafia ona tau lava le mea e tasi, o lea foi ua uma ona saunoa isi sui usufono, e le faapea e le taua le faaleoina, a o lea ua outou vaai, ia o lea lava ua faafia ona fefoiai, lafo atu, lafo mai, tu mai le Malo tau faamalamalama o le mea lava e tasi, ae agai maia nisi saunoaga o lumanai, a o lena aumai ni mea e tatou te le i taua muamua, ona faigofie lea ona tatou malamalama. A o lea ua ou matau i le Sui Palemia, masalo po o ua faalua faatolu ona atu tolu tusitusiga o fautuaga lava i le mea e tasi o lo o aumai. O le a avatu le avanoa, tulai mai le Minisita mo Punaoa Faanatura ma le Siosiomaga.

Tofa Hon Faamoetaulao Lealaiauloto Ulaitino Faale Tumaalii: Faafetai lava i lau Afioga i le Fofoga Fetalai, leai ua ou toe tulai atu leaga o lea sa lauga le sui usufono mamalu o Aana Alofi Nu. 3, ma o lea la na faauilavea ai le Taitai o le Itu Agai faapea o lea e...o le mea o lo o aumai i le Tulafono e faatau atu fanua, leai o lea o le a faasao atu, e ese lava le faatau atu ese le faatau mai lea, lea e aumai i totonu o le fuaiupu lea – ma e refer le fuaiupu lea i le tulaga o le taking of lands e le Malo aua atinae, a o le mea lea na tulai mai ai le Taitai o le Itu Agai faapea e faatau atu fanua o le Malo, e eseese lava ma le mea lea o le faatau mai e le Malo, pe a vaai atu i le atinae e tataua ona ave i ai ia le tulaga o lona atinaeina ina ia manuia ai le atunuu. Ma lou faaaloalo lava.

FOFOGA FETALAI: Malo.

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Ia.

Afioga Hon Palusalua Faapo II: O se mea e fia malamalama ai. O mea la ia e igoa ua aumai, e tasi lava le faamalamalamaga, malamalama, ioe, sa tataua ona leva ona e tapa le Loia Sili e uiga i le mea lea, leaga e fetotoai ma le saunoaga a le Afioga i le Palemia, o lea la ua e saunoa mai, e ese mamao lava ma le saunoaga a le Afioga i le Palemia lea na aumai, ioe, o le uiga lena o lau tala o le fetotoai, ese lau saunoaga, ese le saunoaga a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le faalavelave o le mataupu lea, o lou faaoga sese o le Tulafono lena e te agai mai ai iinei, o lena e manino lava i le Tulafono, e le aafia fanua o le Malo ma customary land, toe faitau i ai.

FOFOGA FETALAI: E manatu ua.....

Afioga Toeolesulusulu Cedric Pose Salesa Schuster: Lau Afioga i le Fofoga Fetalai, o se mea e fia faamalamalama.

FOFOGA FETALAI: Le sui usufono mo Aana Alofi Nu. 3 ua maea lou taimi.

Afioga Toeolesulusulu Cedric Pose Salesa Schuster: Leaga o lea e.....

FOFOGA FETALAI: E te le agai la leaga o le Minisita na agai mai i le Taitai o le Itu Agai, e manatu ua manino ma malamalama lea mataupu.

Ia ua avanoa lo tatou Maota, ia tulai mai le sui usufono mo Palauli, ia ua avanoa le Maota mo saunoaga.

Afioga AFOAFOUVALE JOHN MOORS (Palauli): Faafetai i lau Afioga i le Fofoga Fetalai mo le avanoa ua maua foi e Palauli e fai ai se motugaafa.

Ou te tulai atu ona e tatau ona faaali se manatu e fai ai se sao o Palauli, ona o le atoaga lea o Pule. Faafetai i le agaga o le Tulafono i le Malo, o se isi lea o auala po o se isi lea o polokalame e fesoasoani ai i le atinaeina o le atunuu. Ae ou te fia piiama foi i se saunoaga matagofie, faagaetia ma faamomoiolo na saunoa ai se tasi o sui a usufono mo Vaimauga Sisifo, Tofa Lefau Harry Schuster, ioe, tatou te faapelepele i measina o si o tatou atunuu. Ia e ui ina outou silasila mai o le sui usufono e pei e sui fefiloi lona tino, se i tulou, a o le fatu o le Samoa moni, selau pasene.

Ou te talitonu lau Afioga i le Fofoga Fetalai, leai lava se isi i totonu o le Maota lenei e le lotonuu o lea ua faaalua uma finagalo. Paga lea, ma o le fesili ou te fesili ai au, pe ou te nofoai la ma le faaogaina se avanoa ina ia mafai ona atiae ai ia le atunuu e maua ai ni galuega aua le tupulaga o lo o fai mai. Ou te lagona, o se filifiliga ma o se tulaga e sili atu ona maoae atu mo lou nei tagata ma i tatou uma lava i totonu o lenei Maota, se i tulou, e le faigofie foi, e faigata, aua tatou te le iloa mea i luma atu o tatou, tatou te le iloa, e leai se isi e silafia ia le lumanai. Ae paga lea, e tatau ona tatou taumafai e sailiili avanoa, sailiili auala, sailiili ni polokalama lelei, ina ia mafai ona tausi ai tatou tupulaga o lo o faapea ona fai mai. O lea o lo o saofai i faatumutumuga o le atunuu i totonu o le Maota lenei, o tatou ua uma ona tofia ma oo mai e faamaonia ma pasiaina ni Tulafono, Tulafono e fafau ina ia mafai ona maua ai ni avanoa mo le lumanai o le atunuu ma le Malo, ou te iloa e tatou te ioe uma i lea faamoemoega. Ma o le Maota foi lenei, e mafai foi ona tatou suia ni mea po o ni tulafono e tatou te vaavaai atu ma outou silafia, ua faaletonu, e le faapea a pasia lenei Tulafono, e leai se auala pe leai se taimi e suia se mea o faaletonu. O le agaga lea o le talanoa atu i ou lava manatu.

Fai mai se tasi o Taitai iloga se i tuina atu i le faa-Peretania ona ou faamalamalamaina atu lea i le faa-Samoa lea o se taumafai, 'we need men who can dream of things that never would,' tatou te moomia tagata po o tamalii e mitiina ni mea e le i tutupu.'

Lau Afioga i le Fofoga Fetalai, o motugaafa ia o Palauli ma le lagolagosua aua le lumanai o Samoa. Ia manuia le Fono.

FOFOGA FETALAI: Ia o ituaiga lauga la na o le taimi lenei, lauga faa-Pule, ioe, malo Palauli le tofa. E manatu o lea ua e oto le lauava mua aua le faaaliga tofa a le tatou Maota, malo, malo le faaalua lou finagalo i le aano moni ma le uiga taua e taua ai le faatofalaiga.

Ia tulai mai se tasi o sui mo Faasaleleaga Nu. 4.

Afioga PESETA VAIFOU TEVAGA (Faasaleleaga Nu. 4): Ua faamalo faafetai i lau Afioga i le Fofoga Fetalai, ua maua foi le laolao o lenei Itumalo o Faasaleleaga Nu. 4 e taumafai atu ai sona sao. Sa i ai lava le manatu o lenei Itumalo ou te lauga, ona o lou manatu o lenei Tulafono Tau Faaofi ua matua lagolagoina lava e lou sui usufono ma lou Itumalo. Ae peitai sa logoina mai au e nisi o lou afioaga i Puapua i le aso ananafi, ona o lo o talafeagai lelei lenei Tulafono Tau Faaofi ma le tulaga sa taoto i ai le talosaga a lou nuu e uiga i nisi o le aufaipisinisi na mafua ai ona tapenaina se tasi o eleele tele e latalata i le afe eka (100,000 eka) a lou nuu mo fuafuaga. E ui lava e le i taunuu ae momoli lau faamalo ma le faafetai i le Malo, ou te talitonu o lo o afio mai le Afioga i le Palemia ma le Kapeneta i le Paeaiga talu ai na oo mai ai lava lou nuu o Puapua ma tuuina mai le talosaga ina ia tapena le lisi ona o fuafuaga a nisi o kamupani. E pei ona ou fai atu e ui lava e lei taunuu ae out e faafetai ua fau e le Malo lenei Tulafono Tau Faaofi, atonu o le a maua mai ai nai nisi o pisinisi mai fafo, o le a faapea ona taunuu ai lenei faamoemoe, e le gata isi o matou motu tele i Salafai ae faapea foi i lou nuu ma lou Itumalo. E pei ona ou avatu o le a le toe popole lo tatou nuu i Puapua o lena ua uma ona tapenaina lisi uma o le tatou eleele.

Lau Afioga i le Fofoga Fetalai, o lenei Tulafono Tau Faaofi, out e faatusaina o le tagata tautua lelei, e le o le Tautua lea e nofo mai, e leai o le tautua lelei. O so o se tagata lava...

Afioga Hon Palusalua Faapo II: Lau Afioga i le Fofoga Fetalai, e le mafai lava ona ou tuua ni lauga faauigalua vae atu lau saunoaga.

FOFOGA FETALAI: Malie le sui usufono se i avatu le avanoa i le Taitai o le Itu Agai.

Afioga Hon Palusalua Faapo II: O le a le uiga o lea faamatalaga o le Tautua a o le tautua lelei, o se Tautua leaga le Tautua lea? A matou leaga e tautua atu outou ma avatu fautuaga ma mea e lelei ai le Malo, o le mea lea lau Afioga i le Fofoga Fetalai, e fautuaina le sui usufono ina ia aloalo ese mai lea... Afai o lauga i eleele o lona Itumalo ona lauga sao i campaign i lona Itumalo.

FOFOGA FETALAI: O lea ua maua, e manino lava le saunoaga a le sui usufono, e leai ma se upu a le sui usufono ua lafo faapea ua faaletonu lena Itu.

Se i tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, a fiu lenei vaega e tautua o le Green Power la e faafaigaluegaina Peseta i le taimi lenei ma le faaaloalo lava.

FOFOGA FETALAI: Manatu o lo o sagatonu le saunoaga a le sui usufono, o lana ia faaigoaina o le Tulafono Tau Faaofi o le tautua lelei, ae leai san a saunoaga o faapea atu o le Tautua Samoa e leaga o lea e maua lelei e saga tonu le saunoaga.

Tulai mai le sui usufono e faaauau le saunoaga.

Afioga PESETA VAIFOU TEVAGA: Faafetai i lau Afioga i le Fofoga Fetalai, e faamalulu atu foi i lau Afioga i le Taitai o le Itu Agai ma nisi o sui usufono o lena foi itu o le Maota. Leai, o lo o manino lava upu o lau lauga, o le tautua lelei o se tagata tausī aiga, e le moemoenoa ae moemoe ala, e faapena uma le uiga o lenei Tulafono Tau Faaofi. E le o moemoenoa le Malo....

Afioga Hon Le Mamea Ropati (Minisita mo Faatoaga ma Faigafaiva): Lau Afioga i le Fofoga Fetalai, e i ai lava le upu le isi upu lea e misi, o le tautua lelei e le gutu oso.

FOFOGA FETALAI: Ia faaopoopo ane la ma lena le sui usufono mo Faasaleleaga Nu. 4, e te saunoa mai ai.

Afioga PESETA VAIFOU TEVAGA: E pei a ona ou avatu, o le moe alaala la lea o le tatou Malo o lea e fagufagu ai lenei Tulafono Tau Faaofi, e moe nei ae mafaufau taeao. O se tagata tausī aiga lelei e le moe lava i le po atoa, e moe ma ala, e mafaufau lava i lona matai, o ona matua ma lona aiga ma lana fanau ia aua nei fia aai. O lona uiga e alu i le maumaga e le i ao, e galue ma toe tapena mai le avega mo le isi aso. E faapena tonu lava fuafuaga lelei a le tatou Malo ua faataoto. Sa ou faalogologo ma taua e nisi o sui usufono mamalu ma le Palemia le manaia foi o faaiuga na faia e le Kapeneta masalo po o le vaitaimi o le 1992/1993, o lo o afifio mai nisi o Minisita i lena vaitaimi ma nisi o sui usufono lea na latou aumaia ai le Kamupani tele o lo o i Vaitele. O le manaia o lea faamoemoe o le toatele o alo ma fanau o le atunuu, atonu o i e fafagu mai ai lenei Tulafono Tau Faaofi, ina ia toe vaavaai mamao le Malo i nisi o kamupani tetele nei e tatau ona toe aumai i totonu o le tatou atunuu. Aua a tele mai kamupani ou te talitonu o le a faapea ona toatele alo ma fanau a le atunuu a uma mai aoga a o lea ua maua lo latou faasinomaga. E le gata foi i lea o nisi o le mamalu o le atunuu o lo o fia maua ni galuega.

E tele itu taua o lenei Tulafono Tau Faaofi, out e faatauaina foi nisi o vaega o le Taulafono Tau Faaofi ona ua mafai ona faamatuu atu e le Malo fanua o le Malo e lisiina ai e nisi o kamupani mai fafo. Afai o faafogafoga mai lo tatou nuu o Puapua, o lea o le a ou avatua lenei mataupu ona o le tasi lenei o mataupu na outou logoina mai ai au ina ia manino le vaega lea. O le tuuina atu o fanua faale-aganuu leai o lea lava e mafai ona lisiina atu, ua outou faafogafoga i le tali a le Minisita ma le Malo, e le mafai ona faatauina fanua faale-aganuu. E lelei lena sa ou manatu ou te le tulai ae lelei ona ou faaleoina atu ona o au o le sui usufono o le Itumalo ina ia manino lelei lea vaega.

Afioga Hon Palusalua Faapo II: Lau Afioga i le Fofoga Fetalai, o se mea e fia faasao. Malie lau Afioga o lo o saunoa e faamalulu atu ai i lou faalavelave soo, ona o lea ua oo tonu i le mea lea na faamalalalama mai e le Minisita, e mafai ona faatauina mai eleele o le atunuu aua atinae, lea na saunoa nei ai lava le Minisita a o lea ua e saunoa e le mafai ona faatau. E leai, o lea e manino le saunoaga a le Minisita, e mafai ona faatauina mai eleele faaleaganuu aua atinae lea e i ai le Tulafono Tau Faaofi lenei, leai e manino lelei lau Afioga.

FOFOGA FETALAI: O lea ua maua lou finagalo. Tulai mai le Minisita o Punaoa Faalenatura ma le Siosiomaga.

Tofa Hon Faamoetauloga Lealaiauloto Ulaitino Faale Tumaalii: Faafetai mo le avanoa ina ne i te i foi ua liliu e le Taitai o le Itu Agai upu e pei ona faasao atu. O le tulaga o le faatau mai o eleele e pei o fuafuaga o eleele o le atunuu e tapue ai le suavai lea ua lamatia ona ua ta i lalo le folesi ma matutu ai eleele o lo o tapue ai le suavai ma afaina ai le soifua lelei o tagata. E pei o Apia ma le tulaga o i ai, e le mafai ona nofonofo le Malo ae tuu lea tulaga e tupu aua o le iuga e i ai e galala le atunuu o ai e toe tua mai i ai? E toe faasea mai foi i le Malo i lea tulaga, ae seiloga lava ua vaai atu le Malo e critical lea mea aua le soifua lelei o tagata ona faatoa liliu loa lea o le Malo e fai eleele nei, ma lou faaaloalo lava ae le faapea e faatau lava so o se eleele.

Afioga Hon Palusalua Faapo II: Lau Afioga i le Fofoga Fetalai...

FOFOGA FETALAI: Malie se i avatu le avanoa i le faamalamalama a le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea lea e tupu ai le vevesi o tatou o le milomilo o mea. E tiga lava ona manino le faasilasila e oo lava foi i le lisi lea sa e faitauina mai o lena lava e manino le faaupuga, seia vagana prescribe land lea e aga tonu i ai le Tulafono Tau Faaofi, ae le aafia fanua faaleaganuu, le aafia fanua o le Malo, faitau lelei i ai. O le mea lena e ala ai ona sese a tatou mea o le faitau le malamalama. Ua faafia ea ona ou tutulai soo atu i le faitau le malamalama ma saunoa le malamalama i le tatou Tulafono Tau Faaofi.

FOFOGA FETALAI: Ou te manatu ua manino ma malamalama lea mataupu le Taitai o le Itu Agai.

Afioga Hon Palusalua Faapo II: Lau Afioga o le saunoaga lea e fai mai e faitau ae le malamalama. A lea e manino i le Tulafono Tau Faaofi, faatauina mai mo le atinae o so o se fanua ua faatonuina, lea e manino lelei.

FOFOGA FETALAI: Ou te manatu ua malamalama le saunoaga a le Minisita.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e le aafia fanua o le Malo faapea foi customary land, fanua faaleaganuu, faitau atoa le Tulafono Tau Faaofi ma malamalama ai.

FOFOGA FETALAI: Ou te manatu o lea ua malamalama lea mataupu, ma e le tatau foi ona tatou toe foi i tua. E tatau lava ona ou faamanatu atu i sui usufono, e leai se isi e faauigaina le faatulagaga o le Tulafono Tau Faaofi o le Malo, o le tali e avatu e le Malo o le tali foi lena i le Tulafono Tau Faaofi, ina ne i tatou toso le laau felefele ma manatu ai le sui usufono i lona faauigaina. Ia malilie sui usufono ua faalua, faatolu ona tulai mai le Minisita e faauau le

faamalamalama, o lea foi ua uma ona faamalamalama atu e lau Afioga i le Palemia ou te iloa ua gata ai i. O le faauigina lena o le Tulafono Tau Faaofi ua saunoa manino i ai, o le taatiaga tonu lena o le Tulafono Tau Faaofi, ae malilie nisi o finagalo ou te talitonu e le tatau ona tatou manatunatu mamafa i ai leai o le faatulagana sao lea ua faamalamalama mai e le Malo.

Tulai mai le sui usufono e faaauau le saunoaga.

Afioga PESETA VAIFOU TEVAGA: Lau Afioga i le Fofoga Fetalai, faafetai atonu o lea ua manino ma malamalama lea vaega ona ua faafogoga mai foi lou nuu i Salafai. E pei ona ou avatu ona o lea ua uma ona tapena le Matagaluega o Punaoa Faalenatura ma Siosiomaga, ua uma foi ona tapena le lisi o fanua o lenei nuu. O le ala lea na ou tulai atu ai e avatu le mataupu lea ona o le fia malamalama mai o si ou nuu, o le mea sili o lena ua outou faafogafoga mai leai ua na o le lisiina pe a faapea e maua nisi o le aufaipisinisi o lo o taumafai le Malo e auina mai i totonu o le atunuu, ao le faatauina o fanua tau Samoa e leai, vagana ai nisi o fanua e pei ona saunoa i ai le Minisita o lo o moomia aua lava fuafuaga a le Malo, ae le o se tulaga e faatauina atu i nisi po o ni kamupani mai fafo.

Lau Afioga i le Fofoga Fetalai, e le tele lava se manatu o lenei itumalo, e pei lava ona ou fai atu e lagolagoina ma faatauaina e lou sui usufono ma lou Itumalo, ae ala ona ou tulai atu se i faaleo le vaega lea ona o lo o faalogologo mai lou Itumalo. Ae ina ne i aveia lou le tulai atu, aveia lea ma ou sasi a o au o le sui usufono o le Itumalo aemaise o lou nuu o Puapua.

O lenei itula lau Afioga i le Fofoga Fetalai, o lena ua avatu se motugaafa a lenei Itumalo e le tele. Ia faamanuia le Atua i lau Afioga ma le Afioga i le Palemia, faapea foi le Taitai o le Itu Agai ma lena itu o le Maota ma le mamalu o le Palemene, faapea foi Ofisa Sili o Pulega ma Faalapotopotoga.

Ia manuia le Fono.

FOFOGA FETALAI: Malo faafetai i le saunoaga a le sui usufono, o lea foi ua agiga i le Maota le saunoaga a le Itumalo i lona itu taua e ala i le faatulai mai o lenei Tulafono Tau Faaofi ua opea i le Maota.

Lau Afioga i le Sui Fofoga Fetalai, o lea ua maua le avanoa o le ta Itumalo.

Tofa AGAFILI PATISELA ETEUATI TOLOVAA (Palauli Sisifo): O lapataiga mo le ola e tua i faamanuiaga. Faafetai ua maua lenei avanoa e fai ai foi se manatu o Palauli Sisifo i le Tulafono Tau Faaofi.

O lona lua, faafetai ua maua lenei avanoa ou te tilotilo atu a ii lou ata o sau i le TV, aua o lea faatoa ou vaai atu lava i sou ata o sau i le TV ma maua ai lenei avanoa ou te lauga ai ma ou tilotilo i lou ata.

Lau Afioga i le Fofoga Fetalai, o le a ou usitaia lau faatonuga i totonu o le Standing Order, ou te le toe taua mea ua uma ona taua, tasi lava sina mea laitiiti lava ou te fia taua. O lenei Tulafono Tau Faaofi, ua aupito tele le faaluafesasi ma tele ai le fesiligia o au e tagata o lou Itumalo o Palauli Sisifo, ua ou fiu e tali fesili, ua ou fiu foi e faamalamalama i tagata. O le popolega o i ai tagata o Palauli Sisifo ou te talitonu foi o Samoa atoa, lea ua uma ona faamalamalama e le Afioga i le Palemia o le upu lava lea “faatau”. A ua ou faamalamalamaina i tagata o lou Itumalo talosia a o faafogafoga mai ananafi i le faamalamalama a le Afioga i le Palemia, e ese a le upu “faatau” ese le upu “faaune” e lua lava upu ae eseese. O le upu faatau faafesuiiai, a o le

faaune, o le aumai o se mea i totonu e faafua ma faalelei. E sao au le Taitai o le Itu Agai, e sao, e sao lelei au, ae faafetai o lea ua faamalamalama aua o le Tulafono Tau Faaofi lenei ua momoli atu ai le feau i nuu i tua i TV, leitio ma nusipepa. O le tatou Fono muamua foi i le Aso Lua ae oo i le po o le tala muamua lava lenei a le Tala Fou, sa iloiloina e le Palemene i le aso lenei le Tulafono Tau Faaofi mo le faatauina o sitiseni, a o lea sa i le fai Televisi e leai ma se faaupuga faapea o le Tulafono Tau Faaofi, faafetai i lau Afioga i le Palemia o lea ua uma ona faamalamalamaina lea itu. O le vaega o le Tulafono Tau Faaofi e faataua e Palauli Sisifo, o le a le faamoemoe... pau a lea o le avanoa e maua, a leai la ni atinae faapea o fea o le a o i ai a matou fanau. Na sau le isi tamaititi Palauli i le amataga o le tausaga lea na tea fai mai ia te au, "Agafili, malie lou finagalo, faaoga ia lou sootaga faa-Upufai o Malo, se i sue ai sau galuega, o lea ua ou iu mai i le Iunivesite." Ou fai atu, "Alu e taumafai, leaga o le manuia o le tagata e ae lava ia i lona ia manoa, e le faapea e alu au e sue le galuega ona manuia ai lea o au, e leai e manuia ai lava oe, alu e taumafai." Lau Afioga i le Fofoga Fetalai, e lua vaiaso ae toe foi mai le tamaititi ia te au fai mai "Agafili, na valaau au i le faatalanoaga o le galuega a le isi Matagaluega, na ou alu i ai. E te silafia le mea na tupu, e toasefulutolu matou na valaaulia mo le faatalanoaga, o i matou uma lava o graduates ua iu mai i le Iunivesite." Tasi le avanoa ae sefulutolu fai faailoga. I le paia o le Maota nei ma lau Afioga i le Fofoga Fetalai, o le mafuaaga foi lenei o lea e lagolago malosi ai e le itumalo lenei o Palauli. O le vaiaso na tea nei na toe sau ai le tamaititi, fai mai, "Agafili sa toe valaau au i le isi faatalanoaga a le isi Faalapotopotoga Tumaoti a le Malo, e toavalu fai faailoga na interview ai, ou fai atu, "e a la tatou?" Ae fai mai, "Ua uma foi ona e iloa tatou mai Salafai, e tasi loa le mea e te alu i ai e pikiina le ituaiga fesili e te alu i ai, o lenei lava na ou oso i ai, ia o lea ua ou maua le avanoa." E \$23,000 le totogi la e amata ai, na amata i le Aso Gafua nei. A o fea la o le a o i ai le isi toafitu lea? Lau Afioga i le Fofoga Fetalai, o le itu malosi lenei o lea e lagolago ai e le itumalo lenei le fuafuaga lea e faatulai mai nei. Aua o isi finagalo ia na faaalua e le taea i sou manatu, fai mai a le maua se galuega toe foi e toto le talo, e sao lelei le fautuaga lea. A o lea tatou te uunaia a tatou fanau, a paie e toto le talo faamaai le penitala. O lea la ua foi mai tamaiti ua maai penitala ae ua leai ni penimaa e tusi ai penitala. O le mea lea ou te fai atu ai, amuia outou e tele avanoa mo outou alo, a o a matou fanau a le maua se galuega e toe foi lava i tua. E te fiu e toe tauanau se tamaititi e toe alu i nuu i tua.

Tofa Lealailepule Rimoni Aiafi: Lau Afioga i le Fofoga Fetalai....

FOFOGA FETALAI: Malie lau Afioga i le Sui Fofoga Fetalai.

Tofa Lealailepule Rimoni Aiafi: Se i fai foi se malologa a le sui usufono mamalu. E leai, e pau lava le vaega lea e fia faasao lau Afioga i le sui usufono mamalu, i lau saunoaga faalauaitetele, amuia outou, amuia outou i a matou fanau. Lau Afioga e leai se tulaga faapena, amuia tatou, o tatou uma, o le avanoa e tuatalaloa i so o se isi e avanoa i ai, e fuafua i le maai o lau penitala lenei na e saunoa i ai ma lou sailiili. Ma le faaaloalo lava.

FOFOGA FETALAI: O lea ua maua, o le finagalo lava ia o le Sui Fofoga Fetalai o lo o faatusa lava ia te ia. Malie sei tuu atu le avanoa i le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai, mo le faasaoina o le lauga matagofie a le sui usufono mamalu, aua o le faafitauli lea o la foi e tupu i atunuu mamao, o lea ou te iloa, e i ai le isi kamupani, o lea ou te iloa le tamaititi na alu ai, e onoselau e na filifilia ae na o le sefulu avanoa. E leai lava la se eseese o le mea lea e tupu iinei ma mea foi la e tutupu i atunuu mamao. A e silasila la o na e te fai mai e sefulumaletolu, ae o le tulaga lena, e sefulu avanoa ae onoselau ma ona tupu tagata na apply i ai. E le na o Samoa o lo o tupu ai le faafitauli lena.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai...

FOFOGA FETALAI: Se i avatu muamua le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ou te fia fesili atu lava i le Sui Fofoga Fetalai, o le toasefulutolu lea e tau fai maai uma a latou penitala faamolemole? O le mafuaaga ua ou laga ai le fesili, ona e faapea uma lava.....o le tele ia o matua e o atu ia te au, ua silia i le ono masina isi ua silia i le tausaga isi, na o le momomo o lou loto, ae ua ou matua le iloa po o le a le mea o le a fai i ai, na o le pau lava le mea, o le manatunatu i auala ia e pei ona aumai i le Tulafono Tau Faaofi, i nisi auala fou. Soia tatou te talanoa i galuega ia e faatino nei. O lau maitau foi i fanau uma nei e maualuluga uma o latou faailoga, ae na o le pau ia o avanoa ia e maua mai i fafo, o le o e tau apu, o lea foi e faatalatalanoa ma Niu Sila pe mafai ona tatala mai le avanoa,, e o atu ai a tatou..... Ou te le iloa pe ua toa fia selau ua pasi mai i tausaga uma i le kolisi maualuga lea o Ausetalia, o lea e aoga ai i le tulaga lea o le pota faapitoa i mea ia tai pei o inisinia, o le au kamuta trades eseese, matata faapitoa. O lea foi la e faatali ai lava le tulaga lena o lo o faatalanoa pea ma Niu Sila. O auala eseese ia o lea e taumafai i ai lo tatou Malo mo galuega fou. Taatia ia galuega ia o lo o faaalu pea, aua o le taimi nei, o le tele o mau konekarate ia e faatino nei galuega tetele a le Malo ma faigaluega ai le fia afe o le mamalu o le tatou atunuu, o mea o konekarate fai auala, konekarate teuteu auala, konekarate fau fale e ola ona o le Malo, o lea e faasalalau, faasalalau. E tai vaiaso uma lava e fonu ai le Komiti lea o Tauofoga ona o le alofa i nei fanau o lea ua tagi mai i le latou Malo, o le a le tali, o tatou nei o taitai o le atunuu, e le mafai ona maua ni galuega i le tatou fefefe e fai mea fou, a o lea foi e i ai ma mea o puipuiga aua atugaluga ia, o atugaluga ua leva ona foi faafia mai ai le Kapeneta ma le Komiti lea e ana le fautuaga.

Lau Afioga i le Fofoga Fetalai o le faafesili atu lena se i aumai se tali e.....

FOFOGA FETALAI: E fia faasaoina lou taimi, sei tuu atu le avanoa i le Minisita o Aoga ona avatu lea i le sui usufono mo le Aiga i le Tai.

Afioga Hon Magele Mauiliu: Faafetai mo le avanoa. O le aso ananafi sa ou lauga ai ma ou taua ai le survey lea na fai i Niu Sila ma ou taua ai pasene e fasefulutasi, o tagata o la e mananao i galuega, ae o lea sa tu ae le Taitai o le Itu Agai, ua matua ita lava ma faasinoino lima mai ia te au ma fai mai, e ese Samoa ese Niu Sila ae o lea ua faafofoga le Maota i lana saunoaga lea faatoa uma atu nei lava, e tutusa lava i nei ma Niu Sila. Ua tataua ona toe faatoese mai le Taitai o le Itu Agai.

FOFOGA FETALAI: Malie ia le finagalo o lau Afioga i le Minisita. Se i faatoese atu la le Taitai o le Itu Agai.

Afioga Hon Palusalua Faapo II: Ua uma ona ou faatoese ananafi. Ae leaga o lea e sao au, o le galuega lea na ou fai atu ai nei, o le software engineer. E le o ni galuega faigofie. Ae ua e silasila la i le aofai o enginner ia e i Ausetalia? O tamaiti faatoa iu Iunivesite, o lea ou te fai atu leaga ou te iloa, e toaonose lau ma ona tupu na apply i le avanoa ae sefulu avanoa a le kamupani tele i Ausetalia. O le mea lena o lea ou te fai atu ai, e tutusa lava le faafitauli lea e tupu ia tatou i nei ma le mea la e tupu i Ausetalia, a o galuega, o tamaiti faatoa iu mai i le Iunivesite, ma mataupu ia o lea e faigata foi ona maua i nei, e le faigofie la ona solve i se Tulafono Tau Faaofi lea ua fai nei.

FOFOGA FETALAI: Ia, Aiga i le Tai.

Susuga Ifopo Matia Filisi: Faafetai lava mo lou avanoa. Ua ou tulai atu ona ua taua Manono. Ae tasi lea mea aupito sili ona taua, o lea e faalogologo mai i saunoaga a le Maota aua e pei e tama i o i Palauli Sisifo le sui usufono lea e saunoa, ae pei e tina i Manono. O le mea lea ou te faafetai ai i le faamatalaga ua fai e tusa ai ma Manono, ae o le isi mea o lena ua iloa ai i ina le tautua lea o lo o fai e Manono e ala lea i le tautua i faigafaiva.

Ae ua ou toe tulai atu ma le faaaloalo lava i lau Afioga i le Fofoga Fetalai, e toe faapoopo nisi minute se tele o le lauga a lou uso lea e faauma ai lana lauga. Ma le faaaloalo lava. Faafetai.

FOFOGA FETALAI: Malo faafetai. Tulai mai le sui mamalu, lau Afioga i le Sui Fofoga Fetalai.

Tofa AGAFILI PATISELA ETEUATI TOLOVAA: Faafetai mo faauilavea. O le a ou tali muamua atu i le sui usufono mo Faleata Sisifo, e tumau pea lava lau faamatalaga e faalauaitele, ae a e fia silafia le tagata lea e uiga i ai lau faamatalaga, sui usufono, ou te le tau atua leaga e... ae toetiiti lava o lena uma Itu e faasasaga mai i ina. Ou te faasaoa le Taitai o le Itu Agai, i le tulaga lea e tasi le avanoa pe sefulu avanoa ae pe onoselau tagata. E ala ona ou faasaoa le Taitai o le Itu Agai, aua foi e le popole i ai aua o ona alo la e nonofo mau ai i o ma faigaluega ai i o. E le popole mai i le mea lea, le mea lea ou te popole i ai au ia, leaga foi e le agavaa lau fanau e maua se faamanuiaga, a faapea foi e toatele tagata....

Afioga Hon Palusalua Faapo II: Lau Afioga i le Fofoga Fetalai, o se mea e fia faasao....

FOFOGA FETALAI: Ia.

Afioga Hon Paluesalue Faapo II: Leaga o lau fanau o Samoa, e toe foi mai i Samoa. E toe foi mai, aua e sili atu opportunity e aoga ai ma galuega i o, ona toe foi mai lea ae o mai ua leai ni fanua. O le mea lea lau Afioga i le sui usufono mamalu, pe nonofo i fafo, a o le fatu o le Samoa e o mai ua leai ni fanua, ua faatau sitiseni.

Tofa AGAFILI PATISELA ETEUATI TOLOVAA: Ai e te finagalo e toe tulai atu le Afioga i le Palemia. E sao lau saunoaga, ae le tutusa avanoa. Amuia ou alo, aua a faapea e le maua agavaa i nisi o galuega, a le maua foi se galuega, e maua le penefiti e mafai ona ola ai. E le o se welfare state Samoa, a leai lava sau galuega too bad. A leai foi sou agavaa, pau lava.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai....

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e fia faafesili atu lava i le sui usufono, o lona uiga afai o la e manuia lata fanau i fafo maua ai a latou galuega tetee i le Tulafono Tau Faaofi, o le a le igoa o lona mea? E le o le manatu faapito ea le mea lona?

Afioga Hon Palusalua Faapo II: Lau Afioga i le Fofoga Fetalai, mo saunoaga faaoloataua lea e saunoa soo i ai le Palemia. Na pau lava le agaga, o la e o ae toe foi mai lava i Samoa. E le o sou manatu faapito, ae o le puipuga o le tofi o lau fanau i Samoa nei. O le tofi na ave ifo e le Atua, na tuu i ai e le Atua. O la foi e aoga mai iinei e oo mai i le aso i kamupani ia e manaomia le latou service. Ioe.

Tofa Aveau Tuala Lepale Niko Palamo: Lau Afioga i le Fofoga Fetalai....

FOFOGA FETALAI: Malie lau Afioga i le Sui Fofoga Fetalai.

Tofa Aveau Tuala Lepale Niko Palamo: Ona o lea e taua le matou Itu i le saunoaga. O le mea e fia faamalamalama e fia faasao foi nisi vaega. O le eseese o le mea lea e saunoa i ai le Sui Fofoga Fetalai ia Samoa ma Niu Sila, a lea na toe tali lava i lana saunoaga. A leai se galuega a le tagata Samoa, e alu fagota maua le tupe, e alu fai faatoaga maua le tupe, a o le tagata Niu Sila e leai se avanoa fapena e maua ai. O le isi mea ou te fia faamalamalama atu i le sui usufono o lo o saunoa, o le Tulafono Tau Faaofi leni o le sitiseni. Aua le aumaia galuega e taofiofi ai le autu o le Tulafono Tau Faaofi leni. Ma le faaaloalo lava.

FOFOGA FETALAI: Tulai mai lau Afioga i le Sui Fofoga Fetalai.

Tofa AGAFILI PATISELA ETEUATI TOLOVAA: O le tali i lau fesili lau Afioga i le Palemia, ioe, e maai uma lava penitala. Aua o le tatou

faamoemoe lea o lea e uunai ai a tatou fanau, a paie e uu le oso faamaai le penitala; E leai lava la se tamaititi o tamaiti nei e iu mai e matatupa le penitala. O le tulaga foi i le ituaiga faailoga, e sao lelei lava, e faigofie lava i tamaiti ia e maua a latou trades, skills e faatino ai. A o lau tuufesili solo i Iunivesite, po o le a se vaevaega o ituaiga faailoga, e pei lava o le onosefulu pasene o tamaiti nei e o mai i le Art Faculty, History, Geography, Sociology. E leai la ni mea faapea e faapitoa i ai faapea e o mai fai ni a latou pisinisi e faatino ai le latou galuega.

O le faauilavea a le sui usufono mo Faleata Sasae, ou te le iloa pe silafia e le sui usufono o Faleata i Sasae le mea e tau o le patuamo, faatoa tea ese nei patuamo ma lou ua ina ua ou alu i Niu Sila. Ao le faigata lena o le toto talo, amo popo, e pepe ai pau o lou ua ona faigofie ai lea ona fai lau avega aua e te le toe lagona se mea ua pe. Ou te le toe manao e oo sou atalii i se tulaga faapena na ou sau ai. A faapea ua laa i luga Samoa, ou te manao foi e laa i luga le olaga o sou atalii. A o mea na o patuamo, ou te iloa foi na patupatu le ua o le Palemia aua o latou mea na sa fai o le amo popo. E le o se mea faigofie la le toe foi i tua i le tulaga lea.

Tofa Aveau Tuala Lepale Niko Palamo: Lau Afioga i le Fofoga Fetalai. O le mea e fia faamalamalama ma faasao.

FOFOGA FETALAI. Malie.....

Tofa Aveau Tuala Lepale Niko Palamo: Ou te iloa lau Afioga e leai lava se sui usufono o nofo mai nei e le i maua i le mea lena. E leai lava se sui usufono e le i sau i le olaga lena e te saunoa ai. Atonu foi e tele foi sui usufono.....ou te iloa pe tigaina atu le olaga na ou ola mai ai nai lo le olaga lena e te saunoa mai ai. O le mea lea ou te tau fai atu ai i lau susuga, aua le aumaia galuega e faalafi ai le Tulafono Tau Faaofi, o le Tulafono Tau Faaofi o le sitiseni.

Afioga Hon Palusalua Faapo II: Lau Afioga i le Fofoga Fetalai o se mea e fia faasao.

FOFOGA FETALAI: Ia. E a?

Afioga Hon Palusalua Faapo II: E pau lava le tagata e le i ui mai ai i le auala lea, na o le Sui Palemia e ona le Tulafono Tau Faaofi. E le i patuamo lava, e le i amoa se popo, ae o lea ua sau ma lana Tulafono Tau Faaofi.

Tofa Hon Fonotoe Nuafesili Pierre Laufo: Lau Afioga i le Fofoga Fetalai...

FOFOGA FETALAI: Se i tulai mai lau Afioga i le Sui Palemia.

Tofa Hon Fonotoe Nuafesili Pierre Laufo: O e silasila mai i ou tauau? O le mafuaaga lena na ou faia ai le Tulafono Tau Faaofi lena, leaga na ou sau ai i le mea lea. Ou te malamalama lelei i ai. O lea la ua fai le Tulafono Tau Faaofi, o lea ua saunoa le Sui Fofoga Fetalai, ou te le toe fia foi i tua i lena ituaiga soifuaga na soifua ma ola mai ai. A o le mea e fia faasao, o lea e

tutulai mai lava le sui usufono lea mo Faleata Sisifo e fai mai a o le auga o le Tulafono Tau Faaofi o le Sitiseni. Ua uma ona faamalamalama, ou te leiloa po o ua faafia ona faamalamalama. O le auga o le Tulafono Tau Faaofi o le maua o galuega, lea e agai tonu i ai le saunoaga a le Sui Fofoga Fetalai, o ni galuega a alo ma fanau, o lo o fia maua ni galuega a alo ma fanau a Samoa, ae amuia lau fanau o lo o galulue i Ausetalia e tele le tupe Ausetalia e maua, ioe ma se soifuaga lelei. Ona pau lava foi o le latou filifiliga, a o Samoa nei e manaomia galuega.

Afioga Muagututagata Faamausili Auimatagi Peter Ah Him: Lau Afioga i le Fofoga Fetalai...

FOFOGA FETALAI: E a le sui usufono mo Sagaga le Usoga?

Afioga Muagututagata Faamausili Auimatagi Peter Ah Him: E sao ona o lau Minisita lea e tuuaina e le Taitai o le Itu Agai e leai sana patuamo. Lau Afioga, e le i amo popo ae sa amo taga falaoamata ma amo pusaapa, sa fai le wholesale a le aiga nei ae mamafa tele mea nei o pusaapa ma taga araisa aemaise lava le taga falaoamata e te paepae atoa ai foi pe a amo le taga falaoamata.

Tofa AGAFILI PATISELA ETEUATI TOLOVAA: Ia o le a faaauau atu pea le lauga a Paluali Sisifo, sa ou vaai i le nofo tumau a Moamoa i le Kolisi a Sanele, ou te iloa o le tasi lea nofotumau e ese le pologa. A faapea o oe e te soloaiga o lau galuega lava e te tamoe i taimi uma lea na sau ai le Sui Palemia. Ou te molimauina leaga sa fai a matou soo i aso la, ou te iloa lelei lava le tigaina o le palagi lea i aso la aua sa tau o le palagi. E le mafai la ona ou fai atu a mea e sese le tala lea, ae ou te fia faaopoopo atu i le saunoaga a le Sui Palemia, e pei lava ona ou fai atu i le amataga.

Tofa Hon Fonotoe Nuafesili Pierre Lauofo: O le mea e fia faasao lau Afioga, e le o se palagi o le Samoa le tagata lea

FOFOGA FETALAI: O tu lava ia ma aga...

Tofa AGAFILI PATISELA ETEUATI TOLOVAA: O le a ou alu ese ma lea tulaga lau Afioga i le Fofoga Fetalai, ae pei lava ona

Afioga Lafaitale Patricik Leiatuaalesa (Alataua Sisifo): Lau Afioga se i siaki ifo po o sitiseni le palagi lea, po o le mea lea e ala ai ona fai le tatou Tulafono Tau Faaofi ia faa-sitiseni ai.

FOFOGA FETALAI: E leai, o tu lava ia ma aga e pei ona manatu i le tulaga sa i ai le Sui Palemia aua o ia sa fafagaina uma le nofotumau i aso ia, o le ala faaeaea lena i ai o le nofo tumau ma faaigoa ai i lea igoa.
Tulai mai lau Afioga i le Sui Fofoga Fetalai.

Tofa AGAFILI PATISELA ETEUATI TOLOVAA: Ua tau galo foi le lauga i le tele – ae faafetai o lea ua tau faaiuiu atu le lauga a Paluali Sisifo.

Lau Afioga i le Fofoga Fetalai faapea le paia o lenei Maota, se o le faigata ia ona toe foi o outou alo ma fanau e toe gagau le vao. Ou te iloa e faigofie ia i tatou matutua nei aua na tatou masani mai ai, a o tatou fanau e fiu e toe tuli atu i lenei taimi. O naunautaiga uma lava na, o le amataga o au upu e faamamafa sau tautalaga i le faamoemoe o le Tulafono Tau Faaofi. O le intention, o le faamoemoe o le Tulafono Tau Faaofi lea ua leva ona lauilu i lenei vaiaso atoa, ae pei o le mea o lo o tulai mai e pei o lo o fefe i le Tulafono Tau Faaofi. Ou te manatua e le i mamao atu nei le tele o faamatalaga, tele le tetee, tele faaupuga i le Tulafono o le Casino, na oo lava i le Ekalesia Soofatasi na tetee, ua tatau ai leaga o le latou galuega lea. O i ai ni faafitauli o tulai mai nei? O i ai ni faafitauli e faavae ai le tetee lea? E i ai le faafitauli na tupu i le Casino lea i tua i le va o le Kerisimasi ma le Tausaga Fou, ua i ai tagata ua o atu e fia taaalo ai, o tagata ua tai 25-30 tausaga o nonofo i Niu Sila e le i talia aua o la e o atu ma o latou tusifolau Samoa. E fia sefulu tausaga o i Niu Sila ae feoi i tusifolau Samoa. Po o le a le papae o latou mulivae ma le mumu o latou alafau e le it alia, o lo o mulimuli tui lava le Faletalimalo ma le Casino i le Tulafono a tatou e pei foi o le mea lea. O lea tatou te fefefe po o le fefefe o le toatele i lenei Tulafono Tau Faaofi. Ua ou manatua le ata tifaga sa ou matamata ai, o le Taitaiua toa a Siamani o Ramos's o le taua o le toafa, o le a lafo le pogisa ae tilotilo mai le taitaiua a Simani na o le 250 lana au tau ua faafesagai tonu lava ma le autau tele a Peretania. Ua leai lava ma se isi mea e alo ai aua o le malama o le taeao osofai loa latou. Ona faapea lea o le taitaiua lea i lana autau, e le mafai ona tatou faafetauia le autau a Peretania e tele taavale tau, tele tane tau, tele fitafita, ae faapea. A po loa, ona outou o uma lava lea e faaola a outou taavale ona outou faataamilomilo ai lava lea i le toafa i le po atoa. E faafofoga mai le autau a Peretania ua amata ona toe faaopoopo atu le autau a Siamani, e malama ane le taeao ua toe solomuli i tua i le lima maila se i toe fuafua mai ai pe faapefea ona fai se plan i le autau faaopoopo lea, e leai ma se autau faaopoopo. E fefefe i luga o le le mafaia o se mea, e fefefe i luga o le leiloa o se mea, ona saogalemu lava lea o Ramoss ma lana autau na o le 250 ua sosola, ae o atu Peretania e leai lava ma nisi o i ai i o ae na o pau lava o taavale na feoi ai ma tane tau ae leai ma se autau o i ai. E faapena uma lava lau faatusa i lenei Tulafono Tau Faaofi, o le tele o tagata fefefe lea e i ai. O au upu amata ou te toe faai ai.

FOFOGA FETALAI: Malie le sui usufono se i tuu atu le avanoa i se tasi o sui usufono mo le Palota Taitoatasi.

Susuga Hon Papaliitele Niko Lee Hang (Palota Taitoatasi): Lau Afioga i le Fofoga Fetalai, e leai se manatu e fia faalavelave le lauga matagofie a le Sui Fofoga Fetalai. Ae leaga o lea ua taua soo le upu lea o le fefefe, o le mea mooni lau Afioga e le o le fefefe a o le popole leaga e ese le fefe ese le popole.

Ma lou faaaloalo lava.

Tofa AGAFILI PATISELA ETEUATI TOLOVAA: Faafetai i le faauilavea a si ou uso a tuaoi, o le lau o le fiso lau o le tolo, o le fefe lava o le popole.

Lau Afioga i le Fofoga Fetalai, o le a faaiu atu se tala a Palauli Sisifo. O upu sa ou amata atu ai “o lapataiga mo le ola e tua i faamanuiaga”. O le tusi faitau e agai i ai le autu lea o le Salamo 1, e tolu lava lapataiga na e aumai i le Salamo 1. Aua e te savali i le filifiliga a e amioleaga. Aua e te tu i le ala o e agasala. Aua e te nofo i le nofoa o e tauemu, lea la e i ai le taimi lenei. O sau faamanatu lena i lenei Itu i le tuualalo a le Aposetolo o Paulo ia Timoteo lona atalii, 1 Timoteo 1 ft 8, “o tiakono foi e tatau ona faatoeaina i latou”. A o le faa-Peretania “deacon should be serious. O le serious ma le faa-toeaina e matua le faaipoipo a o le faa-Samoa lea, o le faailogaina lena o le loloto o le tofa a toeaiina ma o tatou matua ma le mana o le Atua na tuuina i toeaiina na faaliliuina le Tusi Paia. O fea lava o le serious ma le faatoeaina e fealofani ai, e matua eseese lava, a o le faa-Samoa lena o le faatoeaina, serious, o le faatoeaina e fetuunai le tofa. O le faa-toeaina e loloto le tofa, o le faa-toeaina e loloto le tofa lea e i ai le Tulafono Tau Faaofi lea.

Ia manuia le Fono, faafetai.

FOFOGA FETALAI: Malo faafetai saunoa i lau Afioga i le Sui Fofoga Fetalai.

Afioga Hon Palusalua Faapo II: Lau Afioga i le Fofoga Fetalai, o se mea e fia faasao i le saunoaga lea. O le faatoeaina o le alofa, o le faatoeaina aua le fefe, o le faatoeaina ma isi mea na lau mai, aemaise o le Salamo 1 lae fai mai “aua e te nofo i le nofoa o e tauemu”. O ai lea e nonofo i nofoa ia lau...o lea matou te nonofo atu o le alolofa moni ia Samoa ona o le tofi o le a faatau, o le mea lena o lea matou te nonofo atu ai ae matou te le faatauemu. A faatauemu...le tofi o le a...– i o le mea lena e fia faasao i le saunoaga a le faafeagaiga.

FOFOGA FETALAI: O lea e manino le folasaga le Taitai o le Itu Agai, e manatu foi e le o se mea tatou te agai ai i se faafinauga, o lea lava e manino le folasaga, o upu tomua ia ma upu taiala o le lauga a le sui usufono. O lea foi ua agai i le Tusi Paia, ia e felefele pe a tatou toe agai foi e fai lea tulaga, ona ou manatu lea o lena lava e agatonu le finagalo o le sui usufono e ala i lana saunoaga. O a foi ni manatu o lo o agai i ai le maitau a le Maota, malilie nofonofa ia le tagata ma omiomi lana faaliliuga, a o lena lava e avatu le avanoa se i outou tutulai foi i le taimi tou te saunoa ai ona aumai foi lea o ni a outou faamanatu. E le o ni upu olegia lea e saunoa i ai le Sui Fofoga Fetalai, e manino ma malamalama.

O le a lafo atu le avanoa i lea itu o le Maota i le sui usufono mo Faasaleleaga Nu. 3.

Tofa TUILEUTU ALAVAA VOI (Faasaleleaga Nu. 3): Sa ou nofo ma ou mafaufau pe savali pe nofo, ua leva, o le mea e i ai le vai e fiu a e toe alu lava i ai. O lenei aso ma le faamoemoe o le mamalu o le Palemene i lau Afioga i le Fofoga Fetalai, faapea foi le Afioga i le Palemia, Afioga i Minisita e faapea foi i lenei Itu i lau Afioga i le Taitai o le Itu Agai aemaise o le Fonotaga ua tauaofia nei. Ua laga se leo ma se taofi o lenei Itumalo leaga o le aso ma lona taa, o le taeao ma le mea e tupu ai, e pei ona ua taoto ai nei i le Laulau a Fono. O le vaai ua leva ona lauiliu ma filii le tupe toa ma le manoa saili i le tofa mamao ma se faautaga mamao e uiga i lenei Tulafono Tau

Faaofi. Afai foi la, ua ao ma tatau ai ona tofua lagona le fitaga ma se taoto mai o le Tulafono Tau Faaofi e pei ona i lumamea nei.

E i ai le tala a le tamaloa foi lea o Matini ina ua tagata valeina sa fai ai le tala a lana senior associate po o le tagata e latalata i ai, ina ua maliu ma tagata valeina, o mea na fai e fuafua mo se manuia ma se fiafia o tagata i lea foi tagata uli tautaua i lana galuega ma lana misiona, ae te i ane ua tagatavaleina. Fai mai le tala a le tamaloa, o mea lelei uma na fuafua ma le faamoemoe i le agai ina tautaua ua le aoga atoa, whatever happens directly affects all the people indirectly. E foliga faapena ae le o lea foi le agaga, o le agaga o le Tulafono Tau Faaofi o le faafetai, i le afua o le lagalaga ma le silasila mamao aua e le mafai ona toe o pe toe solomuli i le soifuaga faigata. E le mafai ona tatou toe tepa e tilotilo ma vaavaai e pei ona saunoa le tele o sui usufono, ua tatou malamalama i le soifuaga o o tatou tuua ma matua i le afua mai o le atunuu. O le aano ma le fatu e pei e faamuamua lava ia i tatou measina, o lo tatou tofi, o le tatou palapala, o le eleele, o le mamalu, o tofiga o mea. O lea la e tausisi lava ina ia faapena le uiga. A o le vavala mai ma le maotino o le soifuaga ua tatou i ai, o mea ia e ao ona fai foi e faigamalo, ma e taitai mataala ma i tatou aua fuaga o faigamalo ma le manuia o tagata. O lea la, o lea la. O lenei aso, e le tele se upu a Faasaleleaga Nu.3, a o le agaga ma le lagona e ui lava i le tatou ... pei ona talanoa atu ma avatu foi le agaga i le Taitai ma lenei Itu, ia, o le tagata malamalama ua na iloa atu luga, a o le na te talia meaalofa, na te lepeti le nuu. E le o se uiga e faaagaaga, ioe. O mea e maua, aua ua talitonu foi le agaga i le soifuaga o le lalolagi ma tagata uma, ia, ua tatou lagona lava le mea ua ia i tatou, ua leai se isi o toe atoatoa, ae o le vaai i le Pulega ma le taitaiga a le Afioga i le Palemia faapea foi le Maota, le laulau, le Aiga Kapeneta faapea foi lenei Itu ma le mamalu o le Palemene. Faafetai lava afua lagalaga, afai foi e fetoi ai ma tatou... leai o agaga ia o faigamalo lelei. Faafetai ua taunuu le upu foi lea na fai e Malietoa ma Sauluaga, ua tatou avafatafata, ua lagona malie ma lagona vave le mea, ina ua see mai i le Maota lenei ua tatou felataai, ua vaai mai i le fatafata ua pei e lagona e le tofa, ua lagona le faigofie aua le atiaieina ma le taumafaiga e ala i upufai ma tulaga o le tatou Malo. O lenei la aso, e le umi se leo.

Na pau lava o lea, lau Afioga i le Palemia faapea foi le.... ua umi le tatou Fono, ae so o se itu lava, o lea ua avatu le agaga o lenei itumalo ma le faaaloalo, o lena o lo o.... E mafai e le tagata maona ona tetee le meli suamalie, a o le mapu i tiga e suamalie mea oona uma. O le aso, o le leo lea o Faasaleleaga Nu.3, ia alofa mai le Atua ia faapaolo mai ona aao i tualumaga o le tatou Tulafono Tau Faaofi, faafetai. Na pau lava lea, o lena e i ina le tofa, ia taitai e le Atua o tatou agaga ina ai faapena ona manu faaifo mai lagi le tapuaiga a Samoa. Ia manuia le Fono.

FOFOGA FETALAI: Malo. Faafetai saunoa i le saunoaga faalaeiau a lau Afioga Tuileutu, o le saunoaga momoli foi lea aua le paia o le itumalo o Faasaleleaga Nu.3. O tulaga lava ia o tuleiga ma saunoaga aemaise o apoapoiga, ua logo i tino matagi lelei, e manatu foi ua faafofoga ma le manino le Maota i tulaga o felafolafoaiga. E i ai le talitonuga ua taatia i lagatonu, ua nofo fale foi ia Satuiamaa i aai o finagalo, aemaise foi o le faaaaogagase o le tatou Fono mai lava i le Aso Lua lea ua tatou taunuu i le toe aso, a ua taua lau faamanatu, malo le tofa.

Ua ou lagona o le a tatau ona fai se tatou malologa aua ua ou lagona ua tatau ona fai se taligasua o lea ua tatou pasia le afa o le aso, ma e i ai le talitonuga o le a tatou faia se malologa puupuu, tatou alo i le taligasua po o le lunch o le aoauli ona toe faaauau ai lea o le tatou Fono.

E faasilasila atu o le a faataatia ese Taulumaga a le Fono Aoao mo lana malologa masani o le aoauli.

Na faataatia ese Taulumaga a le Fono Aoao mo lana malologa i le itula e 1:07 i le aoauli ma toe faaauau i le itula e 1:45 i le aoauli.

Na toe faaauau felafolafoga i luga o le faitauga faalua o le Tulafono Tau Faaofi o Tulaga Tagatanuu i le Teufaafalgaluegaina o Tupe Mai Fafu 2014.

FOFOGA FETALAI: E faasilasila atu ua toe amatalia nei Taulumaga a le Fono Aoao Faitulafono. O le tatou taimi ua tatonu le itula e 4:00.

Ia, o lo o faagasolo pea le tatou galuega e tusa ma le tatou lafo faatu i lenei aso. E i ai lo tatou talitonuga e le o toe mamao ona faapena lea ona faaiuina le tatou galuega. A o le apoapoi lava ia a le Fofoga Fetalai, sui usufono mamalu, ou te manatu o lea ua amata ona atoa tino o le tama na moe i le ala. E apoapoi atu pea i tuleiga ma saunoaga o lea ua manino ma malamalama i le lautele o nisi o sui usufono mamalu i tuleiga ma saunoaga, e i ai le talitonuga tatou te faimea faasolo, tulituliaupu foi le tatou galuega ina ia maea foi le tatou galuega i le aso, taeao le Aso Toonai, ona oo atu lea i le aso Sapati e fia malaga foi matou o sui usufono Savaii i Savaii. Ae lafo atu pea i le paia ma le mamalu o le tatou Maota aua le faaauauina o le tatou galuega. E faia le tatou malologa ua maea ona faalupe le saunoaga a le Tuiatua Faanofonofu, o se tasi o sui usufono mo Aleipata Itupa i Lalo.

Tulai mai lau Afioga Tafua.

Afioga TAFUA MALUELUE TAFUA (Aleipata Itupa i Lalo): Faafetai i lau Afioga i le Fofoga Fetalai, e le taumate foi ua maua se faasiliga malosi i lau Afioga i le Palemia ma lau Afioga faapea foi le mamalu o le Kapeneta ae tainane Minisita Lagolago, faapea foi le Sui Palemia o le tatou Malo. Ia, liliu foi alo o le lupe i le la Itu, maua foi se faasiliga malosi i le Afioga i le Taitai o le Itu Agai faapea le Sui Taitai ma le mamalu o le tatou Itu Agai, Minisita o lo o agaia le Malo. Ia, faafetai atu ai foi i lau Afioga i le Failautusi o le Fono ma le Sui Failautusi ma le mamalu o le Ofisa o le Palemene, faapea foi Ofisa Sili o Pulega faapea foi Pule Sili o Matagaluega ma Faalapopotoga a le Malo. Malo lava le onosai, faafetai le tapuai.

E momoli atu foi le agaga faafetai i lo matou itumalo pe afai o faafogafoga mai. Aleipata, o le a fai se tatou sao aua le Tulafono Tau Faaofi o lea ua alu nei le fa aso o milimili lava. O le aoga ia o lenei Tulafono Tau Faaofi, o lea ua ou iloa ai, o le Afioga i le Palemia e tupuga mai le toeaina Lepa o lona tuua le toeaina e igoa ia Tuilatepa i Toga, toe Tuilakepa foi i Fiti. O le toeaina lea e ona motu ia i Fiti, atonu e tausoga ai ma le toeaina o Banimarama. E le gata foi i lea lau Afioga i le Fofoga Fetalai, o lea foi ua ou malamalama ai e feainai le Aiga Sa Tunumafono i o la sui usufono na aumai, ae fealofani sui

usufono mo Falealili. E pei o le aoga lena o lenei Fonotaga i lau usugafono, e vaai atu i ai ua....

Afioga Hon Palusalue Faapo II: Lau Afioga i le Fofoga Fetalai o se mea e fia faasao.

FOFOGA FETALAI: Malie lau Afioga i le Tuiatua leaga o lea ua e taua le tulaga lea i sui o Sa Tunumafono.

Afioga Hon Palusalue Faapo II: O maua o le aiga, vaeatu le Afioga i le Minisita. A oo lava i taimi o Fono, e le milia faauu upu, ae tumau pea le fealofani o le Aiga Sa Tunumafono, leaga o le aiga, o le Aiga Malosi e tasi ia Samoa, ioe. E le mafai ona aveesea le mea lena. Po o a ma feupuaiga ona o le Afioga ia Manualesagalala o le Minisita, o au o le Taitai o le Itu Agai, e le mafai ona aveesea ai le mea lena, leai e tumau i le fealofani e oo i le faavavau, ma te toe omai foi i le isi faiga palota.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ina ne i te i ua galo i le Afioga i le sui usufono, o le mea e fia faasao. O lea foi na aliali ai i le Fono lenei, o le Afioga ia Palusalue o se maupaolo i le ma afafine ma Leaupepe.

Afioga TAFUA MALUELUE TAFUA: Faafetai i lau Afioga i le Palemia faamanatu mai, ua galo ia te au le vaega lea.

FOFOGA FETALAI: Malie lava e le manofonofa le Afioga i le Minisita, tulai mai, o se isi faamaluluuga lea lau Afioga i le Minisita?

Afioga Hon Manualesagalala Enokati Posala: E leai o lou uso a faipule e fai ma faatoese, a o au, leai e ala ona ou le faatoese ona e leai se mea o sala ai i totonu o le Maota. Lau Afioga, o la e lava e manino le mata o le vai, o le Afioga i lou uso a faipule, o la e Taitai o le Itu Agai, a o au lea e i totonu o le Malo. Fai mai le isi toaina o le matou itumalo, fai mai, “Sau, sau e alu” o le mea lena lea na ou sau ai i le tofi, “Sau e alu, na fai atu foi ia Palu e alu i le Malo, ae ua ese le mea la e ua alu i ai. Sau laia e alu.” Ma le agaga faaaloalo.

Afioga TAFUA MALUELUE TAFUA: Malo faafetai. Faafetai lava le fesoasoani ma ii le lauga a lenei itumalo. Ia o lea foi ua ou manatua o lea ua saunua le Afioga i le Minisita i le faatoese, Palu, e le galo ia te au le mea na afio mai ai le Palemia o Niu Sila le tamaitai o Helen Clarke e faatoese ia Niu Sila, a o lea o le a ou fai atua le tali a le Afioga i le Palemia na ave i ai, “to err is human, to apologise is divine,” po o le sao ea lena o le upu pe a. Ae malo le onosai, e ese lou agamalu o le mea lena e alofagia ai oe e le tou Pati ma faataitai oe.

Lau Afioga i le Fofoga Fetalai, o le Tulafono Tau Faaofi lenei, na ou fesili nei lava i le Loia Sili, ua faagasea le tatou Palemene, pe aisea na le faaopoopo ai le vaega 2 lea o le acquisition a le citizenship lea na saunua i ai Lefau, e maua le sitiseni i le fanau mai, ia, po o le descent po o le nofomau ma le

faaiipoipo atu i le sitiseni Samoa. Ae ana faaopoopo la i ai o le citizen by investment, atonu lava e le tele tele se afaina, nei lava i le malologa lea na uma atu nei. Ae saunoa mai le Loia Sili, e sao e manaia foi sou manatu, ae pau o lea, e tele nai lavelave ae i ai nai isi issue foi nei pei o land acquisition ma vaega uma faapena. Ua ou le manatua uma le tali a le Loia Sili, ae pei o le mea taua lena fai mai e lavelave ai le Tulafono Tau Faaofi. O lea la ua i ai sou manatu, ia, o lenei Tulafono Tau Faaofi e foliga mai e faatosina mai le au mauoloa e malaga mai i Samoa, ae pei e i ai foi nai ona lona, e faigata la lenei mea ona e tu le isi ou vae i le tetee, ae tu le isi ou vae i le lagolago ona o le alofa. E pei o upu ia e faavae ai lau lauga, o lou loto e tetee i le Tulafono Tau Faaofi, ae o lou alofa i tagata le galulue o lou itumalo faapea ma le lautele o le atunuu, pei o i e faavae ai ni manatu. Ae o le a fai atu pea ni manatu ou te le toe asa le gasu ua tea, leaga ua uma ona saunoa nisi o sui usufono ma ua vela foi le fala i le mamalu o le Palemene, ae o nai manatu ia e tuualalo atu, tuumumusu, faufautua ma lapatai i lau Afioga i le Sui Palemia ma le tatou Tulafono Tau Faaofi, ae maise o le lilifa o le fautuaga i le Komiti latou te faatinoina lenei Tulafono Tau Faaofi.

O le vaega muamua la lea ou te fesiligia pe ou te fia talanoa i ai, o le \$4miliona lea e malaga mai ma le mauoa. O le manaia ia o le \$4miliona pe ana faapea o le tagata lea e malaga mai Europa, so o se mea lava o Europa, po o Siamani po o Egelani po o fea lava, ae sau ma le \$4miliona Euro. O lona uiga la tusa o le target, e \$8miliona ae faigofie ona tau o le \$miliona, e faapena foi ma Amerika, Ausetalia ma Niu Sila. A faapea la o le vaega foi lea mo se faataitaiga, e tatau lava ona tatou target ina le \$8miliona, afai la o le Saina e sau po o le Korea po o le Taiwan, po o ai lava le tagata investor e sau, tau pea i ai le \$4miliona equivalent i le \$8miliona Samoa. Pei o le agaga lena o lou talosaga atu ia silasila totoa pea le Komiti ma lau Afioga i le Loia Sili aemaise lau Afioga i le Sui Palemia, pe i ai se isi vaega e mafai ona faaofi i ai le vaega lea i totonu o le Tulafono Tau Faaofi.

Lua, manaia pe ana i ai se tapulaa o lo o iai i le Tulafono Tau Faaofi o lea e malaga mai le tagata maumea i le tatou atunuu, sau ai lea ma lona toalua ma le fanau i lalo ifo o le fia ea tausaga la e i totonu o le Tulafono Tau Faaofi, o lona uiga, e tatau ona i ai se tapualaa o tagata nei e omai. Aua a faapea la pe 20 le aiga lea e omai, pei ua fai si gau o tatou na o le \$4miliona a o lea e toatele ia e malaga mai. E tatau la ona i ai se fuafuaga faapea e le faapea o le a avea ma mea e toe tetee atu ai tagata e omai e invest i Samoa, ae lelei o la e ua i ai se tapulaa e puipui ai le influx o le omai o tagata.

I lea lava nota o le influx, e fai sau tala i le 1992 o aoga le fanau i se tasi o kolisi maualuga i Niu Sila e taua o Wesley, na vaelua le aoga lea talu le toatele naunau o tamaiti aoga, e 2,000 tama 2,000 teine. I lea la vaitau i le 1992, pei lava na o le toafa tamaiti Asia sa aoga ai. Introduce loa le mea faapea i Niu Sila ua allow tamaiti overseas e omai e aoga faataga ai ma latou investment, masalo e 12 i le 15 tausaga, ua 40 pasene o le aoga lea a Wesley College o tamaiti Asia. O se tala faataitai e avatu i le mea e ono tupu ma e ono tupu. Ae i lea lava nota, masalo pe tatou te le o mautinoa pe i ai pe leai nisi e omai, aua o Niu Sila ia o lea lava e faaupu e moni lava e remote pei foi o tatou, ae tele galuega, e tele faamanuiaga e i ai, e i ai minerale, e i ai le forestry, le fishing ma mea uma faapena. E le pei o tatou e le tele ni a tatou mea e faatosina mai ai le au maumea, ae talosia ia aua afai lava e omai pe maua se tatou toasefulu pe toavalu, viia le Alii. Ae afai lava e tai \$8miliona

Samoa, ia ua feoloolo si na seleni e faaopoopo i le tatou paketi e maua ai foi tagata faigaluega o le atunuu. Ia, a o le isi itu o le tupe, se e fuafua lava loto loto, faafetai Lefau, o loimata e oona, ae atonu o le fofu lea o le fatu pe a tiga. Malo le saunoa, manaia tele lau tuualalo mai i le Malo. E leai lava se tasi o tatou e le faafuafua i lea tulaga. Ae a faalogologo foi i saunoaga a le Palemia ma le Sui Palemia, ona fetuutuunai lea. O lea la e pei ona ou fai atu, ou te tetee i le Tulafono Tau Faaofi i lou loto, ae o lou mafaufau ma lou alofa i le atunuu, aemaise o lou itumalo la e faafofoga mai. E selauluasefulu pe selaufasefulu taulelea o lou lava nuu e le galulue, e le faigaluega. Ae silasila le mamalu o le Palemene ma lau Afioga i le Fofoga Fetalai, a ou alu i tua e fai se galuega po o le toto o nai niu po o le fai se maumaga, e amata loa i le valu, ta le sefulutasi, sefululua ua fiu e toe tauanau, ua amata ona taotooto i lalo o fuafua, valaau atu ua leai ma se isi e toe gaoioi mai. E mafua la i se a? E fai foi lava si faigata o tagata. E tiga lava pe avatu i ai le seleni, e leai lava ma se isi e faigaluega i le lima itula, o le tolu lava i le fa itula, malolo, e te fiu e toe taumafai ua le mafai. O le tulaga lena, ou te faamoni ai foi i nisi o saunoaga ua mavae, o le faigata ia o le atunuu, atonu o le mea foi lea na aumai ai e.....

Tofa Lealailepule Rimoni Aiafi: Lau Afioga i le Fofoga Fetalai.

FOFOGA FETALAI: Malie lau Afioga i le sui mamalu sei avatu le avanoa.

Tofa Lealailepule Rimoni Aiafi: Ou te fia fesili lava, manaia tele le lauga a le Afioga i le Tuiatua, ou te fia fesili lava i le mea lea o le loto ma le mafaufau, aua o lea e faapea mai o lona loto e tetee a o lona mafaufau e lagolago. Manatua foi o le tagata o le loto o le mea e faamaoni a o le mafaufau o le mea e femeimeiai. E fia iloa la po o le a tonu le faamalamalama o le vaega lea.

FOFOGA FETALAI: O le faasaoga ae le o se fesili, ona e le faatagaina ni fesili na o mea faamalamalama.

Afioga TAFUA MALUELUE TAFUA: Faafetai lava i le sui usufono mo le faauilavea. What comes from the heart, ia o lea e faailoa atu i le taimi nei. A o le loto lava ia a alu pe leai se tupe ua le fit i le la taaloga, e tolenileni lava pei lava o la e i ai se mea, ae leiloa o le fatu la e alu ai, o le eseese lena lau Afioga. E i ai le alagaupu faa-Peretania e faapea, chance favours a prepared mind. O lona uiga a faa-Samoaina, e lilifa avanoa i le mafaufau e lava tapena, chance favours a prepared mind. O lou manatu la, o le manaia ia o finagalo o sui usufono ua faaalua, ina ia malu puipuia ai itu uma o lenei Tulafono. Aua e le tuumamaina lenei mea o le sau sau lava o lea faavasivasi, milionea le faamamaina i fafo, tei lava ua tolu tausaga maua sana sitiseni, ua tutusa ma au le aia, aiatatau, aia i so o se mea, ma o tatou foi e iloa loa o le toaina e tele tupe milimili loa ae avatu e fai le matai, e maua ai nai tupe a toaiina i tua. E faapena le agaga o tatou, e faigofie ona faamatai lenei tagata.

Tofa Hon Tuuu Anasii Leota (Siumu): Lau Afioga i le Fofoga Fetalai.

FOFOGA FETALAI: Malie lau Afioga se i avatu le avanoa i le faauilavea. O se mea e fia faamalamalama po o se mea e fia faasao Tuuu?

Tofa Hon Tuuu Anasii Leota: O le mea e fia faamalamalama lau Afioga. Ou te fia malamalama po o le a le uiga o lenei upu e le faamamaina i fafo. Ma lou faaloalo.

Afioga TAFUA MALUELUE TAFUA: Sa ou faapea e le faalavelave le sui usufono mamalu i lau lauga ae faafetai mo le fesili. I le first reading i le Aso Sa na tea nei i le tatou Ekalesia, o le Tusi a Levitiko 44 e tau i le 46, The Lord said to Moses and Aaron, if someone has on his skin, a scab or pustule of spot which appear to be sore, it shall to be brought to Aaron to priest one of the priest on his decendants he is unclean. O lona uiga la o le uiga lea o lau tala, ioe. Ma le faaloalo lava lau Afioga, unclean, o lea foi e i le Tusi a Paulo i le Au Korinito Mataupu 31 fuaiupu e 11. O lona le faamalamalamaina o le le faamamaina lau Afioga, o le unclean. Faafetai mo le fesili. Ina ua ou faatoa ou vaai i le Tulafono lenei ma ou faalogo i le Tulafono ina ua potopoto le tatou Palemene i le Maota fonu o Tofilau Eti Alesana i le tau faaofiina o le Tulafono. Sa muamua lava fai lau tala faapea, I raise on air of concern i le Tulafono lenei, o lona uiga e i ai se lapataiga ma le faaeteete i lenei Tulafono, talu ai o le tuu atu lea o tatou measina i le faavasivasi lea milionea e pei ona ou taua le faamamaina malaga mai fafo. O ia o se tagataese ae o lea ua sau tutusa maua. E tutusa uma tatou, ae ou te ava foi i le saunoaga a le Palemia, o tagata uma ia i le tatou Palemene ua filogia uma, ae pau lava le eseesega, o tagata lea e i le Palemene, ua leva ona tautua i le atunuu, o matua o matua, e fai si maotua o tupuaga o tagata. Pei ona saunoa si ou uso, faatoa ou iloa ai foi o le Siamani si ou uso o Ifopo, e i ai lona pito Siamani. Malo Ifopo le tautua, faafetai foi i na eka e afe valuselau sa outou inu i ia mau aso e tele, ae faanoanoa ai le loto e leai se mea a si toeaina o Toleafoa na maua ai. O le uiga la o lau faamatalaga lau Afioga i le Fofoga Fetalai.

FOFOGA FETALAI: Malie lau Afioga i le sui usufono mamalu, leaga o lea sa e taua, o lea ua tulai mai le Aiga i le Tai.

Susuga Ifopo Matia Filisi: Lau Afioga i le Fofoga Fetalai, e na o si mea faigofie lava, e maua ai foi se malologa a le sui usufono lea e saunoa. Aveese le Siamani ae tuu i ai le Samoa. Faafetai.

Afioga TAFUA MALUELUE TAFUA: Faafetai i lau Afioga, ou te popole foi i lau joke lea na fai half cook Samoan, ae e le mafai la ona ou fai atu o oe o le half Samoan ua fai si maotua mai o lou tupuaga, ae ua lelei. Lau Afioga i le Fofoga Fetalai, ou te faamalulu atu i si ou uso mai le Aiga i le Tai. O le mea la e tupu i le Tulafono lenei.....

Afioga Hon Leaupepe Toleafoa Apulu Faafisi: Lau Afioga i le Fofoga Fetalai.

FOFOGA FETALAI: Malie lau Afioga i le sui mamalu ona o lea foi sa taua le itumalo o le sui usufono. Tulai mai.

Afioga Hon Leaupepe Toleafoa Apulu Faafisi: Ua ou tulai atu ona e taua tele ina ia talatala i tua le silafia e le Palemene, aemaise foi o le faafofoga tapuai mai a le atunuu aemaise o lou itumalo. Ona o le afe valuselau eka lea e taua e le sui usufono o le Aiga i le Tai, faasao ua ae.....o le tele o tama Saina, na toai taunuu i Samoa, o o sa galulue ai. Sa tausi poloka ai i le eleele lea. O lea la ua tulai mai nei, o lea la ua latou atinaeina le atunuu, i le tulaga tau pisinisi, masalo e faasao mai foi au e le sui mamalu. O ai a latou o tama Saina ua faapena ona tamaoaiga i lenei taimi, o o na fofoa mai ai i le eleele lea. Ina ia silafia ai e le Palemene ma le atunuu le taua o galuega sa fai foi e ia tagata mai fafo. O lea la ua toe foi, fai i lagi le folauga, taape foi suli i mea o lo o i ai o latou aiga taulagi, ae taoto lava le eleele o Fasitoo ia. Ma lou faaaloalo.

FOFOGA FETALAI: Malo, o lea ua malamalama.

Tofa Levaopolo Talatonu: Lau Afioga mo le faasaoina lava o le.....

FOFOGA FETALAI: Sei tulai mai le sui mamalu.

Tofa Levaopolo Talatonu: O lea ua saunoa ia.....ia tau ia o le Samoa po o le half cook Samoan, ae mafai foi ona o le pito Siamani, e mafai ona tau o le half germ Samoa.

FOFOGA FETALAI: E leai o le upu o le German, e leai se upu tagatanuu e tau o se Germ, o le German half German. Tulai mai le sui mamalu e faaauu le saunoaga.

Afioga TAFUA MALUELUE TAFUA: O si ou uso mai le Aiga i le Tai e le o se siama, o le tagata e lapoa tino lelei.

FOFOGA FETALAI: E i ai se isi mea e te toe fia faasaoa Ifopo o lena ua ou vaai atu ua.....

Susuga Ifopo Matia Filisi: Faafetai i lau Afioga i le Fofoga Fetalai, ua tau lagona foi le tau faanoanoa laititi. Ae e leai, ou te le o manao lava ou te faalavelave ua manaia foi le saunoaga a le sui usufono lea. Faafetai foi i si ou tama ia Leaupepe mo le faamalamalama o galuega sa fai. Ae o lau tala lea na fai atu analeila e tusa ma le mean a tau ai le half cook half Samoan, o lena e malamalama lava, ao le uiga tonu lava, o tatou a le tama i fafo a le o le Peretania ae tina mai iinei i Samoa, a le tina foi i Amerika, ae tama mai iinei i Samoa, e pei o le uiga sao lea o le faamatalaga lea nei tei ua le malamalama ai le sui usufono lea o le Green Power. Ma le faaaloalo. Faafetai.

FOFOGA FETALAI: Tulai maia e faaauu le saunoaga.

Afioga TAFUA MALUELUE TAFUA: Faafetai lava mo le faalavelave a le sui mamalu. O le tuualalo mo le tatou Komiti faapitoa mo le vet ina ma le silasila totoa i talosaga pe a aumai, o lau fesili la mo tagata foi ia e o mai ma o latou alo e i lalo ifo o le sefuluono tausaga, aua o lona uiga o le a tuu i ai le avanoa e aoga ai, e le gata i lea a iu o lona uiga foi e tai talafeagai lava mai

aoga ia entitle loa i avanoa sikolasipi, pe faamata e i ai se fuafuaga a le Komiti e silasila totoa i lea vaega, mo le puipuia o le avea o tagata nei fai mai e lei atoa se fa lima tausaga, ae maua le sitiseni Samoa ona aia tataua lea i le sikolasipi faapena foi ma malaga atu ai i fafo e aotauina. Ae manatua lelei, o i latou ia e o mai e maumea o latou aiga. E tataua ona i ai se fuafuaga i lea tulaga. Faamalulu atu pe afai ua uma ona laga e tasi o sui usufono. O le malosiaga o lenei Tulafono i lou talitonuga lau Afioga i le Fofoga Fetalai, o le Komiti faatino lea latou te faatinoina le galuega. Aua o lea e taua o laua uma le Komiti, e leai foi se agaga e tetee ai, e moni lena mau, ma e lelei foi ona matua screen ma vet lelei, faatino le due diligent e pei ona i ai i le Tulafono, le aloaia lelei o nei tagata. E le aoaia foi e Laupua Tamafaiga, na o se tuualalo e pei ona ou fai atu. O le faatosina e pei ona saunoa i ai le sui Palemia, o nisi tagata mau mea ia, sa maua ni o latou taua tetele, i taua ma tulaga o mea faapena. O tagata la nei, tasi ia o tagata lelei e ono o mai e invest i totonu o le atunuu. E tataua foi ona malu puipuia lo latou oo mai, e le gata i lea e i ai lau fesili le e fia fesili atu i le tatou Komiti, sei silasila totoa ane lava, o lena e i ai le faaupuga i lalo i le taimi e iloilo ai ma vet ia.....o le a maua passport Samoa o tagata nei o le good help, pe faamata e siaki pe o i ai se isi e lelei le saogalemu i mea tau soifua maloloina. Ae o lea la ou te vaai e feteenai le vaega lea o le Tulafono, pe afai e aumai ni tatou investor faapea, tagata foi ia sa manunua i le taua, e fia o mai e invest iinei ma fia fai ni a latou fale faigaluega e galulue ai le atunuu. Pe faamata la e le feteenai le vaega lea o le Tulafono ma le vet ina o tagata ia, aua o lea e i lalo o le Tulafono le faaupuga faapea, e le talia se tagata e le lelei lona soifua maloloina. E pei na o se fesili e faatumu manatu o lena e iina le utu a le faimea. O le isi vaega lau Afioga, o le vaega lea e taua e faatosina mai turisi, o lona uiga e o mai fau ni faletalimalo po o a nisi tulaga faapena ina ia maua ai galuega a o tatou tagata. Talu lava ona ou sau i le Aso Lua, sa ou vaai i le fasitepu lea e i le fale lea ua totogi e le tatou Palemene le faaaogaina, la e palapala leaga le.....toe maseese le fasitepu. O se tulaga faaletonu lava lea i lau vaai. Lua, a silasila i luma o le Falemeli, Samoa Post, e le wheelchair friendly le footpath na e i luma ifo tonu lava o le Samoa Post, ou savali foi i le taeao o le Aso Lua ma le Aso Gafua, e faapea le tele o le manhole tulou o le alavai, e leai se chrill uamea valavala e pupuni ai le pu lea, masalo na fai lav le SIDS o faapena ai lava lenei.....faafetai e lei pau ai se palagi po o se tagata asiasi mai, po o le au savavali foi. O lea la na ona tuualalo atu, aua o outou o CEO foi lea e i le Komiti, silasila totoa ane i le vaega lea ma le faaaloalo. E leai lava ma se turisi po o tagata maumea e o mai ae vaai i ni faaletonu faapea i le tatou infrustrature. O le isi mea manatua lelei mo le silafia, o tagata foi nei e o mai o tagata maaleale e tele le tupe, ao lea tatou te fiafia e aumai le inivesi e \$4miliona e inivesi i totonu o le atunuu, ae a tomo la i se pu lea tulou pe faaletonu ai le vae pe palasi faaletonu ai fofoga. O tagata nei e pau lava le mea e maua ai lo latou toomaga o le o i le faamasinoga su, ona inivesi lea o le \$4miliona ae gau le Malo o Samoa e totogi i ai le \$10miliona i le su lea o le a fai aua o tagata e faapena. E faaiu atu lau tautalaga lau Afioga i le Fofoga Fetalai, i le vaega foi lea na taua e se tasi o faipule, o le vaega lea o actors ma actresses, o tagata ia e o i ata tifaga. E tasi na tagata e tele le tupe, ae sao ai le saunoaga a se tasi o sui usufono, ae saunoa le Palemia, ua fiu e tusi i tagata nei. E maualuluga a latou tupe e maua e tai \$30miliona e faitau miliona, na tusi i ai e taumafai e faatosina mai, ae o

lea ou te tilotilo atu i le sui Palemia o le e ona le Tulafono, e le o se tagata foi, vae ane lava le paia o le alii nei, e le o se tagata e faaletonu, o le tagata e aulelei e talavou e tausaaafia. Afai la.....pe lelei pe a malaga ia i o i Hollywood e faatosina mai nisi o tagata nei faiata, e o mai i le tatou atunuu e matamata ma maimoa i le lalelei o Samoa, atonu o le faatosina lena e aumai, ona taumafai lea e inivesi mai iinei.

Tofa Fonotoe Nuafesili Pierre Lauofo: Lau Afioga i le Fofoga Fetalai.

FOFOGA FETALAI: Lau Afioga i le.....

Tofa Fonotoe Nuafesili Pierre Lauofo: Lau Afioga i le Fofoga Fetalai, e le o se tala sese e tali atu ai, sa i ai le vaitaimi sa ou nofo ai i Hollywood iina i LA. E feololo foi la nai tagata faapea lea e saunoa i ai le sui usufono. Ou te masani ai, o lea la e amata foi ona fai nai fesootaiga, aua e tasi foi la lea auala e aumai ai, silasila la. Faafetai i lau.....ae e mafai ona ta malaga sei e silasila foi i ai i o i Hollywood.

FOFOGA FETALAI: Faaiu maia le saunoaga a le sui usufono mamalu.

Afioga TAFUA MALUELUE TAFUA: Ia faafetai mo le faaaloalo. O le isi mea mulimuli lau Afioga, ia o tagata la nei afai ae malaga mai, ia o le faatusa foi lea e pei o si alii tautaua foi lea o Michael Jackson, ia silasila le mamalu o le Palemene ma le faafofoga a Samoa, ia o le taulealea lea na fanau mai o le African American e migimigi le ulu, tulou, ia ae uliuli le pau, ia e fai sina tetele o laugutu, tulou, ia e faapena foi ma le isu e taufelegele le isu, e lapopoa taliga, ia ae ina ua maua la le seleni a le tagata lea, ia sa taoto e faalaitiiti le isu, faalaitiiti laugutu, tatui le tino i vailaau ia paepae le pau ma o suiga uma faapena. O le taua la o le mea lea ou te talanoa atu ai lau Afioga i le Fofoga Fetalai, afai ae pasia lenei Tulafono, tasi ia ata o le aulelei o teine ia e i ou tua ma teine Samoa pei ona saunoa ai nisi o sui usufono aemaise o le Afioga i le Palemia, o tagata aulelei nei o le atunuu o le a le gata ina atili ai ona momosi o latou tino, ae o le a fiafia e fai mea ia o plastic surgery a finagalo lava la le tamaitai, aua o le auvaega foi lea e pueata.....

FOFOGA FETALAI: Malie le sui usufono, tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te musu e faalavelave i le saunoaga a le Afioga i le sui usufono, ae ua tatou tapena uma lava i na mea, e leai se mea e popole ai, le anoano o mau fagu fetau la ua saunia, e na ona vali lava o foliga momosi uma pei o foliga o le pepe. O le mea la lea, tasi lena auupega lilo lea o lo o tatou nonofo lea o le tatou auupega lilo, o le a faapena ona faamomosi uma lava i latou e fia momosi, ia e aofia ai foi ma alii sui usufono o le Maota nei ua tau matutua ua foliga matutua, ae o lo o manao pea e fia talavou.

FOFOGA FETALAI: Tulai mai le sui usufono.

Afioga TAFUA MALUELUE TAFUA: Faafetai mo le faaopoopo mai. Ia e faaiu atu ai lau Afioga, o le vaega la lea e fiafia e pauta mata, aemaise lava tamaitai foi ia ua atoa le tai 50, aua afai ae malaga mai, ia e mao ai lava le isi taulealea Samoa faapea ai na o le 20 tausaga, ia e mafua i mea na o plastic surgery e ta toso ta toso foliga i luma, ia te i lava ua sau laumata alu i luga o le ulu, a le o lena foi ua sau i lalo fai ma ava, ia ona te i lava lea ua fia tama ai. Ia pei o le eseese na lau Afioga o lea ou te fautua atu ai, tasi lea metotia lelei, a omai nei tagata faapea i Samoa, fai a latou beauty salon, fai a latou plastic surgeries, ia e gasolo e le gata i le atunuu ae o le a gasolo ai le toatele o.....ia ae tau foi lava o le tamaitai Samoa ma le alii Samoa, ia o tagata aulelei, ioe, o Polenisia lanu enaena e manaia tino. Ae na ona tuualalo atu, tasi ia pisinisi atonu e manuia pe a pasia le Tulafono. Ia manuia le Fono.

FOFOGA FETALAI: Malo faafetai saunao i lau Afioga i le sui usufono. Ia le sui usufono mo Sagaga le Usoga, ua e fia saunao?

FAAMAVAE MAI LE TOFI SUI USUFONO MO SAGAGA LE USOGA

Afioga MUAGUTUTAGATA FAAMAUSILI AUIMATAGI PETER AH HIM: Lau Afioga i le Fofoga Fetalai, ua leva lava ona fia soso atu i lau Afioga mo se avanoa, ae manaia foi ae se i vavae foe ona ua ou vaai atu e fai sina umi o a tatou felafolafoagia e tusa ai ma le Tulafono Tau Faaofi ua taatia nei i le Maota. E manaia foi ae vavae foe ae se i fai atu se matou tala ona toe faaauau ai lea po o le a se finagalo o lau Afioga i le Fofoga Fetalai.

Faafetai i lau Afioga i le Fofoga Fetalai mo le avanoa ma le faatagaga ona ua vaai atu ua alu lava le vae o le uati a le tamaloa. Lau Afioga i le Fofoga Fetalai ma sui usufono mamalu o le Maota, o paia o le Fonousu a Samoa ou te le toe autalaina aua o lea ua poto moli i futiafu. Ua afio lau Afioga i le Fofoga Fetalai ma sui usufono o le Fono Aoaofaitulafono, o paia lava ia aua Aiga ma a latou Tama, o Tama foi ma o latou Aiga, o Tumua ma Pule, Ituau ma Alataua, Aiga i le Tai ma le Vaa o Fonoti, ae tainane le faanonogamanu a le Afaigaluga Paia a le Atua.

Ua ou tulai atu ma le faaaloalo tele e fia faaalua se manatu i se mataupu ua le po malae i le faafofogaaga lautele i alaleo faasalalau ma le mau faasalalau i nusipepa, o lo o tautalagia ai lou nei tagata ma lou aiga. Ua oo atu lava i fafo i auala televavave faanei onapo. Ua ou le fia nofonofo ai foi ona o le aafia ai o lou aiga aemaise lou itumalo pele na latou tusiaa ou te tulai e nofoia le Nofoa o le itumalo o Sagaga le Usoga, ma e le tau faatauvaaina le matupalapalato na ou paleina i le 10 tausaga.

O se taimi umi, o la outou pule lea ma e manatua pea Pule ae le manatua Faalaeo; e ola foi Pule ae gase Toa. O uputuu a le atunuu, “O le aso ma le filiga, o le aso foi ma le mea e tupu ai.” E le masino le mau luitau e feagai pea ma i tatou i lo tatou soifua fesouaiina i feau ma lavasiga eseese e faatoilalo gofie ai le ua vaivai. E aveane ai i tatou o ni tagata faatauva ae oo lava i lo tatou Alii Faaola, na asiasi lava i ai le Tiapolo e faaososo? O le natura o le tagata o le sese, e leitioa ona fai mai e matutua, “E poto lava le tautai, ae le atoa atu i le liu o lona sa. E momoe foi ma manu e le fati, ae sau lava mala e atiae.” O le faapogai lea ua ou taunuu ai i se faaiuga e ui ina

mamafatu, ae ou te talitonu o le musumusuga lilo lea ma o le faamasinoga tonu e tatau ona ou faia i le loto maualalo fuatiaifo, o lou faamavae aloaia atu lea i lau Afioga i le Fofoga Fetalai ma le mamalu o le Maota i le aso, ma faagafua ai loa le nofoa o lou itumalo o Saagaga le Usoga mo aiaiga masani faaletulafono mo le sailia o se Tootoo e sui tulaga. O se faaiuga foi i lou faasee tuagalu e le toe saia ai fua le maaveave le fua. Ou te avatu ai malu i puega i Alii ma Faipule o lou itumalo, le Aufaigaluega Paia i Fata Faitaulaga e fia, faletua ma tausii, saoa ma augafaapae i le faaiuga ua ou taunuu i ai. O lau tatalo ia faamagalalo mai au i se faaiuga ua ou faia toataasi. E faafetai tele i lo outou lagolagoina o au e tauavaea le Tootoo o le itumalo i faalagamaea a Samoa i le Malae i Tiafau. O le a foi se tautua na ou faia, ua pau o le malosi na oo i ai se taumafaiga.

Lo tatou itumalo, o se taimi ona tatou feiloai lea i fanua. E faamalulu atu foi i lau Afioga i le Fofoga Fetalai ma sui usufono o le Fono Aoaofaitulafono, le Taitai ma ou uso a faipule o le matou faa-Faletui, faamolemole faamagalalo mai sou faaletonu i lo tatou va tapuia. Ia faafualoa e le Atua le soifua o Lana Afioga Mamalu O Le Ao o le Malo, ia manuia le tapuaiga a Samoa. Soifua.

FOFOGA FETALAI: Ia se i tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ia ua ou tulai atu ma le agaga faaalalo, lau Afioga ma le mamalu foi o le tatou Maota i lou tulaga o au o le Taitai o lenei foi Vaega Faaupufai o Puipuia Aia Tatau a Tagata, o le vaega sa galue ai ia le Afioga ia Muagututagata o se sui a usufono sinia o lenei vaega e tautua ai lo tatou atunuu, o le sui usufono o le itumalo faa-alaalafaga o Sagaga le Usoga, o lea ua outou faafofoga ua tele tausaga o galue punounouai Muagututagata i le HRPP e auala atu ai lana tautua i le Palemene o Samoa ma le atunuu. O tulaga masani a o tai tolu tausaga o Paeaiga o le Palemene lenei, ia e tai lalata i le fa Paeaiga, o se taimi umi. Sa tulai foi le Afioga i le sui usufono i totonu o le Maota nei ma sausaunua manino i le tele o fautuaga aoga a le Komiti sa ia galue ai, i le Komiti a le Palemene e faavae ai nisi o faaiuga ogaoga ma le taua o le Palemene lenei ma le atinae au i luma o Samoa. O lenei ua tatou faafogafoga i lana faaiuga ua faia i le lotofuatiaifo, e tuua ai lona tofi i totonu o le Palemene lenei, o se tulaga e seasea ona tupu i tala faasolopito o le Palemene o Samoa. O lenei la faamavaega ua i lumamea, e ao ai ona ou tulai atu ma le ava tele, e talia aloaia le faamavaega, aua e le gata i totonu o le Maota ae faapena foi i le matou foi Faa-Faletui o sui usufono o le HRPP.

E avea ai au ma sui usufono o le Vaega Faaupufai, e momoli atu ai le faafetai ma le faamalo a le tatou vaega i nei tausaga e tele sa o tatou galulue faatasi ai, aua e te le i faataga galue, sa e galue ma lou malosi atoa. Pe a mafai ona ou toe liliuina lau faaiuga o le loto fuatiaifo, mamanu ou te fautuaina, toe onosai mai. E le o toe umi uma le tatou Paeaiga. Peitai o lo o i ina le utu ma le faimeaa, e le tauiso, o i ai fuafuaga mamao a lau Afioga ma le aiga alii aua le atinae o le aiga. Faamanuia le Atua i faamoemoega ma lavasiga uma o le alofaiva i ai lau Afioga, o lea ua e malolo mai i ou tiute faale-Palemene i le aso, ae liliu atu le atoatoa o lou malosi aua le aiga alii. Soifua ma ia manuia.

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Ia faamalo saunoa i lau Afioga i le Palemia. Tulai mai lau Afioga i le Taitai o le Itu Agai.

Afioga Hon PALUSALUE FAAPO II: Faafetai tele mo le avanoa i lau Afioga i le Fofoga Fetalai. Ou te tulai atu ma le faaaloalo ua faapoia faamanu i ofaga le tatou Maota aemaise foi o lenei itu. O le ala lea lau Afioga i le Fofoga Fetalai ou te tulai atu ai e fai au ma sui o le Afioga i le Sui Taitai ma lenei Itu o lo o agaia le Malo e tusa ai ma le faaaliga taua, aua e ui lava i lena Itu ma lenei Itu ae tasi lava tatou, o tatou na faia mai le fuifui o itumalo taitasi tatou te saili aua le manuia o Samoa. Ae a oo loa ina afaina se tasi, ua lagona uma e tatou le loto faanoanoa. Aua po o a lava a tatou saunoaga i le Maota lenei, e oo lava i le taimi, o tatou lava o fanau a le Atua. O lea foi ua e saunoa manino lau Afioga i le sui usufono, e sili lava le toa na te pulea lona loto i lo le na te aea le olo, lea ua manino i le aso. Faamalo le tofa faaali, faamalo le tofa aua faafitauli o feagai ma lau Afioga. O lea ua saunoa manino le Afioga i le Palemia, o lo outou taitai e tusa ai ma ou faiva ma ou tiute sa e galue ai i le Palemene aua le tautuaina o le itumalo o Sagaga le Usoga, leaga o tatou o le Tuamasaga, o le Fale Tuamasaga, e tasi tatou, se i vaeatu le Palemene.

O le matou tatalo pei ona saunoa le Afioga i le Palemia, e momoli atu o matou moomooga alofa, ia alofagia e le Atua le feagai ai o lau Afioga e pei ona e saunoa, ia maua pea lau tofa aemaise o moomooga alofa aua le faletua ma le nofo a alo, aemaise o aiga ma le itumalo. O lau tala lea ma le faaaloalo lau Afioga i le Fofoga Fetalai, ia manuia lau Afioga e tusa ai ma le feagai ai ma ou tofi ma ou tiute. O le a le galo oe i le Maota lenei, toe feiloai i se aso o i luma. Soifua.

FOFOGA FETALAI: Se i tulai mai Maualaivao.

Afioga MAUALAIVAO PAT AH HIM: Faafetai mo le avanoa. Lau Afioga i le Fofoga Fetalai, faafetai, sa leai se manatu e maua se avanoa, ae ona ua eseese foi taimi ma mea e tutupu ai. Ou te tulai atu ma le faaaloalo e faapoipoi lilia atu faaalofisa o tupu nai le malae o le vavau, ma out e talitonu ua saunoa le Afioga ia Muagututagata i le Maota faapea lau Afioga i le Palemia. O lea ua saunoa lau Afioga i le Palemia, o le Taitai o le Malo, o le Taitaio o lenei Faafaletui, o lea foi ua faapena ona saunoa lau Afioga i le Taitai o le Itu Agai. Masalo o le matupalapala o le Maota lenei ua mautu atu. A o lou tulai atu tau ina saua i le va ona o le agaga o Muagututagata o se uo mamae i le toatele o le Palemene, o uo mo aso uma ae o uso mo aso vale. O lea ou te tulai atu ma le faaaloalo tele, faafetai i lau Afioga i le Fofoga Fetalai, le Afioga i le Palemia ma le mamalu o le Maota, ua talia ma le fiafia le faamavaega a Muagututagata, ae pau lava lea, ona o lo o ou i ai foi i totonu o le Maota lenei, e leai, e le o se uso taufeagai o le uso tuofe. O lea ou te faapea atu ai, e faamalulu atu, tau ina toe faaopopo atu le paia o le Maota, a i ai se sese po o se aleu o le Afioga i le sa avea ma faipule o Sagaga le Usoga pe faamanualia se finagalo, na ona faamalulu atu ma toe faaopopo atu i le saunoaga ma le faatoesega a le Afioga ia Muagututagata. O le lalolagi lenei, o le faigata ia i se tagata e i se tulaga maualuga ona sau i lalo, a o lenei itula, ua pulea lou lava loto lau Afioga Muagututagata, faafetai, o le mea taua lea i lau faaffooga mai lau Afioga i le Fofoga Fetalai faapea foi le Palemia ma sui usufono mamalu o le Maota, ia, o lea ua talia ma le fiafia e le Maota nei lau

faamavaega. Muagututagata, ia o ou mama na pei ona saunoa mai ma faamanuia mai le Palemia, faapea foi le Taitai o le la Itu.

Lau Afioga i le Fofoga Fetalai, na pau lena o se mea na ou tulai atu ai, tau lava ina fai le tau o lota tulai atu, ona o lo o saua i le va, e mafiafia le toto i lo le vai. O le ala tonu lea ua ou tulai atu ai. Ma le faaaloalo tele, e faamalulu atu, a ua paopapa foi se tou faafofoga i se tulai atu a Maualaivao e tau faalalanu lenei itula o le aso, e faamalulu atu, a ia manuia le Fonousu a Samoa.

FOFOGA FETALAI: Ou te manatu o lea ua faafofoga ma le manino le paia ma le mamalu o le tatou Maota i lenei taeao na liugalua. E talitonu foi ua faiva ese Lopepe i lenei itula o le aso, ona ou te manatu sa tatou momoe ma manu ae sau e mala e atiae. Le paia e ma le mamalu o le tatou Maota Fono, ia e le faigofie taimi faapenei i le tatou va nonofo, e le o ni umi, e le o se taimi, e le o se aso, a o le aso ma le filiga o le aso ma le mataigatila ma le mea e tupu ai. E le faigofie pei ona e saunoa lau Afioga i le Taitai o le Itu Agai i le tatou mafutaga pele ma mamae i aso ua alu, le tatou mafutaga sa tatou feagai ai ma tatou militino i upufai o Malo, e le gata i le va faafeagai ai ma le va tapuia aua le va tootoo i le faataotoga o itumalo e fia o Samoa, talofa, o lea ua ae lau faatautaiga ae toe o se aga ona tatou taunuu lea i le taunuuga o le tatou Paeaiga. O lea ua malele le Palemia, o le agaga lena o le faafetai atu, ona o le fita ma le faigata o le galuega ua oo ma lau tautua matapalapala ma lau tautua ua uma ona fai i le Malo ma le Palemene. E faapena foi ona tulei saunoa atu le Taitai o le Itu Agai, Muagutu, tatou faamoemoe i le Alii, ua leai se mea e tasi o toe lilo leaga o lea ua i lumamea le tualumaga o le mafuaaga ua e faamavae ai ma le tatou galuega. O le upu a le Fofoga Fetalai, faafetai lou manatu i le Palemene, faafetai lou tausii mamalu i sui usufono mamalu o le Palemene, ua e le faatali se i fai le faaiuga a le Faamasinoga, a ua e tausii mamalu i le mamalu o sui usufono o le Palemene. O lau faafetai lea. Ia tatou faamoemoe i le Alii, aua na o le Atua o lo o i ai le Faamasinoga Sili mo i tatou uma. E leai se tautai matapalapala e leai sona lape, e le atoa ni ia i lona sa, e leai foi se isi o tatou e atoatoa, e oo lava i le toe taimi o le tatou Faaola o ole tagata i le Atua, ia manatua ia pe a oo i lona Malo. O le matou tatalo ma le matou faatauana, ia faatuatua i le Alii, tatalo i le Atua ma tuu i le Atua le faamoemoe, aua e tele aso ae le lau aso, e tautalaaso foi le aso. A o le lagona o lou Palemene, o lea ua saunoa atu le Palemia, saunoa atu le Taitai o le Itu Agai ma sui usufono mamalu uma o lenei Palemene, matou te ofo alofa atu ma momoli atu le matou faafetai i mea uma sa e feagai ai, leaga o oe o le pale na fatufatu i Sagaga le Usoga, na filitupetua i ai ma fili le manoa, sama se mago fili se agavaa, sa tatou feagai i upufai o Malo aua le tautuaina o le itumalo. Le afio aua le paia o le Aiga Sa Maualaivao, le Matua o Faamausili, susu Taito ma le Fuaalii ma le mamalu i le Toafitu, Pou o le Fale Malietoa ma lau Tofa Auimatagi. Le paia aua le Aiga Sa Gauifaleai, Fata ma Maulolo vaeane le Vagana i Tulafale ma lau Susuga Tuisamau. Le paia foi aua Saena ma le Aiga Sa Saena, afio alo o Fuatino, Afifio Tuitea Ututaaloga ma le Faavaoga, alaalatai Tupai ma le Fale o le Afu o le Alataua.

O ou mamalu na ma paia o le itumalo o lea ua e faalalanu i le aso lenei, ia toa le tai ma malu le vai. O lea ua e saunoa manino ma ave le faafetai i le itumalo, e le faaitiitia foi le matou faafetai atu, leaga o le galuega sa fauao

faupo, na tatou veloaso ma tatou muai velo le uluai asomualemalama e fai le galuega aua le manuia o Samoa.

O matou toe upu, maua lou soifua manuia i le tino, le agaga ma le mafaufau, aua e oo uma lava ia tatou le mea ua tulai mai o le olaga lenei. Ae pei lava o la matou tatalo e tuuina atu i lau Afioga i le sui usufono, e le o le mutaaga lea o le olaga, e le iloa foi mafuaaga ma mea o tupu mai i le Atua ma Lona finagalo, pe i ai nisi mea lelei aua lou valaauina mo le lumanai. A o le matou tatalo, ia maua lou soifua manuia.

O lena se faamatalaga i lenei aso le paia ma le mamalu o le tatou Palemene, ua faateia manu i ofaga le saunoaga a le sui usufono ma lana faamaulaloga ma lana faatoesega, ia malu ave i fale le finagalo aemaise foi le faafofoga mai a lo tatou atunuu o Samoa, ia, o lea ua logo a logo i la outou faafogafoga i lenei aso. O lea sa outou faafofoga masa outou tapuai mai, o lea ua afaina le sa ol e Palemene ona o le faamavae mai o se tasi o sui usufono, e le faigofie. O lea ua faafofoga mai ua saunoa le Palemia, saunoa le Taitai o le Itu Agai ma sau faamafanafanaga o au nei o le Fofoga Fetalai, ia tatou ave lea i uta, ia tau e le Atua galuega uma sa feagai ai, aemaise o le faaauuina mo le valaauina mo le lumanai, o ou mama na. Ia manuia lau Afioga i le sui usufono ma le aiga alii, le nofo a alo, maua pea le faamafanafanaga a le Atua ona o le faamavaega i le aso.

Ua tatou toe taunuu mai i le tatou galuega, ua ese foi lagona o lenei taimi.

Afioga Hon Palusalua Faapo II: Lau Afioga i le Fofoga Fetalai, ou te tulai atu ma le faaaloalo, ua ese foi lagona i lenei taimi pei ona e saunoa, leaga a tuia lota vae, e lagona i lota mafaufau, aemaise o le faamavaega a le sui usufono. Pe ni a fa au, aemaise lau Afioga i le Palemia, se tatou malolo ia, tatou o e tatalo i le Atua, faanonomanu aua e le gata i le Tulafono Tau Faaofi, a o si o tatou uso. O lea ou te tatalo atu ai, tatou malolo, aua ne i faanatinatia le Tulafono Tau Faaofi, aua le popole e pasi lava. Ou te le iloa foi i lenei itu po o toe fia lauga i lenei Tulafono Tau Faaofi, ae ou te tatalo atu po o a fa au lau Afioga i le Palemia ae faatu se lafo tatou malolo.

FOFOGA FETALAI: Ia o lea ua maua lou finagalo le Taitai o le Itu Agai. E i ai le manatu e ui lava ina tatou lagona, o lea ua faalava le amoa o lea ua tatou taunuu i lea taimi, ae ua uma ona faataatia a tatou lafo i le taimi ua sola. Ae sili ia lou avatua le fesili ona tatou malolo ai lea.

O le fesili po o le a faitauina nei le Tulafono Tau Faaofi o Tulaga o Tagatanuu tau Fefaatauaiga o Tupe Maua.....

Afioga Hon Palusalua Faapo II: Lau Afioga i le Fofoga Fetalai ma lou faaaloalo lava.....

FOFOGA FETALAI: Ia.

Afioga Hon Palusalua Faapo II: O lea ua e aumaia le fesili, ae le o le mea lena na ou tulai atu ai, tatou malolo tatou toe omai ai e faauma i se aso e tusa ai ma lou finagalo, leaga o lea e le i maea felafolafoaiga e tusa ai ma Tulafono Tumau, ae le faapea o le a avea le mea na tupu, ia o le a aumai ai lau fesili ma tulaga aloaia o le faitauga faalua o le Tulafono.

FOFOGA FETALAI: O le uiga tonu na o lau tala lea e fai atu, o lea foi na e saunoa po o ai se isi e toe fia lauga o lea ua ese le mea lea ua tatou oo i ai, a faapea o le na, e le mafai o lea ua uma ona faatu e le Afioga i le Palemia le lafo mai le taeao. E le mafai ona tatou toe mei ese leaga o lea e faasolo le tatou mea ua uma ona pasia, o le agaga lena, se i tulai mai se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi.

Afioga Hon Leaupepe Toleafoa Apulu Faafisi (Aana Alofi Nu. 1): Faafetai mo le avanoa lau Afioga i le Fofoga Fetalai. Ia ua na o se manatu faamanatu e lagona foi le alofa atu i le avega e le faigofie lau avega i le faiva alofilima, ia e toa 48 le Palemene ia ae 49 i lau Afioga o lo o fai toatasi ia le tulaga o le tau faafoeina o le Fono sili a le atunuu. Ia o le faamanatu la e faapea, o lea ua pasia le lafo a le Afioga i le Taitai o le Malo po o le Afioga i le Palemia, ina ia faagasolo le tatou galuega i le taunuuga o le Tulafono lenei i lona faitauga faalua pe a maea le fesili a lau Afioga. Ona manatu lea, i faiga faavae o Fono Faapalemene, e le aia Moo i liu o vaa, tulou, i sala le gagana o le upu e foi mai, o le pule e toatasi i lau Afioga i le Fofoga Fetalai. Ia ae manatu, e aoga mai futia ua sola. A tagatasi tulaga o saunoaga a sui usufono aemaise foi se saunoaga a le Taitai o le Itu Agai, o faiga Faapalemene, ia o ai se isi o i sili pe a malele le Taitai o le Itu Agai, ia ona silasila loa lea i le tulaga o faiga faavae. O le mea la lea ua tulai mai, ua tagatasi ua leai se mea o gole i le tulaga o finagalo faaalua e le gata o le Malo ia ae faapea foi i le itu e agaia le Malo, o lea la ua ou manatu ai faatoeaiina, *Ou te faatu le lafo, ni a fa au, ae tuu maia le fesili, ae o le finagalo lea ua ta alofa atu i le Taitai o le Itu Agai ua fia malolo ae o le ala lena ua tupu ai matagi i liu o vaa e faapea, e tuuina atu se lafo, alofa maia lau Afioga i le Fofoga Fetalai, ae tuuina mai loa le fesili ina ia ogatasi ma le finagalo o le Taitai o le Itu Agai ua lagona le vaivai i le tulaga o Tauaofiaga ua fai sina umi foi o le tatou Fono ua vela le fala ia ua api foi le uli, ia o se manatu lena e tuu atu, ae pule tutasi lau Afioga i le Fofoga Fetalai.*

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Tulai mai lau Afioga i le Taitai o le Itu Agai.

Afioga Hon Palusalua Faapo II: E leai sau lafo faapea ua maea ona saunoa lenei itu. O lea e te matau mai lau Afioga, e toe toafa matou e le i sausaunoa, e ui lava i Tulafono a o le Tulafono lenei. O lea la ou te tatalo atu ai, ia afai o lea, tatou toe faaauau, pe afai e le tusa ai ma lou finagalo e tusa ai ma lenei Tulafono taua, lea toe toafa matou.

FOFOGA FETALAI: Ia na ala ona ou taumafai atu, ia se i tulai mai le Afioga i le Sui Palemia.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, leai, ua mafua ona ou tulai atu ona o lea ua opea i le Maota le lafo, o le lafo a se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi, ia ua ou tulai atu la ma le agaga faaaloalo e faaluaina le lafo e pei ona faatu mai, faafetai.

Tofa Levaopolo Talatonu: Lau Afioga i le Fofoga Fetalai.....

FOFOGA FETALAI: Ia o lea ua...O le agaga lea sa taumafai atu e faamalamalama ina ia faataatia i lagotonu le tatou galuega o lea e faasolo, ona o le tulaga foi o le tulai mai o lau Afioga i le Taitai o le Itu Agai ma saunoa mai, ia o le tatou malolo ia ona o le tulaga ua tulai mai i le mataupu i le Afioga i le sui usufono mo Sagaga le Usoga, ia a o le agaga lena o lea na taumafai e faamalamalama ona o lea na taumafai e faatu le tatou lafo e faaauau ai le tatou galuega i le taimi ua sola. O lea ua faatu mai le lafo a se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi, ia ona ou manatu lea, se i malie, se i tulai mai se tasi o sui usufono mo Salega, Afioga Afualo Wood Uti Salele.

Afioga Afualo Wood Uti Salele (Salega): Ia faafetai i lau Afioga i le Fofoga Fetalai, se ua ese lava lagona i lenei aso, ia o lea foi ua i lumamea le lafo, ia sa olo lava le fua ma faalogologo lelei Salega e le i avatua se manatu o Salega. O lea e talosaga ai i lau Afioga, ae faaauau le tatou galuega e le o toe toatele matou, ou te vaai atu o la e i ai ia nai sa aemaise lava o le motu i Salafai, ia ona tatou faauma ai lea o le tatou galuega, faafetai.

FOFOGA FETALAI: Lau Afioga i le Palemia, se i aumai le tofa.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga, a matau mai ua tagatasi finagalo, o lea foi ua aumai le finagalo o le Taitai o le Itu Agai, ua fia malolo, aumaia le tatou fesili.

Afioga Hon Palusalua Faapo II: Lau Afioga i le Fofoga Fetalai, o le mea e fia faasao. O lea e manino lau tala, ona o le aso e tusa ai ma le faamavaega a le Afioga i le sui usufono o sui usufono o le la itu, o le saunoaga foi fai mai e tasi, e faapefea ona silafia e tagatasi a matou lauga. O le mea lea ou te tatalo atu ai i lau Afioga, fai le mea sao ma le mea faamaoni, faaauau le tatou lafo, o la e faafogafoga mai le atunuu ma le Atua. Pei o lau tala atu lea, o la e faafogafoga le Atua.

FOFOGA FETALAI: O lea la ua ou maua lou finagalo lau Afioga i le Taitai o le Itu Agai, ona faa-amataina le faatulai mai o le lafo lena a le Afioga i se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi, ona o le saunoaga a lau Afioga i le Taitai o le Itu Agai lea e mafua ai ona tuu mai ma faatuina atu le lafo na tuuina mai i le taimi ua sola, o le ala foi lena o lea ua faafogafoga atu ua...o lona uiga o lea ua auai ma le finagalo o le Afioga i le Palemia, e toe faamaui i tua le lafo na tatou faia analeila.

Afioga Hon Palusalua Faapo II: Lau Afioga i le Fofoga Fetalai, e te le i maua mai ma le faaaloalo, ou te le i faatu atua a mea e faagata ai i i ma aumai lau fesili, ua maea le faitauga faalua, e eseese lava mea ia. O lea mea la lea ua ou toe tatalo atu, tuu mai se avanoa lau Afioga, aua e aumai nei le fesili, ia ua le aoga o matou manatu.

FOFOGA FETALAI: E le mafai, malie lau Afioga i le Taitai o le Itu Agai, o lea ua faatu le lafo o le sui usufono, o le lafo ua uma ona faatu ma o lea ua faalua, o le ala lena o le sui usufono mo Aana Alofi Nu. I lea ou te agai atu i ai, se i tulai mai le sui usufono mo Aana Alofi Nu. 1.

Afioga Hon Leaupepe Toleafoa Apulu Faafisi: Lau Afioga i le Fofoga Fetalai, o aga masani lava a faalua le lafo ia ona faapena lea ona faagasolo, ae mafua ona ou faatuina le lafo, ona o lea na malele le Taitai o le Itu Agai, e talosagaina lau Afioga ua lagona le vaivai, ua tataua ona fai se faasiliga malosi ma faamuta le tatou galuega. Ia a o faiga faavae, o faiga faavae.....

Afioga Hon Palusalua Faapo II: Ua faafofoga la lau Afioga.....

FOFOGA FETALAI: Malie se i avatu.....

Afioga Hon Palusalua Faapo II: E le i fai atu sou manatu a mea e tolopo felafolafoaiga i luga o le Tulafono.

FOFOGA FETALAI: Malie lau Afioga i le Taitai o le Itu Agai e.....

Afioga Hon Palusalua Faapo II: E sese le mea la e saunoa mai ai le sui usufono.

FOFOGA FETALAI: O la ua faatu mai le lafo ona o le saunoaga a le sui usufono lea ua faalua.

Afioga Hon Leaupepe Toleafoa Apulu Faafisi: O faiga faavae na ona faamanatu, e sa ia au ne i ou fautuaina le tofa i lau Afioga, leaga e fautuaina e le Matapia le Manaia, a o faiga faavae a utiuti le taimi, ona fai loa lea o fuifui, ioe, afai e malele le Taitai po o le Sui Taitai o le Itu e Agaia le Malo, agai e le Afioga i le Palemia ma le Sui Palemia, ua uma ua uma, ae o lenei ua alu nei le tolu o aso o tatou talanoa i le Tulafono lenei po o le fa nei o aso, ola, ola, ua tatou see atu i le soli faavae o le Palemene, e faamanatu lau Afioga e, o le ala lea, ne i faataaloga i vai le tulaga fai o galuega a le Palemene, a o lea lava ua talanoa i le tulaga o faagasologa o galuega Faapalemene, o lea foi ua uma ona faaluaina le lafo faatu e pei ona e matau tele i le saunoaga a le Afioga i le Taitai o le....faafetai.

Afioga Hon Aeau Peniamina Leavaiseeta: Lau Afioga i le Fofoga Fetalai, i le ava e tataua ai ou te.....

FOFOGA FETALAI: Tulai mai le Sui Taitai o le Itu Agai.

Afioga Hon Aeau Peniamina Leavaiseeta: O se tulaga e tataua ai ua ese lenei lagona a tatou uma, amata mai lau Afioga i le tulai a le Afioga i le Taitai o lenei vaega, e i ai mafuaaga, o mafuaaga ou te talitonu e ia i tatou uma lava, o le a? O se uso a sui usufono ua faamavae, fai ni ai, leaga e fou, ioe, o lea foi la e saunoa atu i lau Afioga i se tulaga amanaia, it is our form of courtesy so o se isi e afaina, leaga e mamao a, o le a lea ua tatou oo i ai? E le i faapea foi lau Afioga, ma tulou lava le upu e to ia te au ma le lafo lea na aumai, talofa o

i e faaoga i ai le vaiti ma le vai malae, o le tofa lea, tatala, e te silasila mai e lei uma ona saunoa sui usufono nei ae taua le Tulafono faaopoopo mea na e lua, o le a?ana alu lenei itula, tulou a e faalou le maga.....

FOFOGA FETALAI: Malie le Sui Taitai.

Susuga Hon Tuilaepa Fatialofa Lupesoliai Aiono Neioti Sailele Malielegaai: Lau Afioga i le Fofoga Fetalai, o ituaiga Fonotaga faapenei ua fa aso, ua le masino le tutulai o sui usufono nei, a o le Taitai o le Itu Agai, e ui lava ina e le i lauga, ae ua faafia ona tutulai mai ma faaali ona taofi, ua faafia? Ou te manatua i le tausaga e 1986, na o le tasi lava le lauga na mafai o le vaega lenei, e tasi lava, ae taofi uma matou, tali loa le Malo, ia ona leai lava lea o sa matou mea e mafai, ia a o le taimi lena ua matou see i le Itu Agai, ae o lea sa tulai mai i le Nofoa o le Fofoga Fetalai, o le Fofoga Fetalai o le vaega lenei, ae na ona tutulai atu lava e lua ea fesili, e i ai se isi e fia lauga? Ia na o le tasi lava le matou lauga na sao, tapuni loa ma faatalanoaga, a o le Tulafono lea e talanoa, o le Tulafono o le Tupe Autu, ia se i silasila lau Afioga i le Fofoga Fetalai, na o le tasi lava le matou lauga na mafai ona fai. A o le tulaga lea ua i ai, ua ova mamao ma le afa o le Palemene lenei na saunoa, ae le gata i le faafia, faafia, faafia ona tutulai mai lau Afioga i le Taitai o le Itu Agai, ma aumai lou finagalo ma o finagalo lava e le ese, e tagatasi, o le faatau o tusifolau, e leai lava se mea e ese ai, o mea lava ia e repetitive, repetitive, repetitive. Lau Afioga i le Fofoga Fetalai, o le ala lena o lea ua ou tulai atuai, ou te faatoluina le lafo.

Afioga Hon Palusalua Faapo II: Lau Afioga i le Fofoga Fetalai o se mea e fiafaamalamalama. Lau Afioga i le Palemia, o le a e manatu mai ia te au i lou tulai soo atu ae a faapefea itumalo, o la e tapuai mai itumalo, ioe.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, e matau atu foi ua faapena lava ona faalevave le fefaaaliaiga o finagalo i luga o le tatou mataupu. Ia te au lava ia i lau faavasegaga, malie foi lou finagalo lau Afioga i le Fofoga Fetalai, ou te iloa o lena e te malamalama, ou te iloa foi o lea e silafia e Aeau, o le Tulafono Tumau a i ai loa se lafo i se mataupu ae faaluaina ona aumai lea o le fesili pe talia. A o le mea lea e lua lafo, o lea ua tatala le finagalo o le Palemia e uiga i lana lafo ia tulituli le aso lenei ia uma. O lea ua saunoa le Taitai o le Itu Agai ae o lea e manino upu na saunoa ai, ua leai foi se isi o lenei Itu e toe fia saunoa, ae ona o le lafo e taua ma le saunoaga lea a le sui usufono mo Aana Alofi Nu.1 i lana lafo o lea ua faaluaina ma o lea ua faatoluina e le Afioga i le Palemia, ou te talitonu ua faafaina foi, ma aumaia le fesili, o lea e i ai le vaega mulimuli o lenei Tulafon Tau Faaofi e ave i le Komiti ona maua lea o finagalo mulimuli o sui usufono nei pe a faapea lava tatou te o i mea amiotonu. Ma le faaaloalo lava.

FOFOGA FETALAI: O le ala foi lena na ou taumafai atu ai i le taimi ua sola ma ou....

Afioga Hon Palusalua Faapo II: O le mea e fia faasao, e leai sau tala na faia a mea e le toe lauga nisi o le Itu lenei.

FOFOGA FETALAI: Malie lou finagalo Palusalue, malie o lea ua malie Lealailepule....

Tofa Hon Lealailepule Rimoni Aiafi: Ou te le toe oo lava i lea vaega, ae na pau lava lea lau Afioga, o le aso lenei, o le aso o le loto faamagalo, loto faamaulalo ma le tagata na te pulea lona loto. Ne i o tatou naunau i le ia ae maumau ai le upega. O le uiga o le saunoaga a le Afioga i le Taitai o lenei Itu, sina minute se i tatou faamavae ai i le uso o la e ua alu atu. Tou te le i iloa leaga tou te le i faamavae i le Palemene pei o au, e le o se mea faigofie. Ae silasila lau Afioga, o lea e le i saunoa le Taitai ma le Sui Taitai o lenei Vaega. O le Tulafono Tau Faaofi, o le Sitiseni Samoa. O lea e silafia e lau Afioga, a matau i le tatou galuega lau Afioga, toeitiiti tolu aso o fao e la outou Itu, o lauga faa-Minisita ua tolu lauga faa-Minisita i le Tulafono Tau Faaofi lenei. O le mea lea lau Afioga, tuu mai se avanoa, e le o toe umi foi ni matou lauga. Ma lou faaaloalo lava.

FOFOGA FETALAI: O lea ua maua lou finagalo Lealailepule. O lea ua ou maua lou finagalo.

E le o i ai se vatapuia, ua leva lava sa ou tuuina atu le avanoa ma se i fetuunai mea uma i le faasologa o le tatou Tulafono se i ou fai atu. E le o le avanoa mulimuli lenei, ia outou silafia lelei tualumaga o le tatou galuega, e uma atu iinei toe oo i le Komiti toe aumai tatou toe iloilo i le iloiloga auiliili. A o le agaga lenei ua tulai mai, o lea ua faatu le lafo, faaluaina ma faatoluina ma faafaina, o le tulaga lenei. E fai foi la o le tou naunau mai i taimi uma, o le mea lenei na ou talosaga atu ai e tuu mai a outou tuleiga ma saunoaga i taimi talafeagai, ae paga lea, o lea ua faataatia le alafua e tusa ai ma tatou Tulafono Tumau.

Na faamaonia le lafo.

Na faitauina le Tulafono Tau Faaofi o Tulaga o Tagatanuu i le Teufaafagaluegaina o Tupe mai Fafu 2014 i lona faitauga faalua.

FOFOGA FETALAI: E manatu ua tatou.....

Afioga Hon Palusalue Faapo II: Lau Afioga i le Fofoga Fetalai, se i tau seu silasila lau Afioga, o lea e taoto le lafo na fai, a o lea ua fai le isi lafo ae taoto le isi lafo lea.

FOFOGA FETALAI: Ua uma ona ou faamalamalamaina atu lau Afioga i le Fofoga Fetalai. Palusalue, o lea ua uma ona ou faamalamaina atu. O le Palemia lea na tulai mai faalua faatolu le lafo lea na fai. Ua uma ona faaluaina ina ia tatou malolo, ma silasila foi i le mea lea ou te fai atua, e le o le iuga lea o le tatou mataupu, e le o le iuga lea o le tatou Tulafono Tau Faaofi o lea ua faatulaga.

O le agaga ma le faaaloalo o lea ua taatia i lagatonu le tatou mataupu pei ona taumafai atu i ai, ua alu lenei aso o faagasolo le tatou galuega. Malilie sui usufono o lo o i ai tulaga o le tatou galuega o lo o faagasolo e taunuu i le Komiti aemaise le faatulagaga o tatou galuega mo le iloiloga ma le toe faatulai mai i le lumanai. Ia, e manatu o lea ua tatou.....

E tusa ai ma Tulafono Tumau, o le a tuuina atu le Tulafono Tau Faaofi i le Komiti o Mataupu Tau Faamasinoga, Leoleo ma Falepuipui ma le Faamasinoga o Fanua ma Suafa mo le iloiloina ma toe lipoti mai i le Fono Aoao i le fonotaga o lumanai.

Afioga Hon Palusalue Faapo II: Lau Afioga i le Fofoga Fetalai, o se mea lava e fia faamalamalama leaga e fia faamauina le teena e lenei Vaega o le faitauga faalua. O lea e te le i saunoa mai e faatu mai le lafo o le faitauga faalua o le Tulafono Tau Faaofi. Na pau le mea lea e fai nei, o le lafo ina ia faamaea ai saunoaga i le Tulafono Tau Faaofi, ae te le i saunoa e talia le faitauga faalua o le Tulafono Tau Faaofi. O le ala o lou tulai, ina ia faamauina le tetee o lenei Vaega, ia tusi igoa o le itumalo o lenei Vaega e tusa ai ma le matou teena o le Tulafono Tau Faaofi, a o lea o le a faatuu le tatou Fono. Ae le i aumaia lau fesili mo le pasiaina o le faitauga faalua o le Tulafono Tau Faaofi. Ua avea le tou manao e aua ne i matou lauga, ae galo ai tulaga o le Fono Aoao.

FOFOGA FETALAI: E le o le agaga lena Palusalue, e le o le agaga lena o lea e taumafai atu ai nei le Nofoa, o le tausisia o tatou Tulafono Tumau. Silasila foi ua alu le vaiaso atoa lenei o tatou fetuunai i le Tulafono Tau Faaofi, aumai, avatu, faamalamalama, o lea lava ou te matau atu, o lea lava ou te matau matau ma le manino le tulaga o a outou tuleiga ma saunoaga. O lea foi na ou taumafai e faamalamalama atu, e le o le avanoa mulimuli lenei o le tatou Fono, ona o le mea ua tulai mai o lea ua ala ai ona tatou agai i le tulaga lea. A o lo o avanoa, silasila foi i le avega o tatou Tulafono Tau Faaofi i Komiti, e maua lo outou avanoa tusitusia, ave outou finagalo ma lagona e tusa o le Tulafono Tau Faaofi. Ona ou manatu lea o lea ua e saunoa i le tulaga lea, o mea e faigofie ona fai, e le o ni mea o lea e faafofoga atu le Failautusi ma le Ofisa o le Fono, e le faapea foi o po malae i le faafofoga mai a le tatou atunuu i le matau ma le vaai i mea uma o lo o faagasolo ai le tatou galuega. Ae malilie sui usufono, o lea ou te taumafai atu ina ia tatao le tatou Fono i le moa o le ala. O le mea e aga i ai le fulisia ma le ausia, e faapena. Afai foi o lo outou manatu o le itu lea, e faapena foi. E le faapea e tuua ai tulaga, o lea tatou te le i oo i le tulaga o le iloiloga auiliili ma le faitauga faatolu. Silasila i avanoa, e le o le mutaaga lea o le mataupu, o lena lava toute silafia aga faa-Palemene. Afai e moni lo outou alofa e agai e teuteu mea ia tou te atugalua a ii le Tulafono Tau Faaofi, a lea e avanoa le tatou Komiti, o le Komiti o Tulafono Tau Faaofi o Mataupu Tau Faamasinoga, Leoleo ma Falepuipui. Se i silasila la i le matagofie? O i ina e agai tonu i ai outou finagalo i mea ia tou te atugalua i ai ona aumai lea i totonu o le tatou Maota fai le iloiloga auiliili ona toe avatu foi lea o le fesili i le tulaga lea e faatulaga ai. A o le tulaga lea e te atugalua ai, ua ou maua lelei le mea e agai i ai le la Itu o le Maota ma sui usufono mamalu o le tatou Palemene.

Ia, e manatu o lea ua tatou taunuu i le...

Afioga Hon Palusalue Faapo II: Lau Afioga i le Fofoga Fetalai, o se mea lava e fia malamalama ai. O lona uiga o le a alu ai faapea e le pasia le faitauga faalua o le Tulafono Tau Faaofi?

FOFOGA FETALAI: Ua uma ona ou fai atua le faaiuga lea ua fulisia. O lea ua e faafofoga i le fulisia lea e i ai le tulaga o le Maota ma le faitauga.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga, o lau Afioga e faia faaiuga o mea uma, e te faia loa le faaiuga, uma loa mea uma. O le mea foi ua ta masani i le mea lenei o le tutulai atu o au nei ma le Malo, ua ta masani i le alu alu alu faapea mai Palu, “Ua lava ia lea.” Alu, alu tulai mai Palu faapea mai, “Ua lava ia lea.” O lea foi na tupu le mea faapena i le Fono talu ai. Na lau, lau atu foi le anoano o mau Tali a le Malo faauilavea foi lenei Itu, aemaise le sui usufono lea mo Faleata Sisifo. O le tasi lea sui usufono na matua malosi lona tulai e tatou mai ua lava ia lea ae pasi le tatou Tulafono, a o le Malo ia e fia galue lava.

E pei foi ona ou fai atu aneleila, pe oo lava taeao e Fono lava. O lea na matua faafofoga lelei lava le atunuu i saunoaga a le Afioga ia Palu na faamalie mai ai ia faia se malologa. Lau Afioga i le Fofoga Fetalai, o lea e sao lelei lau faaiuga.

Tofa Lefau Harry Schuster: Lau Afioga i le Fofoga Fetalai na o sina avanoa puupuu lava.

FOFOGA FETALAI: Se i tulai mai lau Tofa Lefau.

Tofa Lefau Harry Schuster (Vaimauga Sisifo): Faafetai tele lava i lau Afioga i le Fofoga Fetalai mo le avanoa. Ou te iloa foi o le mea lea tatou te talanoa ai ua pasia le lafo.

Lau Afioga i le Fofoga Fetalai o se manatu e fia faasao ona o le Tulafono Tumau e manino lava. Po o le a le faaiuga a lau Afioga i le Fofoga Fetalai e fai, o le faaiuga lenei o le mataupu. O le tulaga foi i Tulafono Tumau a le Maota, a faatu le lafo ma faaluaina e manino foi. Ona pau lava sina atugaluga i lou tagata ma lou faanoanoaga lau Afioga i le Fofoga Fetalai, a tatou alu i tulaga sasa’o i Tulafono Tumau, e le mafai ona maua e matou se avanoa leaga o le fuainumera lenei e i le Itu lenei. Ona pau lava le itu sa naunau atu ai, o le avanoa se i saunoa ai o matou sui usufono.

O lou faanoanoaga i le mea lea e tupu e sao lelei lau Afioga i le Fofoga Fetalai ma le sui usufono sa saunoa i le Tulafono, ae i ai foi le isi lapataiga i le mea lea o le temokarasi, tyranny of the majority. O le mea lenei o lea ou te faanoanoa ai i le aso lenei ona o le fuainumera o lenei ua manumalo outou i le fuainumera, ae na o le avanoa lava sa tuitui atu ai.

Faafetai tele lava mo le avanoa.

FOFOGA FETALAI: Malo, o lea foi ua toe saunoa nisi o lea Itu o le Maota, ae pei lava ona ou fai atu i le taimi ua sola, o le faaiuga lea ua taatia i le ogatotonu. E le o le avanoa mulimuli lenei e pei ona ou taumafai e faamatala atu i sui usufono mamalu o le Maota Fono lenei. E le o le mutaaga lenei o le tatou mataupu. O le agaga i le moni ma le faamaoni o a tatou upu ma tala i tuleiga ma saunoaga e fia fai, tatou agai i le Komiti. O ai uma tagata e fia fai ni lagona i le Komiti, tatou o i le Komiti e faatino ai, ona toe aumai lea i totonu o le tatou galuega mo le faatinoga, ae ua faamalieina au nei o le Fofoga Fetalai ona o le tulaga ua talia aloaia le lafo na tuuina mai e le Afioga

ia Leaupepe, ma o lea ua uma ona ou taliaina foi o le tulaga lena e agai i ai le tatou faitauga faalua.

O le lagona ua ou manatu, o le atoaga lena o le faitauga lea ua i ai. E leai foi se isi o i sili o lea ua amata ona malamalama ma manino le taumafai atu, o le fulisia i ina o le fulisia foi lea iinei. O le agaga lena ua ou manatu ai, malailie sui usufono mamalu, o lea ua taunuu. E le mafai ona toe toso i tua a tatou galuega. Ua ou manatu foi o lea ua avatu le Fesili ma ua talia, o lena.

Afioga Hon Palusalua Faapo II: Faafetai i lau Afioga i le Fofoga Fetalai. O le a inu lava i ai lenei Itu ae faamasino mai Samoa. Ona pau lava lea o le mea ua ou tulai atu ai, ia faamau o matou itumalo e teena le Tulafono Tau Faaofi. Ona pau lava lea o le mea ou te tatalo atu ai, ia faamau itumalo o le Itu Agai e teena le Tulafono Tau Faaofi matou te le talia. Ona pau lava lea o le mea ua ou tulai atu ai.

FOFOGA FETALAI: O lea ua maua lou finagalo.

Tofa Lealailepule Rimoni Aiafi: Malie lau Afioga i le Fofoga Fetalai, e leai e le toe suia e au se faaiuga a lau Afioga i le Fofoga Fetalai.

FOFOGA FETALAI: Tulai mai le sui usufono mo Faleata Sisifo.

Tofa Lealailepule Rimoni Aiafi: E le toe suia e Lealailepule, ae ona pau lava lea o lau tatalo. O matou nei e le o ni sui usufono na omai e lauga i ni Komiti, na matou omai se i faafofoga Samoa i o matou manatu.

O le tatou Tulafono Tau Faaofi, se o lou sui usufono ou te tetee i le Tulafono Tau Faaofi. E fia fai sou manatu e fesoasoani i le Tulafono Tau Faaofi leaga e faigata le Tulafono Tau Faaofi. E le tagatasi a matou lauga lau Afioga i le Fofoga Fetalai. Paga lea i le mea ua tupu i lenei aso, ua outou nonofo lava outou ma toe faaleaga la outou galuega manaia o lo o fai.

FOFOGA FETALAI: Malie le sui usufono mamalu, ou te lagona e malamalama lou finagalo i le tulaga i Komiti lea na ou taua. Afai e moni lou lagona e te alofa i fautuaga lelei, ia agai i le Komiti. O lea ua ou fai atua le tulaga e sili ona sagatonu e faamaui ai le tulaga lea.

Tulai mai le Minisita mo Galuega, Felauaiga ma Atinae Esecese.

Afioga Hon Manualesagalala Enokati Posala: Lau Afioga i le Fofoga Fetalai, ona o lea e saunoa mai le uso a faipule i le itumalo, ae lua sui usufono o le itumalo. O le lagolagoina o lenei Tulafono Tau Faaofi, se i maua ai ni galuega e sulu i ai le itumalo e le o lelei e pei ona saunoa le Afioga i le Taitai o le Itu Agai. Ma le faaaloalo lava.

Afioga Hon Palusalua Faapo II: Lau Afioga, aua e te fia lelei i le itumalo.

Afioga Hon Manualesagalala Enokati Posala: Lau Afioga i le Fofoga Fetalai, o lea e faafofoga mai le itumalo, ua soona fai tele upu a le Taitai o le Itu Agai.

Afioga Hon Palusalua Faapo II: O e iloa le mea lea ua tupu, ua taofi le itumalo i le saunoa i le Tulafono Tau Faaofi? O e silafia le mea lena? Ua leai se avanoa o le itumalo e saunoa ai i le Tulafono Tau Faaofi?

Afioga Hon Manualesagalala Enokati Posala: E i ai le isi avanoa e pei ona saunoa le Afioga i le Fofoga Fetalai. Aua e te faaseseina le itumalo. Ma le agaga faaaloalo.

FOFOGA FETALAI: Se i tulai mai lau Afioga i le Minisita mo Tupe Maua.

Tofa Hon Tuiloma Lameko: Ou te manatu o taimi faigata nei o le tatou Palemene, ae ou te manatu foi o au o se isi o toeaina o le Palemene. O le Palemene, o le malelega mai le Fofoga Fetalai o le tulaga aupito sili lena ona taua. Le mamalu i lena Itu, o lea ua uma ona saunoa le Palemia aemaise lava o le Fofoga Fetalai. Ua leva foi ona ou iinei i le Palemene, e le oo i se tulaga faapenei. E tumu i le va fealoaloai. O le mea lea e le aoaia e Laupua Tamafaiga ma e le o ia te au foi se atoatoa, ae ona pau lava le mea lea ou te fai atu ai, tatou vaai i le Fofoga Fetalai. E le faigofie le galuega a le Fofoga Fetalai. O le a la le mea na ala ai ona fai le Fofoga Fetalai? O le Fofoga Fetalai, o le pule aoao lena o le Palemene i ana Fonotaga. Se i seu silasila ma tatou vaai alofa i le galuega a le Fofoga Fetalai.

O le talanoa atu lea ma le faaaloalo.

FOFOGA FETALAI: E faafetai atu i lau Afioga i le Minisita. Malie Afualo, o lea ua ou talosaga atu ma le agaga maualalo. Silasila foi, ua toetiiti lava faasefulu fia ona ou talosaga atu. A i ai ni outou agaga alofa ma outou manatu mai i le galuega lea e tau faatonutonu. Silasila foi i le taatiaga o le tatou galuega, ua faatolu, faafa lea ona ou talosaga atu. E le o ni ai e avea le logona o finagalo, manatu ma lagona. E lua isi avanoa ia e totoe, o le avatu i le Komiti ona aumai lea iloilo auiliili. O le a le mea e tuu ai outou finagalo i ia mea? E avatu lava le avanoa, ae silasila foi i lenei mea na taumafai atu nei ona o finagalo ia ua faatulai mai? Po o fea le mea tatou te agai i ai, tatou te agai lava i le autasi. O lea ua faaalua finagalo o sui usufono e sili ona toatele o le Maota ma latou aumaia i luma o le Laulau a Fono ma ua faatu le lafo, o fea la ou te agai i ai? E agai lava i le faataatiaga ma le tulaga e tataua ona i ai ma a tatou Tulafono Tumau.

E momoli atu le agaga faafetai tele i lenei aso i le paia ma le mamalu maualuga o le Maota Fono. E manatu foi ua faiva ese Lopepe ona o le taunuuga ua taunuu i ai le tatou Fonotaga ona o le faamavaega a le sui usufono mamalu mo Sagaga le Usoga. Ua tatou manatu ai, ua ese le mea na tatou manatu ai ese le mea ua tatou taunuu i ai ona o le mafutaga ma le Afioga i le sui usufono. Ona ou talitonu ai lea, ua ave foi le tatou faamafanafanaga ma faamanuiaga mo le uso, le itumalo ma le paia maualuga o le Palemene, ia ave ia lea i uta.

O lenei aso e momoli atu le faafetai tele i le paia ma le mamalu o le Maota i lenei aso. Faafetai i tuleiga ma saunoaga aemaise malelega momoli ma fetalaiga na saunoa ai sui usufono mamalu uma o lenei Maota, e momoli atu le faafetai tele. E pei lava ona taumafai atu le Fofoga Fetalai ina ia taatia i lagatonu tulaga uma i le tatou Maota Fono, o lea e sisila fofoga o le Atua i le

taumafai atu. E leai foi se tautai e le asa se faiva, e leai foi se tautai matapalapala e atoa atu i lona sa. A o le agaga ma le faamoemoe ia taatia i lagatonu lenei mataupu.

E tatalo atu foi i le Komiti o lo o ua faasee nei i ai lenei mataupu, ia alo i outou faiva-manai. O a tulaga uma i ni mataupu e tuuina atu ina ia faaatoatoa la outou galuega ma toe tuuina mai i le Palemene nei i se taimi talafeagai i le lumanai.

Ua tatou taunuu i lo tatou taimi malolo, e i ai le faamoemoe o le a tatou toe feiloai i le tatou Fono ia Mati, a o le agaga ia tapuaaoina pea lo outou soifua manuia aua le feagai ai ma feau, tiute ma galuega.

E faapai atu foi ia Samoa ma lana tapuaiga i lenei aso. Samoa, e talitonu e le o toe po malae i lau faafogafoga i le tulaga i tuleiga ma saunoaga o lenei aso. O a foi tiuga a le vaatele i tuleiga ma saunoaga sa outou faafogafoga i ai i lenei mataupu ma le faatulai mai o lenei Tulafono Tau Faaofi, ia malu ave i fale i outou finagalo. O le a foi sa outou faafogafoga mai i le tulaga ua oo i ai se tasi o sui usufono o le Maota, ia outou manatua pea i talosaga le feagai ai o le sui usufono ma lona aiga.

A o le i faamaeaina le Fono, ou te tatalo atu i lau Afioga i le Minisita mo Faatoaga ma Faigafaiva, tulai mai e fai se tatou tatalo faaii ona tatou malolo ai lea.

Na tolopo Taulumaga a le Fono Aoa o le itula e 5.39 i le afiafi seia aulia le itula e 9.00 i le taeao o le Aso Lua, 17 Mati 2015.